




FAUSIAINA O SE FAAIPOIPOGA E FAAVAVAU

TUSI LESONA A LE FAIAOGA

Mataupu Faalelotu 235



FAUSIAINA O SE FAAIPOIPOGA E FAAVAVAU TUSI LESONA A LE FAIAOGA

Mataupu Faalelotu 235

Saunia e le

Ofisa o Aoga a le Eklesia

Lolomiina ma faasalalauina e

Le Eklesia a Iesu Keriso o le Au Paia o Aso e Gata Ai

Aai o Sate Leki, Iuta

Auina atu faamatalaga ma faasa'oga, e aofia ai ni mea o sese ona lolomi, i le CES Editing, 50 E. North Temple Street, Floor 8, Salt Lake City, UT 84150-0024 USA.
I-meli: ces-manuals@ldschurch.org

© 2011 Puletaofia e leIntellectual Reserve, Inc.

Ua taofia aia tatau uma.

Lolomiina i le Iunaite Setete o Amerika

Faamaonia le faa-Peretania: 6/03

Faamaonia le faaliliuga: 11/00

Faaliliuga o le *Building an Eternal Marriage: Teacher Manual*

Samoan

35850 890

ANOTUSI

Folasaga	v
Faitauga mai le Tusi Lesona a le Tagata Aoga	viii
1 O Se Vaaiga e Faavavaau	1
Tufaaga 1: O Se Faatusatusaga o Manatu	7
2 O Le Olioli o le Faaipoipoga	9
3 O Le Tausiaina o le Feagaiga Paia o le Faaipoipoga	13
4 O Le Faaleagaga i le Faaipoipoga	19
5 O Vaega Faavae o Fesootaiga i Faaipoipoga	22
Tufaaga 2: Suega o le Fesootaiga	24
Tufaaga 3: Iloiloga a le Tagata Lava Ia o le Faatautala/Sauaina Faalelagona	25
6 O Le Lotogatasi Amiotonu i le Faaipoipoga	26
Tufaaga 4: Ina Ia Tasi i Ta'ua	31
7 Uputuu a Tuua	35
Tufaaga 5: Tu ma Aga Masani Faaleaiga	38
8 O Fesootaiga Mafana i le Faaipoipoga	40
9 O Eseesega na Fananau Mai ma Tane ma Fafine	43
Tufaaga 6: Fesili e uiga i “Eseesega na Fananau mai ma Tane ma Fafine” ..	46
10 O Matafaioi ma Tiutetauave Paia o Alii	47
11 O Matafaioi ma Tiutetauave Paia o Tamaitai	49
12 Faatulagaina o Manaoga e Faamuamua o le Olaga	51
13 Tupe ma le Faaipoipoga	54
14 Puleaina o Punaoa Faaletino	57
15 O Galuega a Tina i fafo atu o le Aiga	60
16 Faatumauina o le Ola o le Alofa	65
17 Faaaloalogiaina o Lou Toalua	69
18 Faamaoni A'ia'i i le Faaipoipoga	78
19 O Le Tulaga E Oo I Ai Matua e Fai Fanau i Siona	82

FOLASAGA

O le Mataupu Faalelotu 235, Fausia o Se Faaiipoipoga e Faavavau, o se faaaauauga lea o le kosi o le Mataupu Faalelotu 234, Sauniuniga mo se Faaiipoipoga e Faavavau. O le Mataupu Faalelotu 234 o loo faamamafa ai le sueina o se soa talafeagai lelei e faaiipoipo i ai i le malumalu. O le Mataupu Faalelotu 235 ua faaaoga ai ia upumoni ua toefaaalia e taulai atu ai i mataupu faavae ma tomai ia e mafai ona fesoasoani ai i se ulugalii e atiina ae se faaiipoipoga fiafia.

O le Mataupu Faalelotu 235 o se kosi mo le semesa. Pe feiloai faalua le vasega i se vaiaso i le ao pe tasi foi i se vайасо i le afiafi, ua anoanoai ia punaoa ua maua. O le faautautaga a le faiaga o se vaega autu lea i le faagasologa o le tusi lesona a le faiaga.

O le tusi lesona a le tagata aoga mo lenei kosi ua faaigoaina o le *Faaipoipoga e Faavavau Tusi Lesona a le Tagata Aoga* (2001). O le tusi lesona lea o loo i ai uma ia faitauga o le kosi 234 ma le 235, ma ua faamamafaina e kosi taitasi ia faitauga mai le tusi lesona.

O LE OLA AI I MATAUPU FAAVAE O LE TALALELEI

O Le Puleaina o o Tatou Olaga i Mataupu Faavae

Sa fautua mai Peresitene Ezra Taft Benson: "O se tasi o mea e sili ona taua e mafai ona e faia ... o le faatofuina lea o oe lava ia i tusitusiga paia. Sailiili i ai ma le maelega. Fiafia i le afioga a Keriso. Aoao ia aoaoga faavae. Ia tauloto ia mataupu faavae o loo maua ai i totonu" ("O Le Mana o le Afioga," *Liahona*, Iulai 1986, 69).

Na ta'ua e Elder Richard G. Scott, o se sui o le Korama a Aposetolo e Toasefululua: "A o e sailia le malamalamama faaleagaga, saili mo mataupu faavae. Ia tuuese ma le faaeteete na mataupu faavae mai auiliiliga ua faaaogaina e faamalamalamai ai. O mataupu faavae o upumoni loloto ia, ua afifiina mo le faaaogaina i tulaga eseese uma. O se mataupu faavae moni e faamaninoina se faaiuga e oo lava i tulaga e sili ona le mautonu ma feteenai. E matuai tauaogaina lava se taumafaiga sili e faatulaga ia upumoni ua tatou aoina mai i ni faamatalaga faigofie o mataupu faavae" (i le Conference Report, Oke. 1993, 117; po o le *Ensign*, Nov. 1993, 86).

O le iloaina ma le ola ai i mataupu faavae sa'o e taua lea i se olaga fiafia ma se faaiipoipoga fiafia. U'a aofia i mataupu faavae o le talalelei ia aoaoga faavae, poloaiga, feagaiga, sauniga, ma mataupu. Peitai, i le tusi lesona lenei, o le faaupuga *mataupu faavae* o loo faatatau i se upumoni o le talalelei lea tatou te maua ai se fautuaga ma se taiala mo amioga.

E Tatau Ona Faia La Tatou Vaega

O mataupu faavae e mafai ona vaevaeina i ni vaega autu se lua: *afai* ma le *o le a*. O le vaega o le *afai* o se faamatalaga o fautuaga masani mai le Alii. O le vaega o le *o le a* o taunuuga folafolaina o le usitaia po o le le usitaia o lena fautuaga.

Na ta'ua e le Atua le Upu o le Poto "o se mataupu autu faatasi ma se folafolaga" (MF&F 89:3). O le vaega o le *afai* o le fautuaga lea ia tausia le mama a'ia'i faaletino ma faaleagaga o o tatou tino. O le vaega o le *o le a* ua folafola mai ai le soifua maloloina, poto, malosi, ma isi faamanuiaga.

E tausia e le Alii Ana folafolaga: “O A'u, o le Alii, e notia a'u pe a outou faia mea Ou te fai atu ai; ae a outou le faia mea Ou te fai atu ai, e leai se folafolaga mo outou” (MF&F 82:10). E tatau ona tatou faia la tatou vaega ina ia agavaa ai mo faamanuiaga (tagai i le MF&F 130:20–22). E tatau foi ona tatou manatua e fuafua e le Atua le vaega o le *o le a* e tusa ma Lona silafia ae le o mea ua tatou mafaufau i ai.

O mataupu faavae e le masani ona aoaoina pe tusia i le ata *afai-o le a*. Mo se faataitaiga, e le masani ona saunoa mai le Au Pulega Aoao “*afai* e te faatuatua, *o le a* i ai le mana o le Alii i lou olaga.” Ae, latou te tuuina mai ni faataitaiga e faamalamalama ai le faatuatua po o le faaosofia o i tatou ina ia faatuatua.

O Mataupu Faavae o le Talalelei e Aoao

O mataupu faavae o le talalelei e aoao—e moni i ona tulaga uma i aganuu uma i taimi uma. O mataupu faavae na faaalia ia Atamu i le amataga o le lalolagi o loo tumau pea lona moni e oo mai i aso nei e gata ai. O loo i ai a tatou perofeta, tutsusiga paia, ma uunaiga a le Agaga Paia e fesoasoani ia i tatou, tatou te iloa ai ma faaaoga mataupu faavae sa'o.

Aotelega

O se mataupu faavae o se upumoni ua faatumauina, o se poloaiga, po o se tulafono e mafai ona e faaaoga e taiatalaina le faiga o au faiiuga. O mataupu faavae e fesoasoani ia i tatou i le faaaogaina o aoaoga faavae o le talalelei i le soifuaga o aso uma. E aumaia ai ia i tatou le malamalama e faamalamalamaina ai le ala i o tatou luma i lenei lalolagi fenumiai ma le agasala.

FAAAOGAINA O LE TUSI LESONA A LE TAGATA AOGA

O le *Tusi Lesona a le Tagata Aoga mo Faaipoipoga e Faavavaau* (aitema 35311) ua tuuina mai ai aoaoga e uiga i tafaoga faamasani ma faaipoipoga mai punaoa musuia (tagai i le “Autu o le Tusi Lesona,” tusi lesona a le tagata aoga, viii). O lesona o loo i totolu o lenei tusi lesona a le faiaoga, o loo faavae i faiatuga o i le tusi lesona a le tagata aoga.

A o agai atu tagata o le vasega ina ia malamalama ma ola i aoaoga ua tuufaatasia i le tusi lesona a le tagata aoga, o le a lelei atu la latou sauniuniga mo le faatautaia o o latou lava olaga i mataupu faavae sa'o ma mulimuli i le fuafuaga sili a le Alii mo le fiafia. O aoaoga o loo i le tusi lesona a le tagata aoga o loo mulimilitai i le mamantu o le tulafono o molimau. Sa saunoa mai Elder Henry B. Eyring o le Korama a Apostolo e Toasefululu: “O se tasi o auala ua tatou iloaina ai o le lapataiga e mai i le Alii o le tulafono o molimau, o molimau ua faamaoniaina. E foliga mai ua tuuina soo mai saunoaga a perofeta, e tatau loa ona tuu atoa atu i ai lo tatou naunautaiga ma faatumauina o tatou loto i le agaga faafetai ona ua tatou ola i se taimi faamanuiaina” (i le Conference Report, Ape. 1997, 32; po o le *Liahona*, Iulai 1997, 28; tusi lesona a le tagata aoga, 310).

O mataupu o loo talanoaina i totolu o le tusi lesona a le tagata aoga o loo lisina faaalafapeta i totolu o le faasino mataupu o le tusi lesona. O se faasino upu faigofie o loo i tua o le tusi lesona e mafai foi ona fesoasoani i le au faiatuga e sailia ai saunoaga ma faaupuga musuia e uiga i mataupu e faatatau i tafafaoga faamasani, faauoga mautu, faaipoipoga, ma le aiga. O nei aoaoga o loo tuuina mai ai le finalo o le Alii mo Ona tagata o le feagaiga pe a oo mai i tulaga faatonuina o tafaoga faamasani ma amioga i totolu o le faaipoipoga.

O LE FAATULAGAINA O LE TUSI LESONA A LE FAIAOGA

O lesona taitasi i le tusi lesona a le faiaoga ua i ai vaega eseese:

- ***Ulutala.*** O le autu o le lesona.
- ***Vaaiga Aoao Faale-Aoaoga Faavae.*** O se faatomuaga puupuu mo le mataupu o le lesona ma talaaga faaleaoaoaga faavae mo le lesona.
- ***Mataupu Faavae.*** O se aotelega o manatu autu o le lesona.

Sa faamalamalama mai e Elder Dallin H. Oaks o le Korama a Apostolo e Toasefululua:

O aoaoga faavae ma mataupu faavae e lelei ona aoaoina atu, e sili atu ona mamana lona aafiaga i amioga nai lo tulafono. Pe a tatou aoao atu ia aoaoga faavae ma mataupu faavae o le talalelei, e mafai ona tatou agavaa ai mo le molimau ma le taitaiga a le Agaga ina ia lagolagoina a tatou aoaoga, ma e tatou te faamausaliina ai ma le faatuatua o tamaiti o a tatou vasega i le sailigia o le taitaiga a lena lava Agaga e faaaogaina na aoaoga i o latou lava olaga" (i le Conference Report, Oke. 1999, 102; po o le *Liahona*, Ian. 2000, 96).

- ***Faitauga mai le Tusi Lesona a le Tagata Aoga.*** O se lisi o ni faitauga fautuaina mai le tusi lesona a le tagata aoga e tatau ia oe le faiaoga ma le tagata aoga ona faitauina ae le'i faia vasega taitasi. (Mo se lisi atoa o faitauga mai le tusi lesona a le tagata aoga mo lesona uma, tagai i le "Faitauga mai le Tusi Lesona a le Tagata Aoga," viii.) O nei faitauga e tatau ona avea ma punaoa autu mo talanoaga ma e le tatau ona suitulaga i ni tusitusiga faalelalolagi. E mafai foi ona e tagai i le faasino autu o mataupu i le lomiga o le *Liahona* o le konafesi aoao faatoa maea atu nei e maua ai tuatusi mo faaopoopoga o nei faitauga.
- ***O a Mea e Aoao Atu.*** O se faamatalaga se tasi pe sili atu (o loo maua i le itu tauagavale) o loo faamatala ai aoaoga faavae, mataupu faavae, po o manatu faavae o loo aoaoina.
- ***Fautuaga i Auala e Aoao Atu Ai.*** "O metotia, o auala ma gaoioiga e aoao ai o loo faaaogaina e le faiaoga e fesoasoani ai i tamaiti aoga ina ia latou malamalama i le aano o le lesona. O nei metotia e ono aofia ai gaoioiga e pei o talanoaga, otiovisio, tusitusiga, ma galuega fai faavaega" (*Aoaoina o le Talalelei: O Se Tusitaulima mo Faiaoga ma Taitai o le OAE* [1994], 19). Tagai i le *Aoaoina o le Talalelei* mo nisi talanoaga e uiga i le "o le a" ma le "e faapefea" ona aoao atu.
- ***Faaiuga.*** O se aotelega o mea e tatau ona aoaoina e tagata aoga mai le lesona.

FAITAUGA MAI LE TUSI LESONA A LE TAGATA AOOGA

LESONA 1: O SE VAAIGA E FAAVAVAU

“O Le Aiga: O Se Folafolaga i le Lalolagi,” o le Au Peresitene Sili ma le Korama a Apostolo e Toasefululua (89–90)

Aoaoga Filifilia mai le “Vaaiga e Faavavau” (86–87)

Aoaoga Filifilia mai le “Mataupu Faavae” (292–93)

“Ausia o le Malamalama Faaleagaga,” Elder Richard G. Scott (157–58)

LESONA 2: O LE OLIOLI O LE FAAIPOIPOGA

Aoaoga Filifilia mai le “O Le Fiafia i le Faaipoipoga” (141–43)

“O Le Aiga: O Se Folafolaga i le Lalolagi,” o le Au Peresitene Sili ma le Korama a Apostolo e Toasefululua (89–90)

LESONA 3: TAUSIAINA O LE FEAGAIGA PAIA O LE FAAIPOIPOGA

Aoaoga Filifilia mai le “Feagaiga ma Sauniga” (40–42)

Aoaoga Filifilia mai le “Tatalaina o Faaipoipoga” (77–78)

“O Le Agaga Paia o le Folafolaga” (144)

“Feagaiga o le Faaipoipoga,” Elder Bruce C. Hafen (49–52)

LESONA 4: O LE FAALEAGAGA I LE FAAIPOIPOGA

“O Le Aiga: O Se Folafolaga i le Lalolagi,” o le Au Peresitene Sili ma le Korama a Apostolo e Toasefululua (89–90)

Aoaoga Filifilia mai le “O Le Aiga: O Se Folafolaga i le Lalolagi” (89–118)

LESONA 5: O VAEGA FAAVAE O FESOOTAIGA I LE FAAIPOIPOGA

Aoaoga Filifilia mai le “Fesootaiga” (33)

LESONA 6: LOTOGATASI AMIOTONU I LE FAAIPOIPOGA

Aoaoga Filifilia mai le “Lotogatasi” (368–70)

Aoaoga Filifilia mai le “Manatu Faapito” (325)

LESONA 7: UPUTUU A TUAA

Aoaoga Filifilia mai le “Uputuu a Tuua” (361–62)

“O Uputuu a o Latou Tuua,” Elder Marion D. Hanks (362–65)

LESONA 8: FESOOOTAIGA MAFANA I LE FAAIPOIPOGA

Aoaoga Filifilia mai le “Fesootaiga Mafana i le Faaipoipoga” (147–49)

“O le Punavai o le Ola,” Elder Boyd K. Packer (149–55)

“O Le Faailoga Silisili o le Faatasiga Atoatoa” ma le “O se Faailoga o le Va Feagai ai ma le Atua,” i le “Mama Faaletagata Lava Ia,” Elder Jeffrey R. Holland (250–51)

Aoaoga Filifilia mai le “Fuafuaina o le Fanauina o Fanau” (16–18)

“E I Ai La’u Fesili,” Dr. Homer Ellsworth (18–20)

LESONA 9: O ESEESEGA NA FANANAU MAI MA TANE MA FAFINE

Aoaoga Filifilia mai le “O Eseesega na Fananau mai ma Tane ma Fafine” (66–68)

“Mo Le Taimi Nei ma le Faavavau Atoa,” Elder Boyd K. Packer (69–73)

“O Le Aiga: O Se Folafolaga i le Lalolagi,” o le Au Peresitene Sili ma le Korama a Aposetolo e Toasefululua (89–90)

Aoaoga Filifilia mai le “Tulaga Tutusa o Alii ma Tamaitai” (84–85)

LESONA 10: O MATAFAIOI MA TIUTETAUAVE PAIA O ALII

“O Le Aiga: O Se Folafolaga i le Lalolagi,” o le Au Peresitene Sili ma le Korama a Aposetolo e Toasefululua (89–90)

“Mo Tamā i Israelu,” Peresitene Ezra Taft Benson (203–6)

“O o Tatou Tiutetauave Paia,” Peresitene Gordon B. Hinckley (24–28)

“Avea ma Tane ma Tamā Amiontonu,” Peresitene Howard W. Hunter (219–22)

LESONA 11: O MATAFAIOI MA TIUTETAUAVE PAIA A TAMAITAI

Aoaoga Filifilia mai le “O Matafaioi ma Tiutetauave Paia o Tamaitai” (371–74)

“Mo Tina i Siona,” Peresitene Ezra Taft Benson (377–82)

“O Tamaitai o le Ekalesia,” Peresitene Gordon B. Hinckley (382–86)

“O Le Olioli i le Ola ai i le Fuafuaga Sili o le Fiafia,” Elder Richard G. Scott (386–89)

“O i Tatou o Tamaitai o le Atua,” Sister Sheri L. Dew (389–92)

LESONA 12: FAAMUAMUAINA O MANAOGA O LE OLAGA

Aoaoga Filifilia mai le “O Faamuamua ma Faapaleni” (294–95)

“Faatumauina o le Paleni i Mea Manaomia o le Olaga,” Elder M. Russell Ballard (299–301)

“A o le Mea Lava e Tasi e Ao Ina Ia Maua’: Ia Avea ma Tamaitai Faatuatua Tele ia Keriso,” Sister Patricia T. Holland (392–99)

“O Le Aiga: O Se Folafolaga i le Lalolagi,” o le Au Peresitene Sili ma le Korama a Aposetolo e Toasefululua (89–90)

LESONA 13: TUPE MA LE FAAIPOIPOGA

Aoaoga Filifilia mai le “Mea Tautupe” (123)

“Tasi mo le Tupe: Taiala mo Mea Tautupe a le Aiga,” Elder Marvin J. Ashton (123–28)

“Matape’ape’ā, Manatu Faapito, ma le Soona Faaloloto,” Elder Joe J. Christensen (128–31)

LESONA 14: PULEAINA O PUNAOA FAALETINO

“Mo Tama ma Tamā,” Peresitene Gordon B. Hinckley (63–65)

Aoaoga Filifilia mai le “Aitalafu” (62–63)

Aoaoga Filifilia mai le “Sauniuniga Faaletino” (350–52)

LESONA 15: GALUEGA A TINA I FAFO ATU O LE AIGA

Aoaoga Filifilia mai le “Galuega a le Tina i fafo atu o le Aiga” (253–57)

Aoaoga Filifilia mai le “Aoga” (82–83)

“O Le Aiga: O Se Folafolaga i le Lalolagi,” o le Au Peresitene Sili ma le Korama a Aposetolo e Toasefululua (89–90)

LESONA 16: FAATUMAUINA O LE OLA O LE ALOFA

Aoaoga Filifilia mai le “Faaipoipoga i le gasologa o Tausaga” (196)

Parakalafa 7 o le “O Le Aiga: O Se Folafolaga i le Lalolagi,” o le Au Peresitene Sili ma le Korama a Aposetolo e Toasefululua (89)

Aoaoga Filifilia mai le “O Le Aiga: O Se Folafolaga i le Lalolagi,” (90–95)

“O Le Faaoaina o le Faaipoipoga,” Elder James E. Faust (196–98)

“O Le Faamanatu o le 60 Tausaga Tali Ona Faaipoipoga le Au Hinckley” (198–99)

“E Faapefea Ona Ou Alofa Ia Te Oe?” Elder Jeffrey R. Holland (167–72)

“O Se Faatasiga o le Alofa ma le Malamalama,” Elder Marlin K. Jensen (172–77)

LESONA 17: FAAALOALOGIAINA O LOU TOALUA

Aoaoga Filifilia mai le “Faasaunoa” (3–5)

“Faamaloloina o Mā'ilaila Matuia o le Saua,” Elder Richard G. Scott (6–9)

LESONA 18: FAAMAONI A'IA'I I LE FAAIPOIPOGA

Aoaoga Filifilia mai le “Faamaoni i le Faaipoipoga” (119–22)

Aoaoga Filifilia mai le “Ponokarafi” (282–85)

“O Le Aiga: O Se Folafolaga i le Lalolagi,” o le Au Peresitene Sili ma le Korama a Aposetolo e Toasefululua (89–90)

LESONA 19: O LE TULAGA E OO I AI LE I AI O MATUA E FAI FANAU I SIONA

“Fanauina ma le Faafaleleina o Fanau,” i le “O Le Fuafuaga Sili o le Fiafia,” Elder Dallin H. Oaks (262)

“O Le Aiga: O Se Folafolaga i le Lalolagi,” o le Au Peresitene Sili ma le Korama a Aposetolo e Toasefululua (89–90)

Aoaoga Filifilia mai le “Tulaga Faamatua: Fausiaina o se Aiga e Tutotonu ai le Talalelei” (258–61)

1 O SE VAAIGA E FAAVAVAU

VAAIGA AOOAO FAALE-AOAOGA FAAVAE

E masani lava ona faamamafa mai e o tatou taitai le taua o le tagai i faafitauli faale-faaipoipoga ma faaleaiga mai se vaaiga e faavavau. Na taua e Elder Merrill J. Bateman, o se tasi o Fitugafulu: “O se vaaiga o le faaipoipoga ma le aiga e faavae i mataupu faavae e faavavau, e faateleina ai le avanoa mo le tulaga faamanuiaina. Pe a tagai atu se tasi i le vaaiga mamao, o le a ia taumafai malosi ai e onosai, loa ona tali-tiga, agalelei, agamalu, ma lotomaualalo. O nei amioga, i se tulaga lelei, e faamalosia ai le faaipoipoga” (“The Eternal Family,” i le *Brigham Young University 1997–98 Speeches* [1997], 115).

Na aoao mai Elder Bruce R. McConkie, a o avea ma se tasi o Fitugafulu:

“Mai le taimi o le fanau mai i le olaga faitino seja oo i le taimi tatou te faaipoipo ai i le malumalu, o mea uma ua i ai i le faagasologa atoatoa o le talalelei, e saunia ma agavaa ai tatou e ulu atu i lena faatulagaga paia o le faaipoipoga lea e avea ai tatou o le tane ma le ava i lenei olaga ma le lalolagi a sau.

“Ona amata mai lea i le taimi e faamauina faatasi ai tatou i le pule ma le mana o le perisitua paia … o mea uma e fesoottai ma mataupu faalelotu ua faaalia, ua mamanuina e fesoasoani ia i tatou e tausia tuutuuga ma aiaiga o a tatou feagaiga faale-faaipoipoga, ina ia i ai le malosi, mama, ma ia aoga lenei feagaiga i le olaga a sau.

“O le mea lea, o le faaipoipoga faaselesitala, o le sauniga tupito lea o le talalelei. … O le mea lea, o le iunite o le aiga o le faalapotopotoga sili ona taua i le olaga, po o le faavavau.

“Ma, o le mea lea, e tatau ai ona faateleina lo tatou naunau ma popole mo o tatou aiga, nai lo se isi lava mea o le olaga. …

“E leai lava se isi mea i lenei lalolagi e tutusa lona taua ma le foafoaga ma le faaatoatoaina o iunite o aiga” (i le Conference Report, Apr. 1970, 27).

MATAUPU FAAVAE

O se vaaiga i le faaipoipoga ma le aiga e faavae i luga o le talalelei a Iesu Keriso, e faateleina ai le avanoa mo le fiafia faale-ulugalii.

FAITAUGA MAI LE TUSI LESONA A LE TAGATA AOGA

“O Le Aiga: O Se Folafolaga i le Lalolagi,” O Le Au Peresitene Sili ma le Korama a Aposetolo e Toasefululua (83–84)

Aoaoga Filifilia mai le “Vaaiga e Faavavau” (86–88)

Aoaoga Filifilia mai le “Mataupu Faavae” (292–93)

“Ausia o le Malamalama Faaleagaga,” Elder Richard G. Scott (157–60)

O A MEA E AOAO ATU

*O la tatou faaipoipoga
ma sootaga faaleaiga o
le a faaleleia atili e ala
i le faaaogaina o mata-
upu faavae sa'o.*

FAUTUAGA I AUALA E AOAO ATU AI



Tusi Lesona a le Tagata Aoga. Faamalamalama atu o lenei kosi, Mataupu Faale-lotu 235, e faavae i luga o mataupu faavae. Ua tuuina mai i lesona taitasi se mataupu faavae lautele, e mafai ona faaaogaina i ni auala se tele ina ia fesoasoani e fausia ai se faaipoipoga e faavavau.

Fai atu i tagata o le vasega e sue le "Ola i Mataupu Faavae o le Talalelei" i le tusi lesona a le tagata aoga (viii). Fesili atu pe na faapefea ona tali atu Iosefa Samita ina ua fesiliglia pe faapefea ona ia taitaia ona tagata. ("Ou te aoao i latou i mataupu faavae sa'o, ona pulea lava lea e i latou i latou lava" [i le John Taylor, "The Organization of the Church," *Millennial Star*, 15 Nov. 1851, 339]). Tuu atu i tagata o le vasega e faitau le faamatalaga a Elder Richard G. Scott e uiga i mataupu faavae (tusi lesona a le tagata aoga, viii). E faapefea ona fesoasoani mataupu faavae ia i tatou e pulea ai o tatou olaga faaipoipo?

Faitau le vaega o totoe o le "O Le Puleaina o o Tatou Olaga i Mataupu Faavae" ma talanoaina fesili e pei o fesili nei:

- O faapefea ona faaaogaina le upu *mataupu faavae* i totonu o le tusi lesona a le tagata aoga?
- E faapefea ona fesoasoani le malamalama i mataupu faavae ia i tatou e usitai a ai poloaiga?
- O a auala e mafai ai e le malamalama i mataupu faavae moni ona fesoasoani e faamanino faaigu faigata?

Tuu atu i tagata o le vasega e faitau le vaega o totoe o le "O Le Ola i Mataupu Faavae o le Talalelei" (tusi lesona a le tagata aoga, viii-ix), ma fai atu fesili e pei o:

- O a nisi o faataitaiga mai tusitusiga paia o faamatalaga faale-mataupu faavae o le "afai-o le a"?
- O a auala e avea ai mataupu faavae moni ma mataupu "aoao"?
- O a auala e avea ai mataupu faavae moni ma mataupu e "faalagolago i tuutuuga"?

Ta'u i tagata o le vasega o faamoemoega autu e lua o lenei kosi o:

- Ia faailoa mataupu faavae o le talalelei e uiga i amioga e faatatau i sootaga faale-faaipoipoga o loo maua i tusitusiga paia, ma aoaoga a le Usoga.
- Aoao e faaaoga nei mataupu faavae i o tatou olaga.

Na tusia e Elder Richard G. Scott o le Korama a Apostolo e Toasefululua e faapea: "E ui e faigofie ona maua, o mataupu faavae moni e le faigofie ona ola ai sei a avea ma se mamanu mausali o le olaga" (i le Conference Report, Ape. 1993, 43; po o *Liahona* Me 1993, 34). Na tuuina mai e Elder Scott le fautuaga i le auala e faataunuu ai lenei mea. Tusi le faamatalaga lenei mai ia Elder Scott i luga o le laupapa: "A o faasolo ina manino mai luutaga o le malamalama, e ao lava ona *malamalama, faatauaina, usitaia, manatuaina, ma faalauteleina*" (i le Conference Report, Oct. 1993, 119; po o le *Liahona* Nov. 1993, 88).



Tusi Lesona a le Tagata Aoga. Tuu atu i tagata o le vasega e tou te sueina faatasi i le tusiga a Elder Scott ua faaulatalaina "Ausia o le Malamalama Faale-agaga" (tusi lesona a le tagata aoga, 157). Fai atu ia i latou e saili le faamatalaga


o loo i luga ma ia vaseina lalo (i. 159, kolumna 2). Talanoaina pe faapefea ona avea mataupu faavae faale-faaipoipoga ma vaega o o tatou olaga, e ala i le faa-oagaina o le fautuaga a Elder Scott.

O A MEA E AOAO ATU

Pe a o'o ina amata ona tatou vaai atu i le faaipoipoga mai le silafaga a le Alii, o lo tatou manao e ausia se faaipoipoga faavavau o le a faateleina.

FAUTUAGA I AUALA E AOAO ATU AI

 **Talanoaga.** Tusi le ata lenei i luga o le laupapa (tagai i le tusi lesona a le tagata aoga, 86) ma fesili atu i se tagata o le vasega e faamatala le uiga o le vaaiga faavavau, e tusa ai ma le ata.



O a ni aafiaga o lenei ata i faaiuga fai faale-faaipoipoga ma faaleaiga i aso taitasi? Tuu atu i le afa o le vasega e faitau le "Tatalo mo le Manuia o Lau Faaiipoipoga" mai ia Elder Joe J. Christensen o le Au Peresitene o Fitugafulu o loo i le tusi lesona a le tagata aoga (303). Tuu atu i le isi afa e faitau le "O Le Liliu Atu i le Alii" mai ia Elder Robert E. Wells o le Fitugafulu (308). Valaaulia tagata o le vasega e tuuina mai o latou manatu i fautuaga o loo i totonu o nei faiatuga. O a auala faapitoa e aoga ai i ulugalii le sailia o le fesoasoaniga paia i a latou faaipoipoga?

O se vaaiga e faavavau o lona uiga o le faaaogaina o le malamalama na tuuina e le Atua i Lana fanau, e ala i tusitusiga paia ma perofeta. E silafia e le Tama Faalelagi lo tatou tuanai, taimi nei, ma le lumanai. O Lana silafaga faavavau e leai ni tapulaa faaletino. O le ata o le faaolataga e fesoasoani tatou te amata vaai ai e pei o Ia, ina ia mafai ai ona tatou faia faaiuga atamai ma amiontonu sili atu. Talanoaina mau nei:

- Alema 40:8. "E tusa le faavavau ma le aso e tasi i le Atua, a e na o tagata ua fuatia i ai aso."
- Mataupu Faavae ma Feagaiga 38:2. "Aua o mea uma e i luma o o'u mata."
- Mataupu Faavae ma Feagaiga 130:7. "O loo faaali ai mea uma mo lo latou mamalu, o mea tuai, o mea o i ai nei, ma mea lumanai ma o i ai pea lava pea i luma o le Alii."

Faitau ma talanoaina upusii eseese o loo i Aoaoga Filifilia mai le "Vaaiga e Faavavau" i totonu o le tusi lesona a le tagata aoga (86–87).

O A MEA E AOAO ATU

"E leai se mea i lenei lalolagi e tutusa le taua ma le foafoaga ma le faaatoatoaina o iunite faaleaiga."

FAUTUAGA I AUALA E AOAO ATU AI

 **Talanoaga.** Faitau le saunoaga a Elder Bruce R. McConkie o loo i le Vaaiga Aoao Faale-Aoaoga Faavae i le amataga o lenei lesona, ma tusia le fuaiupu faaiu o lana saunoaga i luga o le laupapa. Fesili atu: O a nisi o aoaoga i le ata o le faaolataga e lagolagoina le faamatalaga a Elder McConkie? Fesoasoani i tagata o lau vasega e sue ia maua na aoaoga e pei o:

- O i Tatou Uma Lava o Fanau a le Atua. O Ia o le Tama o o tatou agaga. Ua faia i tatou "e pei" o le Atua (tagai i le Mose 6:67) ma ua i ai le mana e avea ai faapei o o tatou matua faalelagi.

- Na tatou o mai i lenei lalolagi e maua se tino faitino ma faamaonia le usitai i "mea uma e poloaiina ai i latou e le Alii lo latou Atua" (Aperaamo 3:25). "O le Atua lava ia, ina ua i ai o Ia i le lotolotoi o agaga ma le mamalu, aua sa sili lona poto, na vaai atu ua tatau ona faia tulafono ina ia mafai ai e agaga na totoe, ona maua se avanoa e agai ai i luma e faapei o Ia" (Iosefa Samita, i le *History of the Church* 6:312).
- E ala i le Togiola a Iesu Keriso, ma i le mulimuli ai i Ana poloaiga, e mafai ona tatou toe nonofo faatasi ma lo tatou Tama Faalelagi ma avea faapei o Ia: "O lea, e pei ona tusia, o i latou o ni atua, o atalii lava o le Atua" (MF&F 76:58).
- O le foafoaga o le lalolagi na saunia ai se nofoaga mo i tatou e maua ai le poto masani faaletino, ma aoao ai e avea faapei o o tatou matua faalelagi. E tusa ai ma le faaipoipoga, faitau faatasi le Mataupu Faavae ma Feagaiga 49:16–17.

O A MEA E AOAO ATU

O le Folafolaga i le Aiga, e fesoasoani ia i tatou e malamalamai i le taua o le faaipoipoga e faavavau ma le olaga faaleaiga.

O A MEA E AOAO ATU

O se vaaiga e faavavau i le ata o le faaolataga e uumai aia o tatou mafaufauga, lagona, ma amioga i le faaipoipoga.

FAUTUAGA I AUALA E AOAO ATU AI

 **Talanoaga.** I le aso 23 o Setema 1995, na faitauina ai e Peresitene Gordon B. Hinckley i tuafafine o le Aualofa se folafolaga e uiga i le taua o le aiga i le ata o le faaolataga. Faitau faatasi le palakalafa muamua o le "O Le Aiga: O Se Folafolaga i le Lalolagi" (tusi lesona a le tagata aoga, 89).

Faitau pe faamatala le tala o loo i le saunoaga a Elder Henry B. Eyring "O Le Aiga," lea na ia faamatalaina ai ona tausaga i le iunivesite, na nofo ai i le fale mautotogi o Mrs. Soper (tusi lesona a le tagata aoga, 111). Faamamafa atu "e ao ona ia i tatou le sini faamoemoeina ia le gata i o tatou mafaufau, ae faapea foi i o tatou loto. O le mea tatou te mananao i ai o le ola e faavavau i aiga. E le faapea na o lo tatou mananao i ai, ona o le mea lena ua mafai, pe tatou te mananao i se mea o loo agaigai atu i le ola e faavavau. Tatou te mananao i le ola e faavavau, po o le a lava le tau o taumafaiga, tiga, ma le ositalaulaga" *Ina ia Latalata Atu i le Atua*[1997], 161; po o le tusi lesona a le tagata aoga, 112).

FAUTUAGA I AUALA E AOAO ATU AI

 **Faataitai ona Faatino.** Faamatala atu o tane ma ava e masani ona eseese o latou manatu e uiga i faaiuga e ao ona fai. Pe a tutupu na eseesege, e masani lava ona tolu auala e filifilia e ulugalii faaipoipo: (1) E lolo atu le manatu o le ava, ona faia lea i le ala a le tane. (2) E lolo atu le manatu o le tane, ona faia lea i le ala a le ava. (3) E fetuutuunai le tane ma le ava, ma maua ai se vaifofo e faamalieina uma ai i lau.

I se faaipoipoga faavavau, e i ai le auala lona fa e mafai ona fesoasoani e aumaia le filemu ma le lotogatasi i le faaipoipoga. O tagata taitoatas i le paaga, e saili ia malamalamai mataupu faavae ua aoaoina i le ata o le faaolataga ma aoao ai, e ala i le suesue ma le faatuatua, le finagalo o le Alii. O tagata uma o le paaga, ua naunau e ositalaulaga pe fetuutuunai o laua lava manao ina ia usitai i le Alii. E mafai ona i ai le lotogatasi mo ni tagata se toalua e i ai vaaiga eseese, pe a latou faaaogaina se vaega masani o mataupu faavae o le talalelei.

Tuuina atu le tulaga faataitai lenei i le vasega: O Pili ma Susana ua lua nei tausaga talu ona faaipoipo. Ua faauu Pili mai le iunivesite, ma o lea ua maua lana uluai galuega. Ua manao Pili i se taavale fou, ma ua talanoa atu ia Susana. Ua faapea atu Susana o ia e manao i se pepe, ma e le gafatia e i laua le faia o se taavale ma se pepe i le taimi lenei.

Valaaulia se ulugalii e faataitai ona faatino ia matafaiioi a Susana ma Pili. Faatonu i laua e amata le faatinoga e ala i le faailoa mai o o laua tulaga, ma taumafai malosi ina ia malo i o laua manatu faaali. Ona fai atu lea e galulue agai i se fetuutuunaiga, lea e taufai maua ai se vaega o mea o loo mananao i ai. (Mo se faataitaiga, "O le a ta faatauina se *taavale* tuai ma *faatali* mo sina taimi a o le i maua se pepe.") Ona toe faatino lea o le tala, e ala i le fai atu ia i laua e foia le faafitauli e ala i le faaaogaina o se *vaiga e faavavau*. Valaaulia le vasega e fesoasoani ia i laua e ala i le sailia o mea na saunoa ai taitai o le Eklesia e uiga i le mataupu (tagai i le tusi lesona a le tagata aoga, 295–301). Fesuiai ni ulugalii o le vasega e faatino vaega nei. Aotele a latou faaiuga i luga o le laupapa.

Mataupu	Vaaiga a le Tane	Vaaiga a le Ava	Fetuutuunaiga	Silafaga e Faavavau a le Alii
Faatau o se taavale fou, po o le i ai o se pepe?				

Faaiu le faataitaiga o le faatinoga e ala i le faaali atu o le auala e fesoasoani ai le malamalamama ma le faaaogaina o mataupu faavae o le talalelei, e faateleina ai le lotogatasi ma faamanino faaiuga fai.

Mo se isi auala, fau sa oe lava tulaga faataitai mo le vasega e galulue ai, po o le fai i le vasega e faailoa mai se mea e masani ona tupu i ulugalii talavou i a latou lava aganuu.

 **Talanoaga.** Tufatufa atu le tufaaga 1, "O Se Faatusatusaga o Manatu," o loo maua i le faaiuga o lenei lesona (itu. 7–8). Ia piki mai ni mataupu se lua po o le tolu mai le koluma i le itu agavale, ma tusi i luga o le laupapa. Faamalamalamama atu o nei mataupu e suitulaga i le tele o autu o le a outou talanoaina i le Mataupu Faalelotu 235. Fai atu i tagata o le vasega e faailoa faapuupuu mai tulaga masani e uiga i nei mataupu i o latou nuu, po o le lalolagi foi. Mai se vaaiga faaletalalelei, faamata o le a le taunuuga o vaaiga taatele taitasi? Fai atu i tagata o le vasega e faatusatusa nei vaaiga agai i mea o loo aoao mai i le ata o le faaolataga. O a faamaniuga folafolaina e mulimuli mai i vaaiga taitasi? A o faagasolo le talanoaga, fai atu i tagata o le vasega e tusia faamatalaga i a latou pepa.

FAAIUGA

Faasoa atu le faamatalaga lenei mai ia Peresitene Harold B. Lee: "O mataupu faavae o le talalelei ma sauniga uma, ua na o ni valaaulia i le aoaoina o le talalelei e ala i le faataitaia o ona aoaoga" (*The Teachings of Harold B. Lee* ed. Clyde J. Williams [1996], 619).

Faamamafa atu e sili ona lelei lo tatou aoaoina o mataupu faavae o le talalelei e ala i le mulimuli ai. Ina ua aoao mai e le Faaola le faataoto i le Samaria Agalelei, na Ia faaiuina i Lona faapea atu i Ona soo "Ina alu ia, ma ia e faapea ona fai" Luka 10:37 tagai foi Iakopo 1:27 O mataupu faavae o le Talalelei, e ao ona avea ma faavae mo sootaga faale-faaipoipoga e totonugalemu-ai-Keriso. Ia uunaia tagata o le vasega ina ia avea mataupu faavae o le talalelei ua aoaoina i lenei vasega ma vaega o o latou olaga, e ala i le faaaogaina i a latou faaiuga i faaipoipoga.

Tufaaaga 1 • O Se Faatusatusaga o Manatu

Mataupu	Vaaiga Taatele	Taunuuga	Vaaiga i le Ata o le Faaolataga	Taunuuga
Faaipoipoga i le Va o Faatuatuaga				
Nonofo faatasi ae le i faaipoipo				
O le a le taimi e tatau ai ona maua fanau				
O le aofai o fanau e manaomia				
Tuuto atu i le faaipoipoga				
O le taua o le lotu				
Atiina ae o se uiiga faa-Keriso				
Sauaina o le toalua ma fanau				
Laulauvavale ma gagana masoa				
Faaaaloalo mo le toalua				

Mataupu	Vaaiga Taatele	Taunuuga	Vaaiga i le Ata o le Faaoalataga	Taunuuga
Tina e faigaluega				
Taulimaina o tupe				
O le taua o le auauana atu				
O le taua o le ositaulaga				
Faapaleniina o mea e faamuamua				
O matafaioi a alii ma tamaitai				
Faataunuina o tulaga manaomia o le tasi ma le isi				
Faamaoni a'la'i i le faaipoipoga				
Tuuto atu i le faaipoipoga i taimi o faigata				
O le faatuatuaina				

2 O LE OLIOLI O LE FAAIPOIPOGA

VAAIGA AOAO FAALE-AOAOGA FAAVAE

“O le fiafia i le faaipoipoga ma tiute faamatua, e mafai ona faitauafe taimi e sili atu ai nai lo se isi lava fiafiaga” (James E. Faust, i le Conference Report, Oke. 1977, 14; po o le *Liahona*, Nov. 1977, 8).

“O le faaipoipoga e mafai ona sili atu lona tulaga fiafia e faavavau, nai lo le mea e mafai ona mafaufauna e le tagata soifua” (Spencer W. Kimball, “O le Tasi i le Faaipoipoga,” *Liahona*, Mati 1977, 3; tagai foi i le “Marriage and Divorce,” i le *1976 Devotional Speeches of the Year* [1977], 146).

“O tautoga o le faaipoipoga e faia i totonu o nei nofoaga paia ma feagaiga paia e osia mo le taimi nei ma le faavavau atoa, o faamaoniga ia i le tele o faaososoga o le olaga lea e taumafai e talepe aiga ma faaumatia le fiafia. ...

“O alii ma tamaitai talavou agavaa o le Au Paia o Aso e Gata Ai, o e amatalia le olaga faatasi, o le a iloaina o a latou paaga e faavavau i lalo o le feagaiga faavavau, e avea ma faavae e fausia ai le filemu, fiafia, amioatua, alofa, ma isi tulaga e faavavau o le olaga, iinei ma le isi olaga” (Heber J. Grant, “Beginning Life Together,” *Improvement Era*, Apr. 1936, 198–99).

MATAUPU FAAVAE

Pe a usitaia e ulugalii mataupu faavae o le talalelei lea e taitai atu ai i le fiafia faaulugalii, e mafai e le faaipoipoga ona aumaia se “tulaga faavavau sili atu nai lo le mea e mafai ona mafaufauna e le tagata soifua.”

FAITAUGA MAI LE TUSI LESONA A LE TAGATA AOGA

Aoaoga Filifilia mai le “O Le Fiafia i le Faaipoipoga” (141–43)

“O Le Aiga: O Se Folafolaga i le Lalolagi,” o le Au Peresitene Sili ma le Korama a Apostolo e Toasefululua (89–90)

O A MEA E AOAO ATU

E mafai ona maua faaipoipoga ma aiga fiafia, maufetu'unai, ma tumau i aso nei.

FAUTUAGA I AUALA E AOAO ATU AI

 *Gaoioiga faale-tusitusiga paia.* Valaaulia tagata o le vasega e tau mai ni mau o loo faailoa ai e mafai ona tupu lena fiafia i le faaipoipoga, ma e taua ona sailia. E mafai ona fesoasoani mau ma fesili nei i la outou talanoaga:

- Failauga 4:9–12. Aisea e sili atu ai le faaipoipo nai lo le nofotoatasi?
- Failauga 9:9. O le a le mea ua faamoemoeina e le Alii mai ia i tatou i le faaipoipoga?
- Mataupu Faavae ma Feagaiga 49:15–17. Aisea na foafoa ai le lalolagi?
- 2 Nifae 2:25. O le a le faamoemoega e tasi o lo tatou foafoaga? (Ina ia maua le olioli.)

Fesoasoani i tagata o le vasega ia malamalama, o le sailia o se faaipoipoga ma le aiga e mafai ona faavavau, o se tasi o taumafaiga sili o le olaga faaletino.



Tusi lesona a le tagata aoga. O nisi i le lalolagi ua aoao mai o le faaipoipoga ma aiga ua le toe aoga ma ua le toe aumaia ai le fiafia. Valaaulia tagata o le vasega e faitau le “O Le Faaipoipoga e Aumaia le Fiafia ma le Olioli” o loo i le tusi lesona a le tagata aoga (141–42) ma ototo mea ua aoao mai e perofeta a le Atua e uiga i le fiafia i le faaipoipoga ma le aiga. Talanoaina fesili e pei o fesili nei:

- E tusa ai ma le saunoaga a Peresitene Kimball, aisea ua avea ai le faaipoipoga ma faaiuga atonu e sili ona taua i faaiuga uma tatou te faia?
- O a mafuaaga ua tuuina mai e Elder Boyd K. Packer mo le faatumauina o le faatuatua i le faaipoipoga?
- E tusa ai ma le saunoaga a Elder Bruce R. McConkie, aisea e taua ai le tuufatasia e avea ma tino e tasi i le Alii?
- E tusa ai ma le matau a Elder James E. Faust, aisea e te manatu ai ua taumafai le tele o tagata e sailia le fiafia e ala i le taulai atu i mea o lenei lalolagi, nai lo se faaipoipoga e faavavau?

Faaiu e ala i le faapea atu e mafai lava ona maua le fiafia i le faaipoipoga. O lenei fiafia ua i ai le mana e mafai ona avea ma atoatoaga o le olioli i le faavavau atoa.

O A MEA E AOAO ATU

E manao Satani e tao-fia le fuafuaga sili o le fiafia a le Atua.

FAUTUAGA I AUALA E AOAO ATU AI



Tusi lesona a le tagata aoga. Afai o la tatou sini o le mauaina o se faaipoipoga e faavavau, e taua le malamalama i mana o loo galulue faasagatau mai i ai. I le 1900 i le Iunaite Setete, sa tasi le faaipoipoga e tatala mai faaipoipoga e sefululu. E o’o mai i le tausaga e 2000, o lenei fua faatatau ua tusa e tasi le faaipoipoga e tatala mai faaipoipoga tailua uma. O suiga mo faaipoipoga tatala ua tali tutusa lava i le tele o atunuu i le lalolagi atoa (tagai i le tusi lesona a le tagata aoga, 179, 188, 196).

Tuu atu i tagata o le vasega e su’e i le “E taumafai Satani e Lepeti le Fiafia” i totonu o le tusi lesona a le tagata aoga (142). Faitau le saunoaga a Elder Boyd K. Packer e uiga i le faamoemoega e tasi o Lusifelo (143), ma talanoaina fesili e pei o fesili nei:

- E tusa ai ma le saunoaga a Elder Packer, aisea e taumafai malosi ai Satani e faaumatia ia faaipoipoga ma aiga?
- O a taunuuga pe a manumalo o ia?

Faitau le saunoaga a Peresitene Gordon B. Hinckley i totonu o le tusi lesona a le tagata aoga (142). Talanoaina fesili e pei o nei:

- O a suiga ua lapataia ai i tatou e Peresitene Hinckley?
- O a mea e mafai ona faia e taofia ai ia ituaiga faafitauli?

Talanoaina pe faapafea ona faatatau le saunoaga lenei a Peresitene Spencer W. Kimball i le faaipoipoga e faavavau: “O Satani, o se agaga tutoatasi e matua moni lava lona tulaga, ae leai sona tino. O ona manaoga ia faamaufaailogaina i tatou taitoatasi e avea ma ona soo, ua le itiiti ifo i lona manao e faia le amioleaga, nai lo lo tatou Tama i le amiontonu, ina ia faatosina atu i tatou i Lona lava malo e faavavau” (*The Teachings of Spencer W. Kimball*, ed. Edward L. Kimball [1982], 35).

O A MEA E AOAO ATU

O faaipoipoga fiafia o se taunuuga o le tausia o tulafono ua faatulagaina mo faamanuiaga mo se faaipoipoga fiafia.

FAUTUAGA I AUALA E AOAO ATU AI

 **Talanoaga.** Talanoaina pe faapefea ona fesootai aoaoga nei ma le faaipoipoga e faavavau:

“E i ai se tulafono, na folafola le maaveesea i le lagi i luma atu o le faavaega o le laloagi lenei ua faavae ai i luga faamanuiaga uma—

“Ma a tatou maua se faamanuiaga mai le Atua, e maua i le usiusitai i lena tulafono ua faavae ai i luga” (MF&F 130:20–21).

“O le fiafia o le sini autu ma le mamanu o lo tatou olaga, ma o le iuga lena, pe a tatou tulimataia le ala e tau atu i ai” (*Teachings of the Prophet Joseph Smith*, 255).

Pe a sailia soo se faamanuiaga lava, e taua le aoao ma faaaoga mataupu faavae e o faatasi ma lena faamanuiaga. E matua moni lava lena mea i le faamanuiaga o se faaipoipoga fiafia. O lenei kosi ua faatulagaina i luga o le tulaga e mafai ai ona tatou maua mataupu faavae sa’o lea e taitai atu ai i faaipoipoga fiafia i totonu o tusitusiga paia ma aoaoga a perofeta soifua.

 **Galuega fai faavaega.** Tagai i le lisi o mau i lalo o le “Suesue i Tusitusiga Paia” i le vaega “O Le Fiafia i le Faaipoipoga” o le tusi lesona a le tagata aoga (142).

Tusi le faamatalaga lea mai le “O Le Aiga: O Se Folafolaga i le Lalolagi” i luga o le laupapa: “E maua le fiafia i le olaga faaleaiga pe a faavae i aoaoga a le Alii o Iesu Keriso.” Faamatala atu o tusitusiga paia ma aoaoga a perofeta soifua o nofoaga sili ia e maua ai aoaoga a Iesu Kerio e faatatau i le faaipoipoga ma le aiga.

Vaevae le vasega i ni vaega ma tuu atu i ai mau mai le lisi o loo i le tusi lesona a le tagata aoga. Fai atu i vaega taitasi e saili se mataupu faavae e mafai ona faaaogaina i se sootaga faale-faaipoipoga. Ia fai atu foi i vaega e faamatala pe faapefea ona faateleina le avanoa e ausia ai le tulaga manuia i le faaipoipoga ona o lea mataupu faavae. A mae’ a nai minute mo talanoaga a vaega, fai atu i vaega taitasi e tuuina mai mea na latou talanoaina. O tali atonu e aofia ai tali ua lisi atu i lalo:

- Iopu 6:25. Afai tatou te tautatala i se auala faa-Keriso, o le a tele atu le avanoa tatou te maua ai le fiafia i le faaipoipoga.
- Faataoto 15:1. O le onosai ma le loto pulea e ono faatupuina ai le fiafia i le faaipoipoga.
- Mataio 12:34–37. O fesootaiga faa-Keriso e sau mai se loto faa-Keriso.
- 1 Nifae 1:20. E ala i le usiusitai ma le faatuatua ia Iesu Keriso, e mafai ai ona tatou aloese ma ono laveaiina mai le tele o faigata lea e faaleagaina ai faaipoipoga i aso nei.
- 3 Nifae 18:19–21. E mafai ona faamalolosia aiga ina ia teena ai faaososoga a Satani e ala i le tatalo faatasi.
- Alema 41:10. O le amioleaga i totonu o faaipoipoga e le taunuu lava i le fiafia. O le amiontonu e sili atu ona faateleina ai o tatou avanoa e maua ai le fiafia i le faaipoipoga.
- Mataupu Faavae ma Feagaiga 42:22. Pe a tatou faamaoni ma tuuto atu i o tatou taitoalua ma feagaiga o le talalelei, o le a faateleina lo tatou avanoa mo se faaipoipoga fiafia ma tumau.

- Mataupu Faavae ma Feagaiga 42:23. O le mulilua ma mafaufauga tau i le mulilua e mafai ona faaleagaina ai faaipoipoga.
- Mataupu Faavae ma Feagaiga 50:28. O le atoatoa i le faaipoipoga, e tatau lava ona muamua ai le faapaiaina mai agasala uma.

Talanoaina nisi mau faaopoopo a oe lava ia, pe fautuaina mai foi e tagata o lau vasega. Tau atu i tagata o le vasega, e na o nai mataupu faavae laiti nei e uiga i le faaipoipoga ma le aiga o loo i ai i tusitusiga paia. Ia uunaia tagata o le vasega e vaai mo ia mataupu faavae i a latou suesuega o tusitusiga paia i aso taitasi.



O le tulafono o molimau. Faitau le saunoaga a Elder Henry B. Eyring i le faa-iuga o le vaega "O Le Fiafia i le Faaipoipoga" i totonu o le tusi lesona a le tagata aoga (143). Talanoaina fesili nei:

- O fea tatou te liliu atu i ai mo le saogalemu i nei taimi faigata ma le matautia?
- O le a le tulafono o molimau, ma pe faapefea ona fesoasoani e laveaiina faaipoipoga?

Faamalamalama o autu ma faitauga i lenei kosi, o loo faaaogaina le ala o le tulafono o molimau. Afaia ua tuuina mai e nisi o perofeta fautuaga i se autu e fesoo-tai i le faaipoipoga, ua aofia ai i lenei vasega. A o tatou faaaogaina a latou aoaoga e uiga i le mea o loo manaomia ina ia maua ai faaipoipoga fiafia ma mausali, o le a tatou maua faamanuiaga folafolaina.



Vaaiga Lautele o le Kosi. Afai e te le i faia, ia tufa atu i tagata o le vasega se kopi o le "Faitauga mai le Tusi Lesona a le Tagata Aoga" o loo i le amataga o lenei tusi lesona (itulau. viii-x). Ia muai vaai i lesona ma faitauga o le a oo i ai. Tuu atu le molimau e uiga i le mana o le lelei e o'o mai i le suesueina o aoaoga a perofeta. Ia fai atu i tagata o le vasega e ao ona faamae'aina ia faitauga a o le i o mai i vasega taitasi.

FAAIUGA

Toe faamanatu le saunoaga a le Perofeta o Iosefa Samita e uiga i le fiafia mai le gaoioiga faale-talanoaga o loo i luga (tagai i le i. 11). Faamalamalama atu e mafai ona tatou maua le fiafia moni i le faaipoipoga i lenei olaga, e ala i le aoaoina ma le ola ai i mataupu faavae sa'o, faapea foi le sailia o le aafiaga a le Agaga Paia i totonu o a tatou faaiuga fai faale-faaipoipoga. Afai tatou te ola ai i nei mataupu faavae, o le a faateleina le avanoa e ausia ai le fiafia i le faaipoipoga, e le gata i lenei olaga, ae faapea foi le isi olaga.

3 O LE TAUSIAINA O LE FEAGAIGA PAIA O LE FAAIPOIPOGA

VAAIGA AOAO FAALE-AOAOGA FAAVAE

O le mau lenei, o loo faailoa mai ai le taua tele o sauniga o le perisitua, ma feagai-ga e o faatasi ai: “O lea, o ona sauniga, ua faaalia ai le mana o le faale-atua.

“Ma a aunoa ma ona sauniga, ma le pule o le perisitua, e le faaalia mai le mana o le faale-atua i tagata i la le tino” (MF&F 84: 20–21).

O le osia ma le tausia o feagaiga e totonugalemu i le agavaa ai mo faamanuiaga e faavavau.

MATAUPU FAAVAE

O le usitaia o feagaiga na osia i le taimi o sauniga paia, e faateleina ai le mana o le amioatua i totonu o a tatou faaipoipoga.

FAITAUGA MAI LE TUSI LESONA A LE TAGATA AOGA

Aoaoga Filifilia mai le “Feagaiga ma Sauniga” (40–42)

Aoaoga Filifilia mai le “Tatalaina o Faaipoipoga” (77–78)

“O Le Agaga Paia o le Folafolaga” (144)

“Feagaiga o le Faaipoipoga,” Elder Bruce C. Hafen (49–52)

Ia Manatua: O lenei lesona atonu e sili atu i le tasi le vasega e aoaoina ai.

O A MEA E AOAO ATU

O le mana o le Atua ua avanoa i tagata e ala i feagaiga paia ma sauniga. O lenei mana e mafai ai ona faavavau ia mafutaga.

FAUTUAGA I AUALA E AOAO ATU AI

 **Talanoaga.** Fesili atu: O le a se mea e mafai ona faia e le tane ma le ava, ina ia tausia ai la laua tautinoga i la laua feagaiga o le faaipoipoga i o la olaga atoa?

 **Talanoaga.** Valaaulia tagata o le vasega e faitau ma talanoaina le uiga o le “feagaiga” i totonu o le Bible Dictionary “Covenant”(i. 651). O fesili nei atonu e fesoasoani ai:

- E faapefea ona e faamatalaina le *feagaiga*?
- O ai e faatulagaina tuutuuga o se feagaiga ma le Atua?
- O a mea a feagaiga e fai i mataupu faavae ma sauniga o le talalelei?
- O a auala e fesoasoani ai feagaiga ia i tatou e ola i le talalelei?

Faamalamalama atu, i se feagaiga i le va o le Atua ma le tagata, e tauaveina e itu uma e lua ni matafaioi, ma e maua foi e itu uma e lua se mea aoga. Ia tusia le siata lenei i luga o le laupapa, e aofia ai na o ulutala matamata tetele. Fai atu i tagata o le vasega e faailoa mai po o a mea e tusi i kolumna taitasi.

	Matafaioi	Aoga
Atua	Na te tuuina mai le faamanuiaga folafolaina.	Na te taliaina le tagata po o le ulugalii e toe foi atu i Lona afioaga, aua o Lana galuega ma Lona mamalu lea (tagai i le Moses 1:39).
Tagata	Tatou te tausia tuutuuga na faatulagaina mai e le Atua i totonu o le feagaiga.	Tatou te mauaina faamanuiaga folafolaina.

Iloilo ma talanoaina le Mataupu Faavae ma Feagaiga 84:20–21.

E tusa po o le a lo tatou naunau po o le faamaoni, na pau lava le ala tatou te maua ai faamanuiaga o le faavavau, o le mauaina lea o sauniga ma le tausia o feagaiga e o faatasi ai.


Faasoa atu le faamatalaga lenei: “I totonu o le Eklesia, o le upu *sauniga* e masani ona faatatau i sauniga faalelotu ma sauniga na tuuina mai e le Alii ia i tatou mo lo tatou faaolataga, taitaiga, ma le mafanafana. ... O nei sauniga, o gaoioiga faaletino e suitulaga i mea faaleagaga. E ala i lo tatou auai i nei mea, tatou te mauaina ai le mana faaleagaga lea tatou te manaomia e suia ai o tatou olaga” (*Tiute ma Faamanuiaga o le Perisitua: Tusi Lesona Faavae mo e Umia le Perisitua*, Vaega E[2000], 27).

Tusi le ata lenei i luga o le laupapa:



Valaaulia tagata o le vasega e faamatala le ata e pei ona faatatau i le faaipoipoga faalemalo, ma talanoaina a latou tali. (Mo se faataitaiga, o fulu aū e mafai ona faatusa i le alofa ma le lagolagosua e tuuina atu e paaga faaipoipo, o le tasi i le isi, ma le laina e mafai ona faatusa i le matafaioi a le tasi i le isi.) O le a le pule e manaomia ina ia aoga ai le faaipoipoga faalemalo?

Tusi se ata lona lua e pei o le ata lenei:



Toe valaaulia tagata o le vasega e faamatala le ata ma talanoaina a latou tali. (O fulu aū o loo agai i lalo e mafai ona faatusa i le pule a le Atua, o poloaiga, o le Togiola, ma isi mea faapena. O fulu aū agai i luga, e mafai ona faatusa i le usi-usitai ma tatalo a le ulugalii.)

- Aisea e tatau ai ona faamaonia e le Atua ia feagaiga e faavavau?
- E faapefea ona tatou mautinoa ua avea le Atua ma se tasi o itu i feagaiga tatou te osia?

Faamalamalama atu, pe a tatou osia le feagaiga fou e faavavau o le faaiopoipoga, o le tuufatasiga ua sili atu nai lo se feagaiga faalemaloo. O na sauniga i le malumalu, e taitaiina atu ai tatou i le lagi, a o avea le Atua ma paaga i a tatou feagaiga. O nei sauniga, e mafai ona fesoasoani ia i tatou ia maua se vaaiga e faavavau o a tatou faaiopoipoga, ma sili atu ai lo tatou tuuto o le tasi i le isi, faapea foi i le Atua.

Na aoao mai Elder Dallin H. Oaks o le Korama a Aposetolo e Toasefululua: "O mea taua e faamuamua e le Au Paia o Aso e Gata Ai e lua ona vaega: Muamua, tatou te saili ia malamalamala i la tatou sootaga ma le Atua le Tama Faavavau ma Lona Alo, o Iesu Keriso, ma faamautuina lena sootaga e ala i le mauaina o sauniga faaola ma le tausia o a tatou feagaiga faaletagata lava ia. Lua, tatou te saili ia malamalamala i la tatou sootaga ma tagata o o tatou aiga, ma faamautuina na sootaga e ala i sauniga o le malumalusa, atoa ai ma le tausiaina o feagaiga tatou te osia i lena nofoaga paia. O nei sootaga, e faamautuina i le ala e pei ona ou faamalamalamaina atu, maua faamanuiaga faavavau ia e le maua i se isi lava ala. E leai se tuufatasiga faasaienisi, manumalo, meatotino, mitamitaga, lauiloa, po o le malosi e mafai ona aumaia nei faamanuiaga e faavavau!" (i le Conference Report, Ape. 1990, 62; po o le *Ensign*, Me 2001, 84).

E mafai faapefea e ulugali faaipoipo ona tausia nei mea faamuamua e lua ia sili ona taua i o latou olaga?

Toe iloilo faapuupuu le faamatalaga mai le siata "Faaipoipoga Faaselesitila" o loo i le tusi lesona a le tagata aoga (48).

O A MEA E AOAO ATU

*O le mana e maua e
ala i feagaiga paia, e
mafai ai e ulugali ona
avea faapei o o latou
matua faalelagi.*

FAUTUAGA I AUALA E AOAO ATU AI

 **Talanoaga.** Faitau le Mataupu Faavae ma Feagaiga 130:20–21.

- O a tulaga ua faavasegaina ai faamanuiaga a le Alii? (Usiusitai i tulafono ia e autu ai.)
- Pe a folafola mai e le Alii mo i tatou ni faamanuiaga faapitoa e avea o se vaega o se sauniga tatou te faatinoina, o le a le mea e ao ona tatou faia e maua ai na faamanuiaga?
- Faitau le Mataupu Faavae ma Feagaiga 136:4. O le a le auala e fesoasoani ai le savali "i sauniga uma a le Alii" ia i tatou e agavaa ai mo le ola e faavavau? (I le avea ai o se vaega o nei sauniga, tatou te osifeagaiga e faia mea uma e tatau ai e ulufale atu ai i le afioaga o o tatou matua faalelagi, o suli i lo la'ua malo.)

Na saunoa mai Sister Patricia T. Holland e faapea: "O feagaiga, e le gata ina tatou tautino atu ai lo tatou mausali i lo tatou faatuata i le Atua, ae latou te faamanatu mai foi ia i tatou o le Atua o le a le maluelue i Lona faamaoni ia i tatou. Ma e ui atonu tatou te faaletonu ma faia mea sese, e le faaletonu lava o ia. Na te le faia lava se mea sese. E tumau lava Lona faamaoni ia i tatou. O le matagofie ma le mamalu lena ua faatumauina i totolu o feagaiga tatou te faia ma le Atua" ("Considering Covenants: Women, Men, Perspective, Promises," i le *To Rejoice as Women: Talks from the 1994 Women's Conference*, ed. Susette Fletcher Green and Dawn Hall Anderson [1995], 99–100; po o le tusi lesona a le tagata aoga, 41).

 **Talanoaga.** Na faamalamalama mai e Elder M. Russell Ballard o le Korama a Aposetolo e Toasefululua le auala e fesoasoani ai le malamalamala ma le manatua-inia o feagaiga paia ia i tatou ia agavaa ai mo faamanuiaga folafolaina a le Atua:

“O se iloiloga faavaitaimi o feagaiga ua tatou osia ma le Alii, o le a fesoasoani ai ia i tatou i mea tatou te faamuamua, ma ia paleni o tatou olaga. O lenei iloiloga, o le a fesoasoani tatou te iloa ai mea e ao ona salamo ai, ma suia o tatou olaga ina ia mautinoa ua tatou agavaa mo folafolaga ua tuuina mai faatasi ma a tatou feagaiga ma sauniga paia. O le galueaiina o o tatou lava faaolataga, e manaomia ai le fuafua lelei ma se taumafaiga patino ma lototele” (i le Conference Report, Ape. 1987, 15; po o le *Liahona* Me 198714 tusi lesona a le tagata aoga, 42).

- O a sauniga paia o le faaolataga lea na saunoa i ai Elder Ballard?
- O a mea ua tatou osifeagaiga ai ma le Atua ua avea ma se vaega o nei sauniga taitasi?
- O le a le mea ua folafola mai e le Alii ia i tatou i sauniga taitasi?

A mae'a ona tuuina mai tali a tagata o le vasega, valaaulia i latou e faatusatusa a latou tali ma le faamatalaga o loo i le “O la Tatou Sootaga e Faavae i Feagaiga ma le Alii” (tusi lesona a le tagata aoga, 42–48). O le kolumna muamua ua faaali mai ai lē e ana le pule e faia ai le sauniga. O le kolumna lua ma le tolu, o loo iloilo ai folafolaga ua tatou faia ma le Atua, ma le mea ua la folafola mai ia i tatou. Toe iloilo faatasi ma tagata o le vasega ia feagaiga e taitai atu ai i le faaipoipoga e faavavau, ma valaaulia tagata o le vasega ina ia mafaufau loloto i lo latou faamaoni i le tausiga o ia feagaiga.

 **Talanoaga.** O le a le auala sili e iloa ai ua tausia e se tasi o le ulugalii ana feagai-ga e faavavau o le faaipoipoga?

Fesoasoani i tagata o le vasega ia malamalamo o le auala sili e iloa ai, o le tulaga lelei latou te faamamaluina ai a latou feagaiga i le taimi nei, e aofia ai le papati-soga, tautoga ma le feagaiga o le perisitua, ma le faaeega paia pe afai ua uma ona faia na sauniga.

Toe iloilo le vaega mulimuli o le faaipoipoga e faavavau i le “O La Tatou Sootaga e Faavae i Feagaiga ma le Alii” (tusi lesona a le tagata aoga, 48). Fesili atu po o le a le mea tatou te osifeagaiga e fai, pe a tatou faaipoipo i totonu o le malumalu. O le a le mea e folafola mai e le Alii, pe a tatou tausia a tatou feagaiga? Faailoa atu le tele o faamanuiaga e maua e i latou o e osia ma tausia feagaiga paia.

O A MEA E AOAO ATU

O le tausia o feagaiga tatou te maua ai le mana e valaau atu ai i le lagi mo le fesoasoani i a tatou faaipoipoga ma aiga.

FAUTUAGA I AUALA E AOAO ATU AI

 **Tusi Lesona a le Tagata Aoga.** E tele auala e mafai ai e le tausia o feagaiga ona faamanuiaina o tatou olaga. Su'e i Aoaoga Filifilia mai le “Sauniga ma Feagaiga” i le tusi lesona a le tagata aoga (40). Faitau ma talanoaina le faamatalaga mai ia Elder Boyd K. Packer o loo i le itulau 49 e faatatau i le mana o le sauniga o faa-mauga lea e fusia ai aiga.

 **Gaoioiga faale-tusitusiga Paia.** Toe iloilo mau nei ma faatatau i le auala e au-mai ai e le faamaoni le mana e puipuia ai aiga.

- Mosaea 26:15–20. O a auala e te manatu na faamamaluina ai e Alema le tau-toga ma le feagaiga o le perisitua?
- Mosaea 27:14. Na mafai faapefea e le faamaoni o Alema ona faamanuiaina ai lona aiga? (Na mafai ona ia tatalo “ma le faatuatua tele” e uiga i lona atalii o Alema le Itiiti ina ia “toe aumaia o ia i le malamalamo o le upu moni.”)
- Mosaea 28:5–7. Na faapefea e le sootaga a le tupu o Mosaea ma le Alii ona faamanuiaina ai lona aiga? (Ina ua fesiligia e ona atalii o ia pe mafai ona latou o i se misiona matautia i Sa Lamana, sa ia te ia le agavaa e fesili atu ma

maua mai se tali mai le Alii.) Toe iloilo le tala o le faataunuina o le folafolaga a le Alii i le Tupu o Mosaea (tagai i le Alema 19:22–23 E ui e le o faamoe moe lenei mamanu mo aiga uma ae o loo faaalia ai le mana o le faatuatua o le tasi tagata mo le manuia o le isi sui agavaa o le aiga.

- Alema 53:16–21; 56:45–48, 56. O le a le mea na faatatau i ai e atalii o Helamanu lo latou mana o le puipuga? Talanoaina pe faapefea ona maua lenei ituaiga mana i aso nei. E faapefea e le tausiaina o a tatou feagaiga uma, e ao-fia ai feagaiga e o faatasi ma le faaipoipoga e faavavau ona faateleina lo tatou tomai e faamanuiaina o tatou aiga?

O A MEA E AOAO ATU

Ua tuuina mai e perofeta soifua taitaiga e faatatau i le feagaiga fou e faavavau o le faaipoipoga.

FAUTUAGA I AUALA E AOAO ATU AI

 *Galuega fai faavaega.* Ua fesoasoani mai perofeta o aso nei ia tatou malamalamai i le natura o feagaiga tatou te osia, pe a tatou faaipoipo i le malumalu. Su'e i Aoaoga Filifilia mai le "Sauniga ma Feagaiga" (tusi lesona a le tagata aoga, 38). Vaevae fesili nei i vaega o tagata o le vasega. Tuu atu ni nai minute e talanoaina ai tali, ona tuu atu lea o le avanoa e faailoa mai ai a latou saililiga i le vasega. (Mo se isi auala, talanoa faatasi ma le vasega ia fesili.)

- Peresitene Iosefa Filitia Samita (tusi lesona a le tagata aoga, 40). O le a le matafaioi e faatinoina e le Agaga Paia o Folafolaga i totonu o a tatou feagaiga e faavavau o le faaipoipoga? (tagai foi i Aoaoga Filifilia mai le "O Le Agaga Paia o le Folafolaga," tusi lesona a le tagata aoga, 144).

O le a le mea na aoao mai e Peresitene Samita e uiga i le aloese mai le tatalaina o faaipoipoga? O le a le mea na ia ta'u mai o le faasalaga a le Alii mo le solia o le feagaiga o le faaipoipoga e ala i le tetea? (tagai foi i Aoaoga Filifilia a Peresitene Gordon B. Hinckley ma James E. Faust, "Tatalaina o Faaipoipoga," tusi lesona a le tagata aoga, 77).

O a isi matafaioi na saunoa i ai Peresitene Samita, tatou te taliaina pe a tatou faaipoipo? O a faigata atonu tatou te feagai, a o tatou taumafai e faatinoina nei matafaioi?

- Elder Marion G. Romney (tusi lesona a le tagata aoga, 40–41). E tusa ma le iloiloga a Elder Romney, aisea e tatau ai ona tatou faatauaina a tatou feagaiga? O a auala tatou te faatalale ma manatu faatauvaa ai i nisi taimi e uiga i feagaiga paia ma sauniga?
- Elder Robert D. Hales (tusi lesona a le tagata aoga, 41). Aisea e faamoemoe mai ai le Alii ia i tatou ina ia tumau pea le alofa i o tatou taitoalua, e tusa pe i ai ni mea e uiga i a tatou faaipoipoga tatou te le o fiafia i ai? E faapefea e le naunau-taiga e faamamalu a tatou feagaiga ona fesoasoani ia i tatou i tulaga faapea?

- Elder Jeffrey R. ma Sister Patricia T. Holland (tusi lesona a le tagata aoga, 41). O le a le mana o feagaiga sa aoao mai e Elder ma Sister Holland?



Talanoaga. Faamalamalama atu le eseesege i le va o faaiipoipoga faakonekarate faale-malo ma faaiipoipoga faale-feagaiga e faavavau (tagai i le Elder Bruce C. Hafen, "Faaipoipoga Faale-feagaiga," tusi lesona a le tagata aoga, 49–52). Ia faaali atu eseesege, e ala i le tusia o se laina sa'o mai luga i lalo i le ogatotonu o le laupapa. Ia faaigoa le tasi itu "Faaipoipoga Faakonekarate," a o le isi itu "Faaipoipoga Faale-feagaiga." Faaaoga le saunoaga a Elder Hafen, e tusi ai e le vasega se lisi o mea e iloagofie ai faaiipoipoga taitasi, ma faatusatusa ma tuu eseese i vaega. O ulugalii faaiipoipo uma e tatau ona feagai ma faigata. O ulugalii e faaiipoipo i tulafono faalemaloo, atonu e le o i ai se vaauga e faavavau, lea e tuuina atu ai le mana i faaiipoipoga faale-feagaiga.

FAAIUGA

Atonu e te manao e tuuina atu lau molimau i le auala ua faamanuiaina ai lau faaiipoipoga ma lou aiga, ona o lou tausia o au feagaiga.

GALUEGA ATOFAINA MO LE LESONA 7

Tuu atu i tagata o le vasega le galuega atofaina lenei mo talafaasolopito o aiga. E faagata lenei galuega atofaina pe a e aoaoina atu le lesona 7, "Uputuu a Tuua," e masani lava e tusa ma le lua vaiaso.

Vaega 1. Ia faia se saililiga e te iloa ai se mea e uiga i mea na tutupu i soifuaga o ou tuua, e mafai ona aafia ai la oe lava faaiipoipoga ma le olaga faaleaiga. Aoao se mea e te le i iloaina muamua, a o le i faia lenei galuega. E mafai ona e faitauina talafaasolopito o aiga na tusia e ou auaiga, pe e te fesili atu foi i ou matua, matua o matua, po o uso ma tuafafine o ou matua, e faamatala mai ia te oe mea e uiga ese ma musuia na tutupu i le talafaasolopito o lou aiga. Tusi i lalo mea na e aoaoina mai, ina ia avea ma vaega o la oe lava talafaasolopito faaleaiga. Faamatala pe faapefea ona aafia ai la oe lava faaiipoipoga ma le aiga. Ia saunia e faasoa atu ou manatu i le vasega.

Vaega 2. Talanoa i ou matua, o isi tagata o le aiga, po o uo a le aiga. Fesili atu ia i latou pe i ai ni mea tutusa latou te matauina i amioga, mea e fiafia i ai, ma isi mea faapena, i le va o oe ma ou matua. Fesili atu ia i latou pe na i ai nisi o nei uiga i matua o ou matua.

Vaega 3. Ia faia se lisi o tulafono faaleaiga, ni faiga masani, ma ni tu ma aga na e matauina a o e tuputupu a'e. Fai se isi lisi o tulafono ma ni tu ma aga e te manao e faaauau i totonusi o lou lava aiga. Faailoa po o fea e te lagona o loo faavaeina i mataupu faavae o le talalelei.

O nei faiga masani ma tu ma aga atonu e faatatau i galuega, suesuega, tapu, taimi momoe, taumafataga, fonotaga faaleaiga, suesuega faaleaiga o tusitusiga paia, afiafi faaleaiga, tatalo faaleaiga, tatalo faale-ulugalii, faamanuiaga faale-tama ma faatalanoaga, aso fanau, aso faailogaina, faauuga, faaiipoipoga, tu masani mo aso malolo, faamamaluina o le Sapati, misiona, faaiipoipoga faale-malumalu, gaoioiga faafafia, matafaioi a le tane ma le ava, faiga o faaiuga, tulaga tau tupe (e pei o le totogiina o sefuluai, kata tupe, aitalafu, ma le faapaketiina o tupe), faailoaina o le alofa, itu-aiga o fesootaiga, foaina o faafitauli, ma le taulai atu i mea faale-lalolagi.

4 O LE FAALEAGAGA I LE FAAIPOIPOGA

O LE VAAIGA AOAO FAALE-AOAOGA FAAVAE

“Afai e sili atu le alolofa o ni tagata se toalua i le Alii nai lo o laua ola, ma sili atu le alofa o le tasi i le isi nai lo o laua lava ola, galulue faatasi ia ogatusa atoatoa ma le polokalama o le talalelei e avea ma o laua faatulagaga faavae, o le a mautinoa lo laua mauaina o le ... fiafia sili. Pe a o atu faatasi soo le tane ma le ava i le malumalu paia, tootutuli faatasi i le tatalo ma o latou aiga, uu lima faatasi ma o i a latou sauniga faalelotu, tausia o latou olaga i le mama atoatoa, faale-mafaufau ma le faaletino, ina ia taulai atu o latou manatu ma naunautaiga atoatoa ma le alofa i le tagata e tasi, o a latou soa, ma galulue faatasi i laua uma mo le fausiaina o le malo o le Atua, ona maua lea o le fiafia i lona tumutumuga” (Spencer W. Kimball, “Marriage and Divorce” i le 1976 *Devotional Speeches of the Year* [1977], 151; po o le tusi lesona a le tagata aoga, 172).

MATAUPU FAAVAE

“Pe a sili atu le alofa o ni tagata se toalua i le Alii nai lo o laua lava ola, ma ... galulue faatasi i laua uma mo le fausiaina o le malo o le Atua, ona maua lea o le fiafia i lona tumutumuga.”

FAITAUGA MAI LE TUSI LESONA A LE TAGATA AOGA

“O Le Aiga: O Se Folafolaga i le Lalolagi,” o le Au Peresitene Sili ma le Korama a Aposetolo e Toasefululua (89–90)


Aoaoga Filifilia mai le “O Le Aiga: O Se Folafolaga i le Lalolagi” (90–108)

O A MEA E AOAO ATU

O ulugalii faaipoipo e mafai ona sili atu ona alofa le tasi i le isi, pe a avea atili e faapei o Keriso.

FAUTUAGA I AUALA E AOAO ATU AI

 **Talanoaga.** Tusi le mataupu faavae o le lesona i luga o le laupapa. Fai atu i tagata o le vasega e tusi se ata e faaalia ai lea mataupu faavae. A maea a latou taumafaiga, ia tusia le ata lenei i luga o le laupapa ma tuu ai iina mo le taimi o totoe o le lesona.





Tusi Lesona a le Tagata Aoga. Fai atu i tagata o le vasega e su'e i le vaega "E Faapefea e Lo Tatou Alolofa i le Atua ona Uunaia lo Tatou Gafatia e Alolofa ai i Isi?" (tusi lesona a le tagata aoga, 166). Faitau ia faamatalaga taitasi ma fai atu fesili e pei o fesili nei:

- Elder Orson Pratt. Aisea e te manatu ai "o se tamaloa amio leaga e mafai ona itiiti lona alofa mo lana ava"? E faapefea e le ola i mataupu faavae o le talalelei i totonu o se aiga e totonugalemu ia Keriso, ona fesoasoani i se tamaloa ia alofa i lana ava?
- Elder Ioane A. Widtsoe. Aisea e faapea ai, o le alofa moni i le va o alii ma tamaitai "e aofia ai i taimi uma le alofa mo le Atua"?
- Elder Russell M. Nelson. E tusa ai ma le saunoaga a Elder Nelson, e faapefea e lo tatou tuuto atu i le Alii ona faateleina lo tatou tuuto atu i o tatou taitoalua? Aisea e moni ai lenei mataupu? Faamata o a ni taunuuga o se faaipoipoga, pe afai e vaivai le tausisia e le paaga o a laua feagaiga paia?

O A MEA E AOAO ATU

O le fausiaina o le faaleagaga, o se sailiga faifai pea mo tagata taitoatasii faapea foi le ulugalii.

FAUTUAGA I AUALA E AOAO ATU AI



Galuega fai faavaega. Vaevae le vasega i ni vaega se tolu ma tuu atu i vaega taitasi e faitau se tasi o vaega nei mai le "Ausia o le Malamalamala Faaleagaga" mai ia Elder Richard G. Scott (tusi lesona a le tagata aoga, 158): "Saili le Malamalamala Faalelagi i le Lotomaulalo," "Faaaoga le Faatuatua ma Faalogo ma Usitai i Fautuaga a Keriso," ma le "Tausi i Poloaiga." Fai atu i vaega taitasi e tuuina mai ni mataupu taua se lua po o le tolu mai a latou fatauga faatonuina, ma talanoaina faatasi o se vasega.



Talanoaga. Fesili atu i tagata o le vasega: O le a se mea e mafai ona e faia e faateleina ai le faaleagaga o oe lava ia? O le a se mea e mafai ona oulua faia, o se ulugalii, e faateleina ai le faaleagaga? E mafai faapefea e le Agaga ona fesoasoani e foiaina faafitauli o aso taitasi i se faaipoipoga?

O A MEA E AOAO ATU

"O le fiafia i le olaga faaleaiga, e tele lava ina ausia, pe a faavae i luga o aoaoga a le Alii o Iesu Keriso" ("O Le Aiga: O Se Folafolaga i le Lalolagi").

FAUTUAGA I AUALA E AOAO ATU AI



Galuega fai faavaega. Su'e faatasi ma tagata o le vasega i le "O Le Aiga: O Se Folafolaga i le Lalolagi" (tusi lesona a le tagata aoga, 89), ma faitau le mataupu faavae lenei mai le parakalafa 7: "E maua le fiafia i le olaga faaleaiga pe a faavae i aoaoga a le Alii o Iesu Keriso." Toe faamanatu faapupuu atu i tagata o le vasega le auala e fesoasoani ai tusitusiga paia e aoao le taua o le fausiaina i luga o faavae mautu (tagai i le Luka 6:47–49; 1 Korinito 3:10–13; Efeso 2:20, po o le 2 Nifae 28:28 Faamalamalamala atu, ina ia maua le fiafia i le olaga faaleaiga, e ao ona tatou fausia i luga o le faavae o aoaoga a le Alii o Iesu Keriso).

O le parakalafa lona fitu o le folafolaga o loo lisi mai ai mataupu faavae e iva lea e avea o se faavae mo se faaipoipoga faamanuiaina: faatuatua, tatalo, salamo, faamagaloga, faaaloalo, alofa, agalelei, galuega, ma gaoioiga faafiafia tuufaatasi. Vaevae le vasega i vaega ma tuuina atu se mataupu se tasi pe lua i vaega taitasi. Fai atu i vaega taitasi e mafaufau i ni faataitaiga e faamalolosia ai e a latou mataupu faavae atofaina le faaipoipoga, ma faasoa mai i le vasega. Talanoaina nisi faataitaiga pe a lava le taimi.

FAAIUGA

Faitau le saunoaga lenei mai ia Elder James E. Faust, a o avea ma sui o le Korama a Aposetolo e Toasefululu: "O le mauaina o le mafutaga ma le fiafia i fua o le Afio ai o Se e Paia ma Mamalu, o le aano lea o se fiafia sili i le faaipoipoga. O le autasi faaleagaga, o le taula lea. O nai mama faifaimalie i le tulaga faapaiaina o le faaipoipoga, e mafai ona o'o ai faaipoipoga e avea ma "pa'u pā" (i le Conference Report, Oct. 1977, 14; po o le *Liahona*, Nov. 1977, 9; tusi lesona a le tagata aoga, 186). Toe foi atu i le ata o loo i le laupapa, ma faamalamalama atu e mafai ona tatou tausia a tatou faaipoipoga mai le avea ma "pa'u pā" e ala i le alolofa uma o le tane ma le ava ia Iesu Keriso ma mulimuli atu i Ana aoaoga. Faaaoga le ata na e tusia i luga o le laupapa e faamalamalama atu ai e faapea, o le latalata lava o se ulugalii i le Alii, o le latalata foi lena o le tasi i le isi.

Toe faamanatu le mataupu faavae faapea, o le faaleagaga e faaleleia atili ai le faaipoipoga. Valaaulia tagata o le vasega e mafaufau i o latou lava malosiaga ma vai-vaiga, ma tagai mo auala e avea atili ai e faapei o Keriso.

5 O VAEVAE FAAVAE O FESOOOTAIGA I FAAIPOIPOGA

VAAIGA AOAO FAALE-AOAOGA FAAVAE

“O a tatou fesootaiga e atagia i o tatou foliga. O le mea lea, e ao ona tatou faaete-ete ina ia le na o le *mea* tatou te tautatala atu ai, ae faapea foi le *aula*} tatou te faia ai. E mafai ona faamalolosia pe nutililiina ai foi agaga i le savali ma le auala tatou te fesootai atu ai” (L. Lionel Kendrick, i le Conference Report, Oct. 1988, 28; po o le *Liahona*, Nov. 1988, 23).

MATAUPU FAAVAE

O fesootaiga lelei e faagaeetia ai faaipoipoga.

FAITAUGA MAI LE TUSI LESONA A LE TAGATA AOGA

Aoaoga Filifilia mai le “Fesootaiga” (33)

O A MEA E AOAO ATU

O le malamalamama i ou lava malosiaga ma vaivaiga, e mafai ona fesoasoani e faaleleia atili ai tomai tau fesootaiga.

O A MEA E AOAO ATU

Ua aoao mai taitai o le Ekalesia o fesootaiga faalefaaipoipoga e faaleleia e ala i lagona malamalamama, faautauta, loto matafa, faapalepale, alofa, faaaloalo, vaai atu i le isi o se paaga tutusa, ma le faaaloalogiaina o le fai-talia o le isi.

FAUTUAGA I AUALA E AOAO ATU AI

 **Muai suega a le tagata o le vasega.** Fai ni kopi o le tufaaga 2, “Suega o le Fesootaiga,” mai le faaiuga o le lesona (i. 24) ma tufa atu i tagata o lau vasega ua faaipoipo, pe ua faamau. Tuu atu ia i latou nai minute e tali ai fesili o loo i lalo o le “O Le A Le Lelei o La’u Fesootai Atu?” Faamalamalama atu o le a outou le talanoaina a latou tali i le vasega, ae uunaia i latou e talanoaina i se taimi mulimuli mai ma a latou uo ua faamau i ai, po o taitoalua.

FAUTUAGA I AUALA E AOAO ATU AI

 **Talanoaga.** Faitau le Mataupu Faavae ma Fegaiga 76:94 faatasi ma tagata o le vasega. Faamalamalama atu o le tasi o mea e iloagofie ai i latou o e mautofi i le malo selesitila o le “latou te vaai e pei ona vaaia ai i latou, ma iloaina e pei ona iloa ai i latou.” O le mea lea e foliga o loo faapea mai, i lo tatou tulaga atoatoa faaleselesitila, o a tatou fesootaiga o le tasi ma le isi, o le a mama ma manino, e aunoa ma le faagutugutulua, faa’ole’ole, po o le le malamalamama. Talu ai o le mamalu faaselesitila o la tatou sini lea, e tatau ona tatou taumafai e aoao ma faaaoga lea ituaiga o fesootaiga i le taimi nei.

 **Galuega fai faavaega.** Tuu atu i tagata o le vasega e sue i mau e faatatau i ai i lalo o le “Fesootaiga” i totonu o le tusi lesona a le tagata aoga (33). Vaevae le vasega i ni vaega ma atofa atu ni mau eseese i vaega taitasi. Fai atu ia i latou e talanoaina i a latou vaega pe faapefea ona faaaoga a latou mau i fesootaiga i totonu o faaipoipoga ma le aiga. Tuu atu le avanoa e lipoti mai ai a latou faa-iuga i le vasega.

Tufaaga 3. Fai ni kopi o le tufaaga 3, "Iloiloga faaletagata lava ia mo le Sauaina Faalelagona," mai le faaiuga o lenei lesona (i. 25) ma tufatufa atu i tagata o le vasega. Valaaulia tagata o le vasega e talanoaina o latou lagona e uiga i amioga o loo lisi atu ai iina. Ia uunaia i latou e faatumu le pepa o fesili i le fale, ma afai ua faaipoipo, ia talanoaina ma o latou taitoalua i se taimi mulimuli ane.


Ia faailoa atu e faapea, ina ia maua se faaipoipoga malosi e ao ona e tafiesea faiga uma faatiga o fesooptaiga, ae fesootai atu i auala e faafaileleina ai, faagaetia, siitia, uunaia, ma ia faia ina ia lagonaina e lou toalua lona faatauaina ma le alofagia.

O A MEA E AOAO ATU

O le faateleina lava o le avea o le tane ma le ava e faapei o Keriso, o le faateleina foi lena o le agavaa e fesootai ai le tasi i le isi i le alofa.

FAUTUAGA I AUALA E AOAO ATU AI

 **Talanoaga.** Ia tusia le ata faatusa lenei i luga o le laupapa. Fai atu i le vasega e faamalamalama mai. Ia faamalamalama atu e faapea, o le tele lava o le latalata atu o le alii ma le tamaitai ia Keriso (i se isi faaupuga, o le tele o le avea o i la'ua e faapei o Keriso), o le tele foi lena o le agavaa e fesootai ai le tasi i le isi i le alofa.



 **Talanoaga.** Faitau faamatalaga nei i le vasega ma fesili atu po o le a le mea a nei mea taitasi e fai i le fesooptaiga faalefaaipoipoga.

- Na tusia e Elder John A. Widtsoe, o le sa avea ma sui o le Korama a Apostolo e Toasefululu, "O le alofa moni lava o le alii mo le tamaitai e masani ona aofia ai le alofa i le Atua, o lē aumai ai mea lelei uma" (*Faamaoniga ma Faaleleiga*, aar. G. Homer Durham, 3 vols. in 1 [1960], 297; po o le tusi lesona a le tagata aoga, 167).
- Na aoao mai Elder Neal A. Maxwell o le Korama a Apostolo e Toasefululu e faapea: "I aoaoga a tagata—a aunoa ma Keriso i le totonugalemu—o le a vave ona i ai se lagona faavaivaia o le auauanga mo isi. ... O tagata, e le masani ona alofa i se tuaoi ona e faapea o loo i ai o ia iina; o nisi e iloa a'e o loo ola o ia, ina ua maea ona faaosofia latou o loo soifua le Atua" (*Of One Heart: The Glory of the City of Enoch* [1975], 15).

FAAIUGA

O vaega e lua mai le Iakopo 3 ua otooto mai ai le lu'i mo fesooptaiga i se auala e faamalolosia ai sootaga e faavavau:

"Aua o mea e tele e sese ai i tatou uma. A le sese se tasi i le upu, o le tagata lea ua sao, na te mafaia foi ona taofi i le tino uma. ...

"O ai ea so outou ua poto ma ua malamalama? Ina faaali mai ia e ia ai le amio lelei o ana lava galuega i le agamalu o i ai le poto" (Iakopo 3:2, 13).

A lava le taimi, toe faamanatu ma talanoaina le tusi atoa o le Iakopo 3.

Tufaaga 2 • Suega o le Fesootaiga

O Le A Le Lelei o La'u Fesootai Atu?	E masani lava	O nisi taimi	E seāseā lava
1. O le auala ou te tautala ai i lau soa, e faamalosia ai la maua sootaga.			
2. O mea ou te filifilia e talanoa ai ma la'u soa e faamalosia ai la ma'ua sootaga.			
3. Ou te tuuina atu le faamamafa sili atu i uiga lelei o la'u soa nai lo ona sese.			
4. E ia te au se uiga lelei e uiga i la'u soa.			
5. Ou te aloese mai le faitio, sisi'o, faatautee, musu, faaesea, ma le lotomalo, pe a ma talanoa ma la'u soa.			
6. O le auala ou te fesootai ai i la'u soa, e faaali atu ai ou te alofa ma faaaloalo ia te ia.			
7. Ou te vaai atu i la'u soa e tutusa lava ma a'u i la maua sootaga faalefaaipoipoga.			
8. Ou te faaaofaina la'u soa i faaiuga taua uma e faia i la maua faaipoipoga.			
9. Ou te faaeteete ina ia aua ou te taumafai e faamalosia la'u soa, ina ia fetau ma so'u manatu ua leva ona mafaufauina.			
10. Ou te galue malosi e fesootai atu i se auala faa-Keriso.			

Tufaaga 3 • Iloiloga a le Tagata lava ia o le Faatautala/Sauaina Faalelagona

Sii mai le Judy C. Olsen, "The Invisible Heartbreaker," Ensign Juni 1996, 24–25

Faailoga pe faafia ona e faaaogaina faiga taitasi nei o sauaga faalelagona i lou toalua po o isi.

UIGA SAUA PO O LE FAATAUTALA	E LE TUPU LAVA (e le i tupu lava i le lima tausaga talu ai)	E SEĀSEĀ LAVA (itiiti ifo i le faatasi i le tausaga)	I NISI TAIMI (itiiti ifo i le faatasi i le masina)	TUPU SOO (e ta'i vaiaso, po o aso taitasi)
<i>Valaauiina i Nisi Igoa</i>				
'Upu e pei o le faavalevalea, matavalea, pe sili atu foi le leaga				
Upu faauigalua, pe soona lafo				
Igoa valaau e uigā				
Igoa faatiga				
<i>Faaupuga Taufaaleaga</i>				
Ta'ufaatauvaaaina o taumafaiga				
Leo fiasili				
Tausuaga vaai maualalo e faalumaluma ai tagata				
Vaavaai masei				
<i>Faamata'uina</i>				
Taufaamata'u ina ia maua ai le mea o loo mana'o i ai				
Upu ita				
E'ē				
Tatutuvae solo i le fale				
Tauai solo po o le talepeina o mea				
Faasalaveia ma le tautala malosi				
Pupula ita po o isi faailoga o le sauā				
<i>Faaesea (faatapulaaina o fegalegaleaiga a le toalua)</i>				
Taofia o faamatalaga po o uiga alofa				
Taofiofimauina o lagona le fiafia po o le faaesea				
Faia o tulafono le talafeagai				
<i>Faiga poto faatogafiti</i>				
Faafoliga tiga ina ia gauai mai ai le isi				
Taumafai e faaoso lagona tausalaina				
Tuuiai o le toalua po o isi mo faafitauli				
Tetee ma le loto i ai i se faaiuga a le toalua mo mafuaaga manatu faapito				

6 O LE LOTOGATASI AMIOTONU I LE FAAIPOIPOGA

VAAIGA AOAO FAALE-AOAOGA FAAVAE

“Ma ia tonu outou i le manatu e tasi, ma ia outou lotogatasi i mea uma” (2 Nifae 1:21).

“Ma sa taua e le Alii lona nuu o Siona, aua sa tasi o latou loto ma tasi le mafaufau, ma sa mau i le amiontu” (Mose 7:18).

“E ao i se tane ma se ava ona ausia le lotogatasi amiontu ma le manatu e tasi i a laua sini, manaoga, ma amioga” (Ezra Taft Benson, “O Le Faaolataga—O se Mataupu Faaleaiga,” *Liahona* Iulai 1992, 2; po o le tusi lesona a le tagata aoga, 302).

“E matuai sili mamaao atu ona faigata ona tasi i le loto ma le mafaufau nai lo le faaletino” (James E. Faust, i le Conference Report, Apr. 1993, 46; po o le *Liahona*, Me 1993, 36; tusi lesona a le tagata aoga, 368).

MATAUPU FAAVAE

O le ausiaina o le lotogatasi amiontu faatasi ma o tatou taitoalua e faateleina ai le avanoa mo le manua i faaipoipoga.

FAITAUGA MAI LE TUSI LESONA A LE TAGATA AOGA

Aoaoga Filifilia mai le “Lotogatasi” (368–70)

Aoaoga Filifilia mai le “Manatu Faapito” (325)

O A MEA E AOAO ATU

O le lotogatasi amiontu i le faaipoipoga e aofia ai le tasi ia tatou sini, manaoga, ma amioga.

FAUTUAGA I AUALA E AOAO ATU AI

Faamanatu i tagata o le vasega e uiga i mataupu faavae o le alofa, faaaloalo, ma fesootaiga lelei na talanoaina i le lesona ua mavae atu. Faailoa atu le taua o ia mataupu faavae i le fausiaina o le lotogatasi i faaipoipoga.

 **Talanoaga.** Tusi i luga o le laupapa le saunoaga a Peresitene Ezra Taft Benson mai le Mataupu Faavae o le Talalelei (luga). Fesili: O le a sou manatu i le uiga o le “lotogatasi amiontu”? Talanoaina lenei manatu faavae e ala i le faia o fesili e pei o fesili nei:

- O a auala atonu e fesoasoani ai le lotogatasi amiontu e taofia pe foaina faafitauali i faaipoipoga? E te manatu o *soo se* ituaiga o lotogatasi o le a faaleleia atili ai sootaga, pe e tatau lava ona lotogatasi *amiontu*? Aisea?
- O a vaega na saunoa ai Peresitene Benson e ao ona tatou tauivi ai mo le tasi o le loto?
- O a ni faataitaiga o le lotogatasi amiontu i se faaipoipoga?
- Aisea ua i ai ai le avanoa mo vaega uma e lua, o le taitoatasi ma le tasi i le loto i se faaipoipoga e faavavau?

O A MEA E AOAO ATU

O le lotogatasi amio-tonu i le faaiipoipoga e aumaia ai le malosi.

FAUTUAGA I AUALA E AOAO ATU AI

 **Gaoioiga i tusitusiga Paia.** O le faatusatusaga lenei e mafai ona faaaogaina aoao ai le mana o le lotogatasi i le faaiipoipoga. Faali atu i tagata o le vasega se fasi laupapa lua i le fa (le ituaiga lapo'a lea e masani ona faaaogaina mo le fausiaina o tino o fale). Faamalamalama atu, o se lua i le fa e valu futu le umi, pe a faatu sa'o i luga, e mafai ona taofia le 577 pauna. Afai e tuuina atu i ai se mamafa sili atu, o le a pi'o ma gausia. Faali atu i tagata o le vasega se isi fasi lua-i-le-fa. Ia faatutu laupapa e lua o le tasi i autafa o le isi (aua ne'i fepiitai), ma fesili atu i tagata o le vasega pe faamata e fia se mamafa e mafai ona la taofia. (E mafai ona faaluaina le mamafa, po o le 1,154 pauna.) Faapi-pii faatasi laupapa. Fesili atu i tagata o le vasega pe fia se mamafa latou te manatu o le a mafai e nei laupapa ona taofia, pe afai o le a tuufaatasi e avea ma laupapa e tasi. (Pe a tuufaatasia, e mafai ona la taofia le 4,610 pauna, toe-ititi faafaina e sili atu ai nai lo le mamafa pe a eseese.) *Manatua:* Atonu e mafai ona e fetuutuunaia lenei faatusatusaga e faaaoga ai fasi laau, po o vase. O vase e lua ua fusia faatasi, e sili atu le mamafa la te mafai ona taofia, nai lo le mamafa atonu e mafai ona la taofia pe ana le fusia faatasi.

Faitau le Failauga 4:9 faatasi ma tagata o lau vasega. Talanoaina pe faapefea e lenei mau ma le faatusatusaga o lua-i-le-fa ona fesootai i le faaiipoipoga. O a auala e sili atu ai le malosi o le tutu faatasi o se alii ma se tamaitai i le faaiipoipoga e faavavau, nai lo le tuufaatasia o a la taleni, pe a tumau i le tutoatasi? O le a le uiga o le upu *tuufaatasia?* ("Fegalegaleaiga po o le galulue faatasi o ni vaega se lua pe sili atu ... ina ia maua ai se aafiaga tuufaatasi e sili atu nai lo se tuufaatasiga o aafiaga pe a eseese" [The Concise Oxford Dictionary 10th ed. (1999), 1452].) Talanoaina pe faapefea e le tuufaatasia ona galue e faamalosia se faaiipoipoga e faavavau ma le aiga.

 **Talanoaga.** Faitau le saunoaga lenei mai ia Elder Richard G. Scott o le Korama a Aposetolo e Toasefululua:

"O le faaiipoipoga e faatagaina ai o [tatou] uiga eseese e tuufaatasia i le loto e tasi—i le lotogatasi—e faamanuiaina se tane ma le ava, o a laua fanau ma fanau a fanau. Mo le fiafiaga sili ma le ola manuia i le olaga, e manaomia uma le tane ma le ava. O a la taumafaiga e fesootai, ma e lagolagoina e le tasi le isi. Ua i ai i tagata taitoatasi uiga e sili ona talafeagai ma matafaoioi ua faatulagaina mai e le Alii mo le fiafia i le avea ai ma alii ma tamaitai. Pe a faaaogaina e pei ona finalo ai le Alii, o na agavaa o le a mafai ai e ulugalii faaipoipo ona mafaufau, faatino, ma olioli o se paaga e tasi—e faafetaiaia faatasi luitau ma faatoilaloina i latou o se paaga e tasi, ina ia tuputupu a'e i le alofa ma le malamalama, ma e ala i sauniga o le malumalu, o le a fusia ai faatasi o se tulaga atoatoa e faavavau. O le fuafuaga lena" (i le Conference Report, Oct. 1996, 101; po o le *Liahona* Ian. 1997, 88; tusi lesona a le tagata aoga, 369).

Talanoaina pe faapefea ona aoga i se faaiipoipoga eseeseaga faalenatura, ma, pe faapefea ona le tatau ona taofia i tatou e na eseeseaga mai le mafaufau, faatino-inia, ma le olioli o se paaga e tasi.

O A MEA E AOAO ATU

E tele ituaiga o tina [wedges] latou te faatu-puina le vava mamao ma le le lotogatasi i le faaiipoipoga.

FAUTUAGA I AUALA E AOAO ATU AI

 **Talanoaga.** Faamatala atu le tala lenei mai ia Elder Spencer W. Kimball, o le sa avea ma se tasi o le Korama a Aposetolo e Toasefululua. Faamalamalama atu o tina, o fasi uamea tafatolu e faaaoga e vaevaeina ai ogalaau e avea ma fasi fafie.

“I se tasi o po, na ou taotooto ai ma faasolo o’u mafaufauga i faafitauli o le aso. O le vaiaso atoa ua faula’i ai i la’u kesi faila o tagata—tagata lelei—o nisi ua i ai i le lotomomomo ma le tiga o le agaga; o isi o loo aoaoina le salamo e ala i faasalaga o le olaga, o nisi ua fiu i faaletonu o a latou faaipoipoga, i a latou amioga le lelei, i o latou faaletonu o mea tau tupe, ma o latou le atoatoa faaleagaga.

“O nei tagata na avea ma tagata lelei i le amataga; peitai, a o latou faimalaga, na faigata ona tumau i le ala tele ma ua se ese i ala’alo, ua latou faagaloina feagaiga ma tolopoina le faataunuina o a latou faaiuga lelei.

“Na o’o mai i lo’u mafaufau se tusiga na tusia e Samuel T. Whitman na faaulatalaina ‘O Tina [Wedges] ua Faagaloina.’ Na ou aoao e faaaoga tina a o avea a’u o se tamaitiiti i Arizona, na avea lena mea ma o’u tiute, o le aumaia o fafie mo le tele o afi i le fale tele. Sei ou ta’ua le saunoaga a Whitman:

“Sa le matua leaga tele le timu aisa. E moni, sa i ai nai uaea moli na toulu, ma sa faafuase’i ona faateleina faalavelave tau taavale i luga o le auala. Na amata ona faigata ma lē manaia le savali i fafo o le fale. Sa le lelei le tau, ae sa le matua leaga tele foi. E masani lava, o le laau tele o le uolanati atonu e mafai ona tatalia le avega ua faaputuina i luga o ona lala. Ae, o le tina uamea na i ai i lona totongalemu na mafua ai ona faatamaiaaina.

“O le tala i le tina uamea na amataina i tausaga e tele ua mavae, a o avea le faifaaatoaga laulu-sina ma tamaitiiti i le faatoaga a lona tama. E le’i leva lava ona aveesea le ili laupapa mai le vanu, ma sa taumafai tagata o le aai e sailia mea faigaluega ma nai masini laiti sa salalau solo ai. …

“I lenei aso faapitoa, na avea le tina a se tagata tuulaau—lautele, mafolafola, ma mamafa, e tusa ma le futu pe sili atu lona umi, ma ua felea ona o tuituiga malolosi. O le auala mai le fanua i le itu i saute, e le o’o i le fale e teu ai meafagaluega, ma, ona ua tuai mo le aiga i le afiaifi, na tuu ai e le tama le tina … i le va o lala o le tamai laau o le uolanati na totoina e lona tama i tafatafa o le faitotoa o le pa i luma. Na tatau ona ia aveina le tina i le fale pe a mae’ā le taumafataga o le afiaifi, po o se isi taimi e ui atu ai iina.

“Na i ai moni lava lona manatu e faia lena mea, peitai, sa ia le faataunuina lava. O iina, i le va o lala, na mau ai, a o faasolo ina avea ma tagata matua o ia. O iina, lea ua matua mau ai, ina ua ia faaipoipo ma vaaia le faatoaga a lona tama. Na tusa ua afa le sosolo ai i ona luga, i le aso na fai ai le taumafataga o le afiaifi a le aufaigaluega i lalo o le laau. … Ua ola ai i totonu ma ua ufitia, na faapena ona i ai pea le tina i totonu o le laau i le taimi o le taumalulu na oo mai ai le timu aisa.

“I le toofilemu o lena po o le taumalulu, faatasi ma le puao ua pei o le timu to mai i lalo ma to’ā ai i le mea e pau ai, na vete ai se tasi o lala, o lala tetele e tolu, mai le tino o le laau ma pau i luga o le eleele. O le mea lea na le paleni ai foi le vaega o totoe i le pito i luga, ma o lea, na mavete ai foi ma alu ifo ai i lalo. Ina ua mavae le afa, e leai ma sina lala o le laau, lea na tu matilatila ai mo se taimi, na totoe.

“I le taeao po na sosoo ai, na alu atu ai le faifaatoaga e vaai i mea ua faaleagaina. “E mafai ona ou faaaluina se afe tala, ae ou te le i manao e tupu lena mea,” na ia faapea ane ai. “O le laau na aupito sili ona matagofie i le vanu.”

“Ona tau atu lea o lana vaai i se mea i totonu o le faatafunaga. “O le tina,” na ia tomumumumu ai i lona sese. “O le tina na ou mauaina i le itu i saute o le fanua.” Na o sina tepa tasi atu lava, na ia iloa ai le mafuaaga na pau ai le laau. Na mau ai faasaga i luga i totonu o le ogalaau, ma sa taofia e le tina le fesootai faatasai o momoi a'a o lala, e pei ona tatau ai.’

“O tina na galo! O vaivaiga natia ua sosolo ma lē mafai ona vaaia e mata, e faatalitali seia oo i se po o le taumalulu e faatino lana faatamaiaga. O le a se isi auala sili atu e faaalia ai le aafiaga o o tatou olaga i le agasala?” (i le Conference Report, Apr. 1966, 70–71).

O a nisi o tina e mafai ona faamata'uina ai le lotogatasi i le faaipoipoga?

Fai atu i tagata o le vasega e su'e i Aoaoga Filifilia mai le “Manatu Faapito” i le tusi lesona a le tagata aoga (i. 325). Faitau le fuaiupu muamua o le parakalafa e lua i le suafa o Peresitene Spencer W. Kimball: “O tatalaga o faaipoipoga taitasi, o le taunuuga o le manatu faapito i le pito a le tasi, po o le isi, pe o itu uma foi o se faaipoipoga faakonekarate.” E mafai e le manatu faapito ona avea ma se tina i le faaipoipoga. E faaalia mai o ia lava i auala eseese.

Faitau faamatalaga taitasi i totonu o Aoaoga Filifilia, ma lisi i le laupapa amioga e ono mafai ona avea ma tina i se faaipoipoga. Talanoaina pe faapefea ona faaitolaloina pe aloese atoatoa foi mai nei tina taitasi. Atonu e foliga tutusa lau lisi ma lenei:

- Peresitene Tavita O. MaKei. Inoino, matapeapea, lototiga, ma le lotoleaga.
- Peresitene Spencer W. Kimball. O le manatu i o tatou lava tulaga lelei, avanoa talafeagai, saolotoga, fiafia i oa, po o mea faigofie; lemataofia o le vaa-vaaai masei, tauaimisaga faaletino, faaipoipoina mo mafuaaga sese (oa, mamalu, tulaga faaagafesootai, faasausili, po o le agaleaga i se tasi)
- Peresitene Gordon B. Hinckley. O le manatu faapito e tau atu i faafitauli tau tupe, mulilua, tuinanau, matapeapea. O le manatu faapito e faaleagaina ai le loto pulea, faamaoni, po o feagaiga.
- Elder Neal A. Maxwell. O le manatu faapito faasausili, leai o se lotomaulalo faalemaufau, faatupuina o lagona tetee.

O A MEA E AOAO ATU

E tatau ona tatou mulimuli i fautuaga lelei mo le faateleina o le lotogatasi i le faaipoipoga.

FAUTUAGA I AUALA E AOAO ATU AI

 **Gaoioiga fai faavaega.** Tufa atu le tufaaga 4, “Ina ia Tasi i Taua,” o loo maua i le faaiuga o lenei lesona (itu. 31–34). Tofi ni vaega laiti o tagata o le vasega e suesue nai vaega faapitoa. Tuu atu i vaega taitasi e faitau faatasai a latou vaega ua tuuina atu. Tuu atu i ai e vaavaai mo (1) amioga e maua ai le lotogatasi i le faaipoipoga, ma (2) mataupu faavae mo le mauaina o le loto e tasi i le faaipoipoga. Tuu atu i vaega taitasi le avanoa e faailoa mai ai a latou sailiiliga i le vasega. E mafai ona maua tali a tagata o le vasega i le siata lenei:

O Amioga e Aumai ai le Lotogatasi	O Amioga e Aumai ai le Lotogatasi
<ul style="list-style-type: none"> • Ia naunau e faamuamua mea e fiafia i ai le toalua, nai lo ona lava manaoga. • Talitonu i upumoni na aoao mai e le Faaola. • Talia sauniga ma feagaiga ua ofoina mai e Ana auauna faatagaina. • Tausi folafolaga na faia i le taimi o le faamanatuga (e ave i o tatou luga Lona suafa, manatua pea o Ia, ma tausi i Ana poloaiga uma). • Faamuamua o Ia i o tatou olaga. • Manao i mea e finagalo ai le Alii, ae le o mea tatou te mananao ai, po o mea ua aoao mai le lalolagi ia tatou mananao i ai. • Ia lē tautala leaga lava e uiga i soo se tasi. • Ia vaavaai atu i mea e lelei ai le tasi ma le isi, ma ia faia tala lelei e uiga i isi, i taimi uma e mafai ai. • Ia tu e tetee atu ia i latou o e tautala lē mafaufau i mea paia (e aunoa ma le fefinauai). 	<ul style="list-style-type: none"> • O le lotogatasi amiontonu i le faaipoipoga, e manaomia mo le faaolataga: "Ia tasi outou; ma afai tou te le tasi, e le a a'u outou" MF&F 38:27). • E totoina e Satani fatu o mea faafatuulu e tuueseeseina ai i tatou mai ē pele ia i tatou. • O le talalelei a Iesu Keriso e mafai ai ona tasi o tatou loto. • O le Togiola e mafai ai ona faapaiaina i tatou ma ola i le lotogatasi. • A maua e tagata le Agaga, e i ai foi le nofolelei. • O lo tatou fiafia e faamuamua mea o le lalolagi, o lo tatou le mauaina foi lea o se filemu po o le lotogatasi. • O le gauai atu i le pule a Iesu Keriso, e fusia ai tatou o ni aiga, o se Ekalesia, ma o ni fanau a le Tama Faalelagi. • E ao ona tatou tumau i le mama, ma aua le fiafia i mea o le lalolagi ina ia faatumauina le Agaga, ma a aunoa ma le Agaga, e le mafai ona tasi i tatou. • O le faamaualuga o se puna mautinoa o le fevaevaeai. • O le auauna atu o se puipuiga e tetee atu ai i le faamaualuga. • E aoaoina e se tane ma le ava ina ia tasi, e ala i le faaaogaina o o laua ese esega ma mea e tutusa ai, a o auauna le tasi i le isi, atoa ai ma e ua siomia ai i latou.

FAAIUGA

Na faamalamalama mai e Elder James E. Faust o le Korama a Aposetolo e Toasefululu e faapea: "E tele mea e manaomia e faatamaoaigaina ai se faaipoipoga, ae foliga mai ua lavelave. O le mauaina o le mafutaga ma olioli i fua o se Aafiaga Paia ma Mamalu, o le aano lea o se fiafiaga sili i le faaipoipoga. O le tasi i le faaleagaga o le taula lea" (i le Conference Report, Oct. 1977, 14; po o le *Liahona* Nov. 1977, 10–11; tusi lesona a le tagata aoga, 196). O le a sili atu ona mafai ona tatou maua le lotogatasi, pe a tatou taulai atu i le tasi o le loto faaleagaga, ma faia mea e valaaulia ai le Agaga i totonu o a tatou faaipoipoga. I le faia ai faapea, o le a otometi lo tatou faaumatiaina o amioga manatu faapito, lea e mafai ona tuu ai tina i a tatou faaipoipoga.

GALUEGA ATOFAINA A LE TAGATA O LE VASEGA

Faamanatu i tagata o le vasega le galuega atofaina o talafaasolopito o aiga, e faagataina i le isi vasega o sosoo ai (tagai i le i. 18).

Tufaaga 4 • Ina ia Tasi I Taua



Elder Henry B. Eyring

O Le Korama a Aposetolo e Toa-sefululua

I le Conference Report, Ape. 1998, 85–89; po o le Ensign, May 1998, 66–68

"Afai Tou Te le Tasi, e Le a A'u Outou"

O le Faaola o le lalolagi, o Iesu Keriso, na fetalai mai ia i latou o e o le a avea ma vaega o Lana Ekalesia: "Ia tasi outou, afai tou te le tasi, e le a A'u outou" (MF&F 38:27). Ma, i le foafoaga o le alii ma le tamaitai, o le lotogatasi mo i laua i le faaipoipoga, sa le i tuuina mai o se faamoemoega, na tuuina mai o se poloaiga! "O le mea lea e tuua ai e le tane lona tama ma lona tina, a e faatasi ma lana ava: ona avea ai lea o i laua ma tino e tasi" (Kenesse 2: 24). E finagalo lo tatou Tama Faalelagi ina ia fusia faatasi o tatou loto. O lena faatasiga i le alofa e le na o se talitonuga. O se mea e manaomia."

O le tulaga manaomia ina ia tatou tasi, e le mo na o lenei olaga. E ao ona leai sona iuga. O le uluai faaipoipoga lava na faataunuina e le Atua i le faatoaga, a o i ai Atamu ma Eva i le tulaga o le tino ola pea. Na Ia tuuina atu i alii ma tamaitai, mai lava i le amataga, se manao e faatasia se alii ma se ava ina ia nonofo faatasi e faavavau i aiga, i se tuuifaatasiga atoatoa ma amiontonu. Na Ia tuuina i totonusi o Ana fanau se manao e ola i le filemu faatasi ma i latou uma o e siomia ai i latou.

"Ae ona o le Pa'ū ua manino mai ai o le ola i le lotogatasi o le a le faigofie. Na vave o'o mai mala. Na fasiotia e Kaino lona uso o Apelu. Na gauai atu le fanau a Atamu ma Eva i faaosoosoga a Satani. Faatasi ma le tomai, inoino, ma le fai togafiti, na tulituliloa ai e Satani lana sini. O le faafeagai o le faamoemoega o lo tatou Tama Faalelagi ma le Faaola. Na tuuina mai e i Laua mo i tatou le tuuifaatasiga atoatoa ma le fafia e faavavau. O Satani, lo Laua ma lo tatou fili, na iloaina le ata o le faaolataga mai lava a o le i faataunuina le Foafoaga. Ua ia iloaina e na o le ola e faavavau e mafai ai ona faatumauina na fegalegaleaiga fafia i aiga. E tau-mafai Satani e aveesea i tatou mai e pele ia i tatou, ma ia tatou faanoanoa. Ma o ia lea e totoina fatu o

le feesesesei i loto o tagata, ma le faamoemoe ina ia tatou feavaeaeai ma nonofo eseese.

Ua tatou lagonaina uma se mea e uiga i vaega uma o le tuuafatasia ma le tuu eseeseina. O nisi taimi i totonusi o aiga, ma atonu i nisi foi tulaga, ua tatou maua ai sina vaauga o le olaga pe a tuuina faamua-mua e se tasi mea e fiafia i ai le isi, nai lo ona lava manaoga, i le alofa ma le ositaulagaina. Ma ua tatou iloaina uma se mea e uiga i le faanoanoa ma le lagona tuua toatasi, o le tete'a ma le nofo toatasi. E le toe tau faailoa mai ia i tatou po o fea e tatau ona tatou filifilia. Ua tatou iloaina. Ae tatou te manaomia le faamoemoe ina ia mafai ona tatou maua le lotogatasi i lenei olaga ma agavaa ai e maua lena lotogatasi i le faavavau i le lalolagi a sau. Ma e ao ona tatou iloaina pe faapefea ona o'o mai lena faamanuiaga sili, ina ia tatou iloa ai le mea e tatau ona tatou faia.

Ua Faia e le Faaola Ina ia Mafai ona Maua le Lotogatasi

Na fetalai le Faaola o le lalolagi e uiga i lena lotogatasi, ma le auala e suia ai o tatou natura ina ia mafai ai ona tupu lena mea. Na Ia aoao manino mai e ala i le tatalo na Ia tuuina atu i Lana feilo-aiga mulimuli ma Ana Aposetolo, a o le i o'o i Lona maliu. O lena tatalo matagofie ma silisili, o loo faamauina i le tusi a Ioane. Ua lata i le taimi e feagai ai o Ia ma le osigataulaga matuia mo tatou uma, o le a mafai ai ona maua le ola e faavavau. Ua lata i le taimi o le a Ia tuua ai Aposetolo, o e na Ia faauuina, o e na Ia alofagia, ma o e o le a Ia tuuina i ai ki e taitai ai Lana Ekalesia. Ma o lea na Ia tatalo ai i Lona Tama, o le Alo ua atoatoa i le Matua ua atoatoa. Tatou te vaaia i Ana upu le auala o le a mafai ai e aiga ona faatasia, e faapena foi i fanau uma a lo tatou Tama Faalelagi, o e e mulimuli i le Faaola ma Ana auauna:

"Faapei ona e auina mai a'u i le lalolagi, ua faapei foi a'u ona auina atu o i latou i le lalolagi.

"Ou te faapaia foi a'u e sui ai i latou, ina ia faapaaina o i latou i le upu moni.

"E le faapito lau tatalo mo i latou nei, a o i latou foi e faatuatua ia te au ona o la latou upu;

"Ina ia tasi i latou uma; faapei o oe le Tama o i totonusi ia te au, o au foi o i totonusi ia te oe, ina ia tasi i latou i totonusi ia te i taua: ina ia talitonu le lalolagi ua e auina mai au" (Ioane 17:18–21).

I nai upu iti na, na Ia faamanino mai ai le auala e mafai ai e le talalelei a Iesu Keriso ona faia loto ina ia tasi. O i latou o e mafai ona talitonu i le upu moni na Ia aoaoina mai, o le a mafai ona taliaina sauniga ma feagaiga ua ofoina mai e Ana auauna faatagaina. O le mea lea, e ala i le usiusitai i na sauniga ma feagaiga, o le a suia ai o latou natura. O le auala lena e mafai ai ona faapaiaina i tatou e le Togiola a le Faaola. Ona mafai lea ona tatou nonofo i le lotogatasi, e pei ona tatau ai ona tatou maua le filemu i lenei olaga, ma mau faatasi ma le Tama ma Lona Alo i le faavavau.

O le galuega a aposetolo ma perofeta i na aso, e faapei o aso nei, o le aumaia o le fanau a Atamu ma Eva i se lotogatasi i le faatuatua ia Iesu Keriso. O le faamoemoega maualuga o mea na latou aoaoina, ma mea o loo latou aoaoina mai nei, o le tuu faatasia o aiga: o tane, ava, fanau, fanau a fanau, augatuaa, ma le mea mulimuli, o le aiga uma o Atamu ma Eva, o e o le a filifilia lena mea.

O Le Agaga e Taitai atu ai i le Tuufaatasiga ma Isi

Ua outou manatua le tatalo a le Faaola, "E sui ai i latou"—e faatatau i Aposetolo—"Ou te faapaia foi a'u, ina ia faapaiaina o i latou i le upu moni" (Ioane 17:19). O le Agaga Paia, o se na te faapaiaina tagata. Ua tatou mauaina e avea ma a tatou soa ona ua toefuataiina mai e le Alii le Perisitua Mekisateko, e ala i le perofeta o Iosefa Samita. O ki o lena perisitua ua i ai i le lalolagi i aso nei. O lona mana e mafai ai ona tatou osia feagaiga lea e mafai ai ona tatou maua le mafutaga faifai pea ma le Agaga Paia.

I le tulaga ua faatasi ai le Agaga ma tagata, atonu tatou te faamoemoeina ai le nonofo lelei. E tuuina e le Agaga le molimau o le upu moni i o latou loto, lea e tuufaatasia ai i latou o e fefaaosoiina lena molimau. E le tuuina mai e le Agaga o le Atua finauga (tagai i le 3 Nifae 11:29). Na te le tuuina mai lava lagona o le tuufaavasegaina o tagata, lea e taitai atu ai i le finauvale (tagai i le Joseph F. Smith, *Gospel Doctrine*, 5th ed. [1939], 131). Na te taitai atu i le filemu faaletagata lava ia ma se lagona o le tuufaatasia ma isi. E na te tuufaatasia agaga. O se aiga ua tuufaatasia, o se ekalesia ua tuufaatasia, ma se lalolagi ua i ai le filemu, e faalagolago i agaga ua tuufaatasia.

Tausiaina o Folafolaga e Faia i le Tatalo o le Faamanatuga

E o'o lava i se tamaitiiti, e mafai ona ia malamalamai le mea e ao ona fai ina ia maua ai le Agaga

Paia e avea o sana soa. Ua ta'u mai e le tatalo o le faamanatuga ia i tatou. Tatou te faalogoina i vaiaso taitasi, a o tatou auai i a tatou sauniga faamanatuga. I na taimi paia, tatou te faafouina ai feagaiga na tatou osia i le papatisoga. Ma e faamanatu mai e le Alii ia i tatou folafolaga na tatou mauaina, a o faamauina i tatou e avea ma tagata o le Ekalesia—le folafolaga o le a mafai ona tatou mauaina le Agaga Paia. O upu nei o le tatalo o le faamanatuga: "Latou te loto ina ave i o latou luga le suafa o lou Alo, ma manatua pea o Ia ma tausi i ana poloaiga ua ia tuuina mai ia te i latou, ina ia latou maua pea lona Agaga e faatasi ma i latou" (MF&F 20:77).

E mafai ona tatou mauaina Lona Agaga, e ala i le tausiaina o lena feagaiga. Muamua, tatou te folafola atu o le a tatou tauaveina Lona suafa i o tatou luga. O lona uiga, e ao ona tatou vaai ifo ia i tatou lava o Ana fanau. O le a tatou faamuamua o Ia i o tatou olaga. O le a tatou mananao i mea e finagalo ai o Ia, ae le o mea tatou te mananao i ai, po o mea ua aoao mai le lalolagi ia tatou mananao i ai. A o tatou mananao atu i mea o le lalolagi, o le a leai se filemu i totonu ia i tatou. O le taofimauna o se manatu mo se aiga, po o se malo, o le fiafia i mea faalelalolagi, o le a o'o mai ai le fevaevaeai ia i latou (tagai i le Harold B. Lee, *Ia Outou Tutu i Nofoaga Paia*[1974], 97). O le faataitaiga lelei o le faia i isi o mea e pei ona finagalo le Alii tatou te faia, lea e masani lava ona sosoo ai ma le tauaveina i o tatou luga o Lona suafa, e mafai ai ona aveina atu tatou i se isi tulaga faaleagaga, lea e aumai ai se vaega o le lagi i le lalolagi.

Lona lua, tatou te folafola atu e manatua pea o Ia. Tatou te faia lena mea i taimi uma tatou te tatalo atu ai i Lona suafa. Aemaise pe a tatou tatalo atu mo Lana faamagaloga, lea e tatau ona tatou faia sooo, tatou te manatuaina o Ia. I lena taimi, tatou te manatua ai Lana taulaga ua mafai ai ona maua le salamo ma le faamagaloga. Pe a tatou ole atu, tatou te manatuaina o Ia o lo tatou puluvaga i luma o le Tama. Pe a o'o mai lagona o le faamagaloina ma le filemu, tatou te manatuaina Lona onosai ma Lona alofa e le mavae. O lena manatuaina, e faatumulia ai o tatou loto i le alofa.

Tatou te tausia foi la tatou folafolaga ia manatua o Ia, pe a tatou tatalo faatasi o ni aiga, ma pe a tatou faiTauina tusitusiga paia. I le tatalo a le aiga i le laulau i le ti o le taeao, atonu e tatalo le tamaitiiti ina ia faamanuaina le isi, ina ia lelei mea uma o lena aso i se suega, po o nisi taumafaiga. Pe a o'o

mai faamanuiaga, o le tamaitiiti na faamanuiaina o le a manatua le alofa o le taeao ma le agalelei o le Puluvaga, o le ona le igoa lea na ofoina atu ai le tatalo. O le a fusia loto i le alofa.

Tatou te tausia a tatou feagaiga ina ia manatuaina o Ia i taimi uma tatou te faapotopotoina ai o tatou auaiga e faitau tusitusiga paia. Latou te molimau i le Alii o Iesu Keriso, aua o le savali lena, ma e sa faapea lava ona i ai e uiga i perofeta. E tusa lava pe le manatuaina e fanau upu, o le a latou manatuaina le Tusitala moni, o Iesu Keriso.

Usiusitai i Poloaiga Uma

Lona tolu, tatou te folafola atu a o tatou aai ma feinu i le faamanatuga e tausi Ana poloaiga, o poloaiga uma. O Peresitene J. Reuben Clark Jr., a o ia augani mai—e pei lava ona ia faia i le tele o taimi—mo le lotogatasi, i sana tautalaga i se konafesi aoao, na ia lapataiina ai tatou e uiga i lo tatou filifilia o mea tatou te usitaia. Na ia tuuina mai faapea: “E le i tuuina mai lava e le Alii se mea e le aoga pe le manaomia. Ua Ia faatumuina tusitusiga paia i mea e ao ona tatou faia ina ia mafai ai ona tatou maua le faaolataga.”

Sa faaaauau le saunoaga a Peresitene Clark e faapea: “Pe a tatou aai ma feinu i le faamanatuga, tatou te osi feagaiga ina ia usitaia ma tausia Ana poloaiga. E leai ni fetuutuunaiga. E leai ni tulaga failogaina, leai ni eseesege” (i le Conference Report, Apr. 1955, 10–11). Na aoao mai Peresitene Clark a tatou salamo i agasala uma, e le na o se agasala e tasi, ua tatou osi feagaiga e tausia poloaiga uma. I le fai-gata e pei ona tuuina mai ai, e leai se tulaga lavelave o i ai. Na o lo tatou gauai atu lava i le pule a le Faaola, ma folafola atu e usitai i soo se mea Na te poloaiina ai tatou (tagai Mosaea 3:19). O lo tatou lolo atu i le pule a Iesu Keriso, o le a mafai ai ona fusia faatas i tatou o ni aiga, o se Ekalesia, ma ni fanau a lo tatou Tama Faalelagi.

E tuuina mai e le Alii lena pule e ala mai i Ana perofeta, mo auauna lotomaulalo. O lena faatuatua e liliuina o tatou valaauga o se faiaoga o aiga, po o se faiaoga asiisi, e avea o se feau mai le Alii. Tatou te o atu mo Ia, i Lana faatonuga. O se alii le tau-aloa ma se soa talavou e o atu i aiga ma le faamoe-moe o le a fesoasoani mai mana o le lagi ia i laua e faamautino ua tuufaatasia aiga ma e leai se faatiga, pepelo, fetuiai, po o se upu leaga. O lena faatuatua—e faapea e valaauna e le Alii auauna—o le a fesoasoani ia i tatou e faagalo o latou faaletonu,

pe a latou aoaiina i tatou, e pei ona o le a latou faia ai. O le a sili atu ona manino la tatou vaai atu i o latou faamoemoega lelei, nai lo o latou faaletonu faaletagata soifua. O le a faiitiitia lo tatou lagona tiga, ae o le a sili atu le lagona o le faafetai mo le Matai na valaauna i latou.

O Le Alofa Mama e Taua tele mo le Lotogatasi

E i ai nisi o poloaiga, afai e solia, e faaumatiaina le lotogatasi. O nisi e aofia ai mea tatou te tautatala ai, ae o nisi e faatatau i le auala tatou te tali atu ai i upu e fai mai e isi tagata. E le tatau ona tatou faia ni tala taufaaleaga o soo se tasi. E ao ona tatou vaai atu i le lelei o le tasi ma le isi, ma ia tautala lelei e uiga i le isi, i soo se taimi tatou te mafai ai (tagai i le Tavita O. MaKei, i le Conference Report, Oct. 1967, 4–11).

I le taimi lava e tasi, e ao ona tatou tutu malosi e tetee atu ia i latou o e tautala faatauvaa i mea paia, aua o le aafiaga mautinoa o lena faatiga, o le faatiga i le Agaga, ma e tupu ai finauga ma le le mautonu. Na faaali mai e Peresitene Spencer W. Kimball le au-ala e tu atu ai e aunoa ma le fefinauai, a o ia taoto ai i luga o se moega i le falemai ma fai atu i se tagata faigaluega, o lē, i se taimi o le le fiafia, na ta'uina fua le suafa o le Alii: “Faamolemole! Faamolemole! O lo'u Alii lena e ona le suafa ua e faifai i ai.” Sa matua leai se pisa, ona faapea mai lea o se musu-musu tuulafoai: ‘Ou te faamalie atu’ (*The Teachings of Spencer W. Kimball* ed. Edward L. Kimball [1982], 198). “O se aoaiga musuia ma le alofa, e mafai ona avea o se valaaulia ia lotogatasi. O le le tuuina atu [o se aoaiga] pe a uunaia ai e le Agaga Paia, o le a oo atu ai i le feesesesei.”

Afai tatou te mananao ia lotogatasi, e i ai poloaiga e ao ona tatou tausia e uiga i o tatou lagona. E ao ona tatou faamagalo atu ma aua le i ai le loto tiga ia i latou e faatiga mai ia i tatou. Na faia e le Faaola le faataitaiga mai luga o le satauro: “Lo'u Tama e, ia e faamagaloina atu ia te i latou, aua ua latou le iloa le mea ua latou faia” Luka 23:34 Tatou te le iloaina loto o i latou o e faatiga ia i tatou. Pe tatou te tau-mafai foi ia iloaina mafuaaga uma o lo tatou ita ma tiga. Na ta'u mai e le Aposetolo o Paulo le auala tatou te faatino ai le alofa i se lalolagi o tagata le atoatoa, e aofia ai ma tatou, ina ua ia saunoa mai, “E onosai le alofa, e agamalu, e le losilos i le alofa, e le mitamita vale le alofa, e le faafefeteina, e le amio mataga, e le sailia e ia ana lava mea, e le faa-itaitagofie, e le tuuina atu i nisi le leaga” (1 Kori-nito 13:4–5). Ona ia tuuina mai lea o le lapataiga

mamalu e teenaina ai le tali atu i sese o isi ma faagaloina o tatou lava sese, ina ua ia tusia, "Aua o ona po nei tatou te vaavaai ai faanenefu i le faaata, a o ia ona po tatou te fesagai ai; o nei ona po ou te iloa ai faaleatoa, a o ia ona po ou te iloa tino ai ... iloatinoina o a'u " (1 Korinito 13:12).

Ia Tumau i le Mama ma Faaeteete i le Faamaualuga

O le tatalo o le faamanatuga e mafai ona faamantuina mai ia i tatou i vaiaso taitasi le auala e o'o mai ai le mealofoa o le lotogatasi e ala i le usiusitai i tulafono ma sauniga o le talalelei a Iesu Keriso. Pe a tatou tausia a tatou feagaiga e tauave i o tatou luga Lona suafa, ma manatua pea o Ia, ma tausi Ana poloaiga, o le a tatou maua le mafutaga ma Lona Agaga. O le a faamaluluina o tatou loto ma tuufaatasia i tatou. Peitai, e lua lapataiga e ao ona o mai faatasi ma lena folafolaga.

Muamua, e tumau le Agaga Paia ma i tatou, pe a tatou tumau i le mama ma saoloto mai le manao i mea o le lalolagi. O se filifiliga ina ia le mama, o le a teenaina ai le Agaga Paia. O le Agaga e nofo i totonu na o i latou o e filifilia le Alii nai lo le lalolagi. "Ia mama outou" (3 Nifae 20:41; MF&F 38:42) ma alofa i le Atua ma lou "loto, ... manatu, mafaufau, ma le malosi atoa" (MF&F 59:5) e le o ni fautuaga, ae o poloaiga. Ma e manaomia mo le mauaina o le mafutaga ma le Agaga, a aunoa ma lea mea, e le mafai ona tasi tatou.

O le isi lapataiga, o le faaeteete i le faamaualuga. O le lotogatasi e o'o mai i se aiga, po o se vaega o tagata e faamaluluina e le Agaga, o le a aumai ai le mana sili. Faatasi ma lena mana, o le a o'o mai ai le faamaoniga mai le lalolagi. Pe o lena faamaoniga e aumai ai le viiga po o le losilosi vale, atonu e mafai ona taitai atu ai i le faamaualuga. O le mea lena e faatiga i le Agaga. E i ai se puipuiga i le faamaualuga, lena puna mautinoa o le le lotogatasi. O le vaai atu lea i mea e tele ua sasaa mai e le Atua i o tatou luga, e le gata o se faailoga o Lona amanaiaina o tatou, ae o se avanoa e faatasi ai ma i latou o loo i o tatou autafa i auaunaga sili. O se tamaloa ma lana ava e aoao ina ia tasi e ala i le faaaogaina o o laua tulaga tutusa, ia malamalamai ai le tasi i le isi ma o laua eseesege e fefaamalosiau ai le tasi i le isi, e ala i le auauna o le tasi i le isi ma i latou ua siomia ai i laua. I le auala lava e tasi, e mafai ona tatou aufaatasi ma i latou o e le taliaina la tatou aoaoga faavae, ae faasoa atu lo tatou manao e faamanuaina le fanau a lo tatou Tama Faalelagi.

E mafai ona avea i tatou ma e faatupuina le filemu, agavaa e taua o e ua faamanuaina, ma fanau a le Atua (tagai i le Mataio 5:9).

O loo soifua le Atua lo tatou Tama. O Lona Alo pele, o Iesu Keriso, o le ao o lenei Ekalesia, ma ua ia ofoina atu mo i latou uma o e o le a taliaina, le tagavai o le filemu. Ou te molimau atu ai, i le suafa paia o Iesu Keriso, Amene.

7 UPUTUU A TUAA

VAAIGA AOAO FAALE-AOAOGA FAAVAE

O le aiga ua tatou fananau mai i ai, pe tutupu a'e ai fo'i, o le nofoaga lea tatou te aoaoina ai "tu ma aga a o tatou tama" (Enosa 1:14 tagai i le Faataoto 22:6). O *Tu ma Aga* o le malamalama, aganuu, faiga masani, ma talitonuga ia e tuufasolo mai lea augatupulaga i lea augatupulaga. *O augatuaa* o lona uiga o tuaa alii ma tamaitai i itu uma e lua o aiga o le tina ma le tama.

O nisi o fanau ua faamanuiaina i le i ai o matua amiotonu, o e aoaoina i latou i tu ma aga lelei faaleaiga. Ua amataina e Nifae lana faamaumauga, "O a'u o Nifae, na fanaua e matua lelei ..." (1 Nifae 1:1). Ua amataina e Enosa lana tusi i se auala foi faapea: "Faauta, sa oo ina ua iloa e a'u, o Enosa, o lo'u tama o se tagata amiotonu o ia—ona sa ia aoaoina a'u i lana gagana, ma i le aoaoga ma le apoapoaiga foi a le Alii—ma ia faamanuina lava le suafa o lo'u Atua mo lena mea ..." (Enosa:1:1).

O nisi fanau ua le faamanuiaina faapea i latou. Ua faamalamalama mai e le Mataupu Faavae ma Feagaiga 93:39–40 ia tulaga o le taitaiina atu o fanau e tu ma aga leaga i le amioletonu: "Ma ona sau lea o le amioleaga e toatasi lena, ma aveese mai le fanauga a tagata le malamalama ma le upumoni, e ala i le le usiusitai, ma ona o le uputuu a o latou tama.

"Ae ua ou poloaiina outou ia tausi a'e a outou fanau i le malamalama ma le upumoni."

MATAUPU FAAVAE

Ua i ai i matua le tiutetauave ina ia faatulagaina tu ma aga e faavae i le malamalama ma le upu moni, ona tuu faasolo atu lea i a latou fanau.

FAITAUGA MAI LE TUSI LESONA A LE TAGATA AOGA

Faitauga filifilia mai "Uputuu a Tuua" (361–62)

"O Uputuu a o Latou Tama," Elder Marion D. Hanks (362–65)

O A MEA E AOAO ATU

E mafai e fanau ona aoao malosi e uiga i le faaipoipoga mai le mataituina o o latou matua, ma le suesueina o a latou talafaasolopito faaleaiga.

FAUTUAGA I AUALA E AOAO ATU AI

 *Galuega fai mo talafaasolopito o aiga.* Talanoaina le uiga o le *tu ma aga* ua tuuina mai e Elder Marion D. Hanks i le tusi lesona a le tagata aoga (362, 364). Faasino tagata o le vasega i le galuega tusitusi e uiga i talafaasolopito o aiga lea na fai atu e faamae'aina mo le vasega o le aso lenei (tagai i le i. 18 i lenei tusi lesona). Fai atu i le vasega e faasoa mai a latou saililiga mai le vaega 1, e uiga i mea na tutupu i soifuaga o o latou tuaa, lea e mafai ona uunaia ai a latou lava faaipoipoga. (O mea e masani ona tutupu e aofia ai le auai mai i le Ekalesia, siitia atu i se aai po o se atunuue ese, o ese mai le mativa, mauaina o se aoaoga lelei, alu i se misiona, avea ma tagata muamua e faaipoipo i le malumalu.) Talanoaina pe mafai faapefea ona aafia a latou faaipoipoga e ala i le iloina o nei mea.

O le isi mea e sosoo ai, fai atu i tagata o le vasega e faasoa mai le vaega 2 o le galuega fai, mea na latou aoaoina e uiga i tulaga e tutusa ai latou ma o latou matua, po o matua o matua. Talanoaina faapuupuu le mataupu e uiga i "uiga faaleaiga," ma faasino atu o soa faale-faaipoipoga atonu e manaomia le faia o ni suiga, a o amataina o latou aiga.

O A MEA E AOAO ATU

Pe a tatou faaipoipo, o tu ma aga na tatou aoaoina mai matua, e mafai ona fesoasoani e tuufaatasia ma siitia ai i tatou i luga, pe mafai foi ona taitaiina ai i tatou i feteenaiga ma fevaevaeaiga.

FAUTUAGA I AUALA E AOAO ATU AI

 **Talanoaga.** Talanoaina mau o loo i le "Faataitaiga o Uputuu Sese" (tusi lesona a le tagata aoga, 361). O fea atonu tatou te mauaina ai tulaga faapea o tutupu i aso nei?

Tufaaga 5. Tufa atu le tufaaga 5, "Tu ma Aga Masani Faaleaiga," o loo maua i le faaiuga o lenei tusi lesona (itulau. 37–38). Fai atu i tagata o le vasega ina ia taitasi ma faaopoopo atu i le lisi o tu ma aga i le koluma muamua o siata taitasi. Ona tuu atu lea ia i latou e faatumuina tu ma aga a aiga o le tane ma le ava, i le mea e gata ai lo latou mafai.

Vaevae le vasega i vaega e lua pe tolu (taumafai e faafefiloai alii ma tamaitai) ma fai atu ia i latou e faatusatusa a latou lisi o tu ma aga masani faaleaiga. Faamalamalama atu o tu ma aga e aumai e le tane ma le ava, atonu e tutusa pe le tutusa foi. Tuu atu i vaega taitasi:

- Ia faailoa mai vaega e tutusa ai tu ma aga a le tane ma le ava, ma vaega atonu e ono feteenai ai.
- Mafaufau i tu ma aga e tusa ai ma lo latou malamalama i le ata o le faaolataga.
- Fautua atu tu ma aga amiontonu atonu e mananao le ulugalii e faatutu pe faaauau.

A mae'a se sefulu minute, fai atu i nisi o vaega e faasoa mai mea na latou aoaoina mai le gaoioiga. Ia uunaia ulugalii faaipoipo ma e ua sauni e faaipoipo, e faatumu faatasi vaega o totoe o a latou siata.

O A MEA E AOAO ATU

*O ulugalii fou e mafai
ona atiina ae a latou
lava tu ma aga, e fua-
fua i manaoga faaleta-
gata lava ia ma
mataupu faavae o le
talalelei.*

FAUTUAGA I AUALA E AOAO ATU AI



Talanoaga. Fesili atu: O le a le mau e te manatu e sili ona sii soo mai e uiga i le faaipoipoga? Tuu atu i tagata o le vasega e su'e le Kenese 2:24; Mataio 19:5; Mareko 10:7; Efeso 5:3; Mose 3:24 ma le Aperaamo 5:18 Faitau faatasi le Kenese 2:24.

- O le a le uiga o le tuua o lou tama ma lou tina? (Faatasi ma isi mea, o lona uiga ua feagai ulugalii ma le faatutuina o tu ma aga fou.)
- E mafai faapefea ona foiaina e ulugalii feeseseseaiga po o feteenaiga?
- O le a le uiga o le “ava i lou tama ma lou tina: ina ia faalevaleva ai ou aso i le nuu o le a foaiina mai e Ieova lou Atua ia te oe” (Esoto 20:12 tagai i le 1 Nifae 17:55).
- E gata ea lenei poloaiga pe a tatou faaipoipo?

Faitau ma talanoaina mau eseese i lalo o le “Faatumauina o Uputuu Amiontonu” (tusi lesona a le tagata aoga, 361). Fai atu ni fesili e pei o nei:

- O le a le tala a Nifae ma Enosa e uiga i tu ma aga na la aoaoina mai o laua matua? Aisea?
- O a nisi o auala tatou te faamautinoaina ai ua tatou aoaoina tu ma aga amiontonu i a tatou fanau?

FAAIUGA

Iloilo manatu nei:

- O le aiga na tatou tutupu a'e ai, o le nofoaga lea tatou te aoaoina ai tu ma aga a o tatou augatama (tagai i le Faataoto 22:6).
- O nisi tu ma aga e faavae i le ata o le faaolataga. O lo tatou tiutetauave le sailia ma taofimau i nei mea.
- O isi tu ma aga e le ogatasi ma le ata o le faaolataga. O lo tatou tiutetauave o le faailoaina ma aua le tuufaasoloina atu na mea (tagai i le Mosaea 25:12; Alema 3:11; Alema 37:9).
- O isi tu ma aga e le sa'o pe sese foi, ae mafai lava ona avea ma puna o feteenaiga. E tatau i ulugalii ona galulue faatasi e filifili po o fea o nei mea e tuufaasolo atu.
- O le malamalamama ma le mulimuli i tusitusiga paia ma aoaoga a perofeta, ua fesoasoani ia i tatou e iloa ai le mea taua e ao ina taofimau, ma le mea e le tatau (tagai i le 1 Nifae 3:19; 5:21; 2 Nifae 25:26; MF&F 68:25).

Manatua: Faamanatu i tagata o le vasega e faamae'a faitauga faatonuina, ae le i o mai i vasega taitasi.

Tufaaga 5 • Tu ma Aga Masani Faale-Aiga

8 O FESOOITAIGA MAFANA I LE FAAIPOIPOGA

VAAIGA AOAO FAALE-AOAOGA FAAVAE

Manatua: Aua ne'i faaopoopoina ni faamatalaga e sili atu i lenei mataupu nai lo le mea ua tuuina mai e le Usoga.

“Ona avea ai lea o i laua ma tino e tasi” (Kenes 2:24).

Na aoao mai Peresitene Spencer W. Kimball: “E tele itu e alofa ai i totonu o le faaipoipoga, ma o feusuaiga o se tasi o na mea taua. E pei lava ona le fuafuaina paaga faaipoipo mo isi, ae ua *fuafuaina* i latou mo le tasi ma le isi. Na silafia e Paulo tau-mafaiga agai i le mulilua, ma auala e aloese mai ai:

“... ia taitasi le tane ma lana lava ava, ia taitasi foi le fafine ma lana lava tane.

“Ia avatu e le tane i le ava le agalelei e tatau ai: ia faapea foi le ava i le tane.

“E le pule le ava i lona lava tino, na o le tane: e faapea foi le tane, e le pule ia i lona lava tino, na o le ava.

“Aua ne'i faafiti le tasi i le tasi, seia iloga lava lua te lotogatasi ai i nai aso, ina ia oulua faasaga i le anapogi ma le tatalo; ma ia toe faatasi ane i le mea e tasi, ina ne'i faaosooso mai Satani ia te oulua, ona o lo oulua le lava onosai.’ (1 Kor. 7:2–5.)” (O Le Vavega o le Faamagalo Atu[1969], 73).

O le tuufatasiga o le alii ma le tamaitai ua faapaiaina i le faaipoipoga ma avea ai o se faaaliga o le alofa, lotogatasi, ma le tulaga e mafai ai e le ulugalii ona avea ma atua. Na tusia e Peresitene Iosefa F. Samita, “O le fesootaiga faatulafonoina o feusuaiga ua faauuina e le Atua, e le gata o se auala o le faatupulaia o ituaiga o tagata, ae mo le atiina ae o tulaga maualuga ma uiga faatupu o le natura faaletagata, lea ua na o mafutaga e faatupuina i le alofa musuia o le alii ma le tamaitai, e mafai ai ona faamausaliina” (“Unchastity the Dominant Evil of the Age,” *Improvement Era* June 1917, 739; po o le tusi lesona a le tagata aoga, 147).

MATAUPU FAAVAE

O se malamalama sa'o i le fesootaiga mafana i le faaipoipoga, e faateleina ai o tatou avanoa mo le fausiaina o se faaipoipoga fiafia.

FAITAUGA MAI LE TUSI LESONA A LE TAGATA AOGA

Aoaoga Filifilia mai le “O Fesootaiga Mafana i le Faaipoipoga” (147–49)

“O Le Punavai o le Ola,” Elder Boyd K. Packer (149–55)

“O Le Faailoga Silisili o le Faatasiga Atoatoa” ma le “O Se Faailoga o le Va Feagai ai ma le Atua,” i le “Mama Faaletagata Lava Ia,” Elder Jeffrey R. Holland (250–51)

Aoaoga Filifilia mai le “Fuafuaina o le Fanauina o Fanau” (16–18)

“E i ai La'u Fesili,” Dr. Homer Ellsworth (18–20)

O A MEA E AOAO ATU

O sootaga vavalalata faaletino i totonu o le faaipoipoga, o se faamanuiaga ua faauuina e le Atua.

FAUTUAGA I AUALA E AOAO ATU AI

 **Talanoaga.** Faamalamalama atu o loo tele vaiga filogia i le lalolagi i aso nei e uiga i sootaga faalefeusaiga, lea afai e talitonu i ai ma faataitaia, e mafai ona faaumati a lo tatou fiafia. E taua lo tatou malamalama i o tatou mana e foafoa ai fanau e tusa ai ma le ata o le faaolataga.

Faitau ma talanoaina le faamatalaga lenei mai le *Tusitalima o Faatonuga a le Ekallesia*: “O ulugalii faaipoipo … e tatau ona malamalama o sootaga faale-feusaiga totonu o le faaipoipoga ua faatagaina e le Atua, e le gata mo le faamoemoega o le foafoaina o fanau, ae o se auala foi o le faaaliga o le alofa ma le faamalosiaina o lagona ma noataga faaleagaga, i le va o le tane ma le ava” (*Tusitalima 1: Au Peresitene o Siteki ma Au Epikopo*[1998], 158).

Faitau le Aperaamo 4:27–28 Faailoa atu i le fuaiupu e 28 ua ta’ua ai e le Atua le mana e uluola ma faatumulia ai le lalolagi o se faamanuiaga.

Ia taitaia se talanoaga a le vasega, e faataatau i faitauga filifilia nei mai faitauga a tagata o le vasega mo lenei lesona: “O Fesootaiga Mafana Faaletino ua Faauuina e le Atua” (tusi lesona a le tagata aoga, 147–48), “O Fesootaiga Mafana Faaletino e Na o le Faaipoipoga e Faia ai,” “O Faamoemoega o Fesootaiga Mafana” (148), “O Le Punavai o le Ola” (149–55), ia mafaufau i fesili nei o se vaega o la outou talanoaga:

- E faapefea ona avea o tatou lagona loloto faalenatura na aumaia e le Atua, o se faamanuiaga mo i tatou?
- E faapefea ona avea sootaga faalefeusaiga i totonu o le faaipoipoga, ma faatusa silisili o le tuufaatasiga atoatoa?
- E faapefea ona avea mana o le foafoaina o fanau i totonu o le faaipoipoga, ma faatusa o lo tatou sootaga ma le Atua?
- E faapefea ona faaaogaina i aso nei le poloaiga, ia uluola ma faatumulia ai le lalolagi?
- Aisea ua fuafuaina ai uunaiga o le foafoaina o fanau, ina ia malolosi ma fai-fai pea?

Ia faamamafa atu o le mana e foafoa ai e mai le Atua ma e paia, ae ua na o le va lava o le alii ma le tamaitai i totonu o le faaipoipoga e alagatatau ai. Tuuina atu le molimau i le moni o nei mataupu faavae ma faamanuiaga o le usiusitai. (Aua nei se ese atu i auiliiliga patino o la oulua sootaga ma lou toalua.)

O A MEA E AOAO ATU

E ono tupu le faaaogaina sese o fesootaiga vavalalata faaletino, e o’o lava i totonu o le sootaga o le faaipoipoga.

FAUTUAGA I AUALA E AOAO ATU AI

 **Talanoaga.** Faitau faatasi faamatalaga mai le Usoga i lalo o le “Faaaogaina Sese o Fesootaiga Mafana Faaletino” (“O Fesootaiga Mafana i le Faaipoipoga,” tusi lesona a le tagata aoga, 147).

O A MEA E AOAO ATU

"O le alofa i totomu o le faaipoipoga e faaauauina ai feusuaiiga"

(*Spencer W. Kimball, The Teachings of Spencer W. Kimball, ed. Edward L. Kimball [1982], 248.*)

FAUTUAGA I AUALA E AOAO ATU AI



Talanoaga. Faamalamalama atu o nisi taimi e soona tuuina atu ai e ulugalii le faamamafa i tulaga faaletino o le faaipoipoga. O sootaga vavalalata faaletino, o se elemene taua o le alofa ua faaipoipoina, peitai, e sili atu tulaga ua manaomia mai e ausia ai se alofa mama.

Na aoao mai Peresitene Spencer W. Kimball: "O lou alofa, e pei o se fugalaau, e ao ona faafaaileleina. O le a o'o mai le alofa sili ma le fefaalagolagoai i le va o oulua, aua o lo oulua alofa o se alofa paia. E loloto, faaaofiaina, e lautele. E le pei o lena fegalegaleaiga faale-lalolagi, ua faaigoaina o le alofa faaigoaina sese, lea e tele lava i le tosina atu i le vaaiga faaletino. Pe a faavaeina le faaipoipoga i le na o lenei, o le a vave ona uma le fiafia o itu uma e lua. O le a motusia ma i ai se teteaga, ma o le a i ai se isi vaaiga fou mo se isi faaipoipoga, lea e le pine ae uma foi. O le alofa lea e fetalai i ai le Alii, e le gata ina tosina faaletino, a o le tosinaga faaleagaga. O le faatuatua, talitonuina ma le malamalama o le tasi i le isi. O se paaga atoatoa. O le mafutaga faatasi ma manatu ma alafua tutusa. O le le manatu faapito, ma le osi-taulagaina o le tasi mo le isi. O le tulaga mama i manatu ma faatinoga, ma le faatuatua i le Atua ma le polokalama. O le tulaga faamatua i le olaga faitino, ma le vaai atu pea lava pea i le tulaga faale-Atua ma le foafoaga, ma le faafaaileleina o fanau. E lautele, ma e le gata. O lenei ituaiga o alofa, e le vaivai pe mavae. E ola pea i taimi o ma'i ma faanoanoaga, i taimi o le solo lelei ma le leai o se mea, i taimi o le manumalo ma le le fiafia, i le taimi nei ma le faavavau" *Faith Precedes the Miracle* [1972], 130–31; po o le tusi lesona a le tagata aoga, 148).

Fai atu i tagata o le vasega e faitau le "Alofa Atoatoa" i le saunoaga a Elder Boyd K. Packer "O le Punavai o le Alofa" (tusi lesona a le tagata aoga, 149) ma saili uiga ma mea masani e fesoasoani ia i tatou e ausia ai se alofa mama ma atoatoa. Ia lisi saililiiga a tagata o le vasega i luga o le laupapa. Ia aotele mai faapea o le alofa mama e manaomia ai le taimi ma se taumafaiga malosi ina ia ausia ai. O fesootaiga mafana faaletino i le faaipoipoga, o se vaega o le faagasologa ina ia tasi ma le Alii.

O A MEA E AOAO ATU

E tatau i ulugalii faaipoipo ona taulimaina mataupu o le fuafuaina o le fanauina o fanau.

FAUTUAGA I AUALA E AOAO ATU AI



Galuega fai faavaega. Tagai i le vaega "Fuafuaina o le Fanauina o Fanau" i le tusi lesona a le tagata aoga (itulau. 16–20). Valaaulia tagata o le vasega e faitau, pe toe iloilo le vaega i fafo o le vasega. Faamalamalama atu o nei mataupu e patino i le tagata ma e paia. E tatau i le tane ma le ava ona faia faaiuga e faatatau i le fuafuaina o le fanauina o fanau i le lotogatasi, pe a maea ona sailia le taitaiga a le Agaga. Uunaia tagata o le vasega, pe a i ai ni a latou fesili, ia saili atu mo fautuaga mai matua ma taitai perisitua.

FAAIUGA

Mai lava i le amataga, na faamanino mai ai e le Alii, "E le lelei ina toatasi o le tagata, ou te faia sona fesoasoani e tatau ma ia" (Kenese 2:18). Na saunoa mai le Apostolo o Paulo, "e leai se tane pe a le o i ai le fafine, e leai foi se fafine pe a le o i ai le tane, i le Alii" (1 Korinito 11:11).

Pe a tatou malamalama i sootaga vavalalata faaletino faatasi ma le vaaiga mo le ata o le faaolataga, ma ua usiusitai i le Alii, e mafai ona tatou aloese mai le tele o faafitauli o loo ua lolo ai le lalolagi, o se taunuuga o le le amanaiaina o le tulafono o le ola mama. O tane ma ava ua fusia faatasi i le alofa ma le faamaoni a'ia'i, o le a mafai ona olioli i la laua sootaga faaletino ma fesoasoani i le Alii e faataunu. Ona faamoemoega o le uluola ma faatumuina le lalolagi.

9 O ESEESEGA NA FANANAU MAI MA TANE MA FAFINE

VAAIGA AOAO FAALE-AOAOGA FAAVAE

Na aoao mai le Apostolo o Paulo e uiga i meaalofa esese a tagata o le Ekalesia: “Aua faapei o itu tino e tele i le tino e tasi, a e le tasi se faiva i itu tino uma: “E faapea i tatou nei le toatele, ua tino e tasi ia Keriso, ma ua fefaafeagaiai itu tino. “O loo eseese foi a tatou mea e tufaina mai i le alofa tunoa ua foaiina mai ia te i tatou” (Roma 12:4–6).

Na faatatau mai e Elder Henry B. Eyring o le Korama a Apostolo e Toasefululua lenei manatu faavae i le sootaga faalefaipoipoga: “E aoaoina e se alii ma lana ava ina ia tasi e ala i le faaaogaina o mea e tutusa ai ina ia malamalama ai le tasi i le isi, ma o laua eseesega ina ia viia e le tasi le isi i le auaua atu o le tasi i le isi, atoa ai ma e o loo siomia ai i laua” (i le Conference Report, Apr. 1998, 89; po o le *Liahona*, Me 1998, 68).

MATAUPU FAAVAE

O le agaga fiafia ma le fausiaina i luga o eseesega i le va o alii ma tamaitai, e mafai ona faateleina ai le nofouta, malamalama, ma le fiafia i le faipoipoga.

FAITAUGA MAI LE TUSI LESONA A LE TAGATA AOGA

Aoaoga filifilia mai le “O Eseesega na Fananau mai ma Tane ma Fafine” (66–68)

“Mo Le Taimi Nei ma le Faavavau Atoa,” Elder Boyd K. Packer (69–72)

“O Le Aiga: O Se Folafolaga i le Lalolagi,” o le Au Peresitene Sili ma le Korama a Apostolo e Toasefululua (89–90)

Aoaoga Filifilia mai le “Tulaga Tutusa o Alii ma Tamaitai” (84–85)

FAATAMAOAIGAINA O LE FAIAOGA

Peresitene Gordon B. Hinckley, *Maatulimanu o se Aiga Fiafia* (tamaitusi, 1984; po o le tusi lesona a le tagata aoga, 135)

Elder Richard G. Scott, “O Le Olioli i le Ola ai i le Fuafuaga Sili o le Fiafia” (i le Conference Report, Oct. 1996, 100–104; po o le *Liahona*, Nov. 1996, 73–75; tusi lesona a le tagata aoga, 386)

O A MEA E AOAO ATU

O le malamalama i eseesega i le va o alii ma tamaitai, e mafai ona fesoasoani i ulugalii e ausia ai le lotogatasi i le faaipoipoga.

O A MEA E AOAO ATU

E i ai “tiute ma avanoa eseese o alii ma tamaitai e taua tele i le faataunuina o le fuafuaga sili o le fiafia” (Dallin H. Oaks, i le Conference Report, Oct. 1993, 99; po o le Liahona, Nov. 1993, 73; tusi lesona a le tagata aoga, 277).

O A MEA E AOAO ATU

Ua i ai i alii ma tamaitai matafaioi e eseese ae taua tutusa i totonu o aiga.

FAUTUAGA I AUALA E AOAO ATU AI



Galuega fai faavaega. Tufa atu le tufaaga 6, “O Fesili i ‘Eseesega na Fananau mai ma Tane ma Fafine,” o loo maua i le faaiuga o lenei lesona (i. 46). Vaevae le vasega i ni vaega laiti, ma atofa atu i vaega taitasi nisi o faamatalaga mai Ao-aoga Filifilia mai “Eseesega na Fananau mai ma Tane ma Fafine” (tusi lesona a le tagata aoga, 66–68). Valaulia vaega taitasi e saili tali o fesili, e faalagolago i aoaoga o loo ia latou faitauga atofaina. Tuu atu ia i latou e lipoti mai mea ua latou maua i le vasega.

FAUTUAGA I AUALA E AOAO ATU AI



Talanoaga. Tuu atu i le vasega e su'e i le saunoaga a Elder Boyd K. Packer “Mo Le Taimi Nei ma le Faavavau Atoa” (tusi lesona a le tagata aoga, 69–72), ma talanoaina fesili nei:

- O a auala e faaaogaina e Lusifelo e faaleagaina ai le mafutaga mafana, alofa, faaipoipoga, ma tulaga faamatua?
- O a auala ua faaalia ai e le Alii lona faatauaina o le tulaga tutusa o alii ma tamaitai?
- O le a le uiga ia te oe i aso nei, o le tiutetauave ia uluola ma faatumulia ai le lalolagi?
- I taimi faigata o le tamaoaiga, e faapefea ona faataunuina e tina o latou tiute-tauave o le tuuina atu i a latou fanau o le “tausiga atoatoa e manaomia”? (i. 68).
- O le a le faamoemoega e faavavau mo le eseesega i le va o matafaioi a alii ma tamaitai?
- O le a le mea o loo faailoa mai i le faataoto o ki ma oa natia e uiga i le tulaga tutusa o alii ma tamaitai?
- O a faamanuiaga e mafai ona maua, pe a faaaogaina e alii ma tamaitai taitoatasi a latou ki e tatalaina ai le pusa tupe?
- O a talitonuga o aso nei, ua suitulaga ai i latou o e taumafai e suia ki ina ia faafetaui ma o latou manao?

FAUTUAGA I AUALA E AOAO ATU AI



Talanoaga. Tuu atu i tagata o le vasega e faitau le “O Le Aiga: O Se Folafolaga i le Lalolagi” ma saili fuaiupu e faatatau i matafaioi felagolagomai o alii ma tamaitai i le aiga. Tuu atu i tagata o le vasega e faitau leotole a latou fuaiupu, ma talanoaina faatasi ma le vasega.

FAAIUGA

Iiloilo le faamatalaga mai ia Elder Richard G. Scott o le Korama a le Toasefululua e uiga i natura felagolagomai o alii ma tamaitai:

“I le fuafuaga a le Alii, e manaomia le toalua—o se alii ma se tamaitai—e fausia ai se mea atoa. E moni lava, o se tane ma se ava e le o ni ‘afa tutusa lelei, ae o se mea ofoofogia, tuufaatasiga paia o agavaa ma uiga felagolagomai.

"O le faaipoipoga e faatagaina ai nei uiga eseese e tuufaatasi i le loto e tasi—i le lotogatasi—e faamanuiaina ai le tane ma le ava, o a la fanau ma fanau a fanau. Mo le fiafia sili ma le ola manuia i le olaga, e manaomia uma le tane ma le ava. O a la taumafaiga e fesootai ma felagolagomai. Ua i ai ia i laua taitoatasi uiga e sili ona fetaui ma matafaioi ua faamatala mai e le Alii mo le fiafia o se alii ma se tamaitai. Pe a faaaogaina e pei ona fuafuaina e le Alii, o na agavaa e faatagaina ai ulugalii faaipoipo e manatunatu, faatino, ma olioli o se vaega e tasi—e feagai ai ma luitau ma faatoilaloina faatasi i latou, ina ia tuputupua'e i le alofa ma le malamalama, ma ala i sauniga o le malumalu, ina ia fusia faatasi o se tasi, i le faavavau. O le fuafuaga lena" (tusi lesona a le tagata aoga, 69).

Tufaaga 6 • Fesili e uiga i “Eseesega Na Fananau mai ma Tane ma Fafine”

O nei fesili e faatatau i faamatalaga i le tusi lesona a le tagata aoga (66–68, 84).

- E faapefea e se faalogoga loloto o se tina, ona fesoasoani ia te ia e fesootai ai i mea patino o le tausia o fanau i le aiga? (Peresitene Harold B. Lee)
- Aisea e faalagolago ai alii ma tamaitai i le tasi ma le isi i le ausiaina o o latou gafatia atoatoa? (Peresitene Spencer W. Kimball)
- O a auala e sili atu ai tomai ua umia e tamaitai nai lo alii? E faapefea e se manao o se tamaitai e fia pei o se alii, ona aveesea ai lona tomai e faataunuu le fuafuaga na faia ai o ia. (Peresitene Howard W. Hunter)
- E faapefea e se malamalamamaaga o a tatou tautinoga i le muai olaga o ni atalii ma afafine o le Atua, ona fesoasoani ia i tatou e malamalamama lelei ma ola ai i le talalelei? (Peresitene James E. Faust)
- Aisea e taua ai mo matua ona le faamalosia uunaiga e faavaivaia ai eseesege o natura o alii ma tamaitai? (Peresitene Boyd K. Packer)
- O a nisi o eseesege taua i le va o alii ma tamaitai? (Elder Thomas S. Monson)
- E faapefea e eseesege felagolagomai i le va o alii ma tamaitai ona avea ma ki i le fuafuaga o le fiafia a le Alii? (Elder Boyd K. Packer)
- E faapefea ona tausia e i latou ua umia le perisitua a latou ava ma isi tamaitai i o latou aiga? (Elder James E. Faust)
- O a nisi o tulafono ma aganuu e uiga i le tausiaina o alii ma tamaitai ua suia, ina ia “faasa’oina ai sese tuai na e le i faavaeina lava i mataupu faavae e faavavau” (Elder Dallin H. Oaks)
- E faapefea ona faatagaina e le faaipoipoga uiga o alii ma tamaitai ina ia o mai faatasi ai i le loto e tasi? (Elder Richard G. Scott)
- O anafea na fuafuaina ai tiutetauave o tamaitai, alii, tina, ma le perisitua? (Elder Neal A. Maxwell)
- E faapefea ona fesoasoani le malamalamama i lo tatou natura paia, i alii ma tamaitai e faaaloalogia ai e le tasi le isi? (Elder Merrill J. Bateman)

10 O MATAFAIOI MA TIUTETAUAVE PAIA O ALII

VAAIGA AOAO FAALE-AOAOGA FAAVAE

“Na faaeeina e lo tatou Tama Faalelagi i luga o ona atalii ma afafine uiga patino faapitoa e fetaui lelei ma o latou tiutetauave, a o latou faataunuina Lana fuafuaga. Ina ia mulimulitaia Lana fuafuaga, e manaomia ai lou faia o mea na ua la faamoemoeina mai ia te oe, i le avea ai o se atalii po o se afafine, tane po o se ava” (Richard G. Scott; i le Conference Report, Oct. 1996, 101; po o le *Liahona* Nov. 1996, 73; tusi lesona a le tagata aoga, 369).

MATAUPU FAAVAE

O tane o e faataunuina o latou tiutetauave paia faaleaiga, ua latou saofaga i le fiafia o a latou faaipoipoga.

FAITAUGA MAI LE TUSI LESONA A LE TAGATA AOGA

“O Le Aiga: O Se Folafolaga i le Lalolagi,” o le Au Peresitene Sili ma le Korama a Aposetolo e Toasefululu (89–90)

“O o tatou Tiutetauave Paia,” Peresitene Gordon B. Hinckley (22–26)

“Mo Tamā i Israelu,” Peresitene Ezra Taft Benson (216–19)

“O le Avea ai ma se Tane ma se Tamā Amiotonu,” Peresitene Howard W. Hunter (219–22)

FAATAMAOAIGAINA O LE FAIAOGA

“Ola Agavaa mo le Tamaitai o le a e Faaipoipo i ai i se Aso,” Peresitene Gordon B. Hinckley (i le Conference Report, Apr. 1998, 66–69; po o le *Liahona*, Me 1998, 49–51; tusi lesona a le tagata aoga, 222–26)

O A MEA E AOAO ATU

*O le Folafolaga i le
Aiga, ua faailoa mai ai
tiutetauave taua e tolu
mo tamā.*

FAUTUAGA I AUALA E AOAO ATU AI

 **Talanoaga.** Faitau faatasi le parakalafa 7 o le “O Le Aiga: O se Folafolaga i le lalolagi” (tusi lesona a le tagata aoga, 89–90). Fai i tagata o le vasega e saili tiute taua e tolu o tamā mai lenei faitauga. Tusi upu *Pule faamalumalu, Saunia, Puipui* i luga o le laupapa. Fai i tagata o le vasega e faamatala tiute taitasi i le mea e gata ai lo latou mafai. Fesili pe o faatagaina mai i le parakalafa 7 o le folafolaga, se tina e faataunu nei tiute. Talanoa faapuupuu mea e ono manaomia ai ona faatinoina e se tina tiutetauave, ia e masani lava ona faia e tamā.

O A MEA E AOAO ATU

*O e umia le perisitua
ua faamoemoe e ola
e tusa ai ma o latou
tiutetauave o ni tane
ma tamā.*

FAUTUAGA I AUALA E AOAO ATU AI



Galuega Fai Faavaega. Vaevae le vasega i ni vaega se tolu, ma tuuina atu se tasi o lauga mai i faitauga o le tusi lesona a le tagata aoga ua lisiina atu i lalo mo vaega taitasi. Valaaulia vaega taitasi e faitau la latou lauga ma lisi tiutetauave o tane ma tamā o loo i ai. Ia tuuina atu foi i vaega taitasi e talanoaina le fesili o loo i lalo e o faatasi ma la latou lauga. A mae'a, valaaulia i latou e faasoa mai a latou lisi ma lipoti mai taunuuga o a latou talanoaga.

- “O o Tatou Tiutetauave Paia” (22–26). Na taua e Peresitene Hinckley faanoanoaga e o’o mai i aiga ona o gaoioga a tane ma tamā. O a mea e mafai e alii ona faia e faamautinoa ai, e le o latou le mafuaaga o nei faanoanoaga?
- “Mo Tamā i Isaraelu” (216–19). E faapefea ona saunia tamā, ma i latou ua faamoemoe e avea ma tamā, e faataunu o latou tiutetauave ua lisiina mai e Peresitene Benson?
- “Avea ma se Tane ma se Tamā Amiotonu” (219–22). O a faafatiatamai ma suiga e ono taofia tane ma tamā mai le faataunuina o tiutetauave ua lisiina mai e Peresitene Hunter? E faapefea ona tatou faatoilaloina nei faafitaui?

FAAIUGA

E fesoasoani le ata o le faaolataga i tane e malamalama ai i le mea ua faamoemoeina mai ia i latou i sootaga o le faaipoipoga ma aiga. Ua faamalamalama mai i le “O Le Aiga: O Se Folafolaga i le Lalolagi” o tane ma tamā e gafa ma le *pulefaamalu-malu* i o latou aiga i le alofa ma le amiontu, *saunia* mea e manaomia o le olaga, ma *puiipui* o latou aiga. O loo faaauau ona faamanino mai e perofeta a le Atua tiutetauave o tane ma tamā.

11 O MATAFAIOI MA TIUTETAUAVE PAIA O TAMAITAI

VAAIGA AOAO FAALE-AOAOGA FAAVAE

“E leai se faamaoniga sili atu e mafai ona o’o mai ia te oe i lenei lalolagi, nai lo le ta’ua o oe o se tamaitai o le Atua. E leai se tulaga sili atu, e mafai ona faaeeina atu ia te oe, nai lo le avea ma afafine o le Atua, le mauaina o fegalegaleaiga moni faatamaitai, tulaga faale-avā, ma faale-tina, po o nisi galuega e uunaia ai olaga mo le lelei” (Spencer W. Kimball, “O le Matafaioi a Tamaitai Amiontonu,” *Liahona*, Nov. 1979, 102; po o le tusi lesona a le tagata aoga, 374).

MATAUPU FAAVAE

A o mamanuina e tamaitai o latou olaga e tusa ma le ata o le faaolataga, o le a mafai ona sili atu lo latou ausiaina o le fiafia i le faaipoipoga.

FAITAUGA MAI LE TUSI LESONA A LE TAGATA AOGA

Aoaoga Filifilia mai le “O Matafaioi ma Tiutauave Paia o Tamaitai” (371–74)

“Mo Tina i Siona,” Peresitene Ezra Taft Benson (377–82)

“O Tamaitai o le Ekalesia,” Peresitene Gordon B. Hinckley (382–86)

“O Le Olioli i le Ola ai i le Fuafuaga Sili o le Fiafia,” Elder Richard G. Scott (386–89)

“O I Tatou o Tamaitai o le Atua,” Sister Sheri L. Dew (389–92)

O A MEA E AOAO ATU

Ua i ai i Tamaitai tiuteauave taua mo le fausiaina o le Ekalesia.

FAUTUAGA I AUALA E AOAO ATU AI

 **Talanoaga.** Fesili: E faapefea ona saofagā tamaitai i le atiina ae o le Ekalesia? Faitau le saunoaga lenei a Peresitene Spencer W. Kimball:

“O le tele o le tuputupu a’e iloga ua o’o mai i le Ekalesia i aso mulimuli … o le a tupu i le tulaga e toe tomanatu ai tamaitai o le Ekalesia i le amiontonu ma le poto e fuafua mea i o latou olaga, ma i le tulaga e vaavia ai tamaitai o le Ekalesia i ni auala fiafia—iloga ma ese—mai tamaitai o le lalolagi” (“O Le Matafaioi a Tamaitai Amiontonu,” *Liahona*, Nov. 1979, 103–4; po o le tusi lesona a le tagata aoga, 374).

- O le a le mea na saunoa Peresitene Kimball e ao i tamaitai o le Ekalesia ona faia e fesoasoani ai i le Ekalesia ina ia tupu?
- O le a sou manatu i le uiga o le faaupuga, o tamaitai o le Ekalesia ina ia “iloga ma ese” mai tamaitai o le lalolagi?

I le faamalamalamaina e faapea o le faaolataga e faavavau o le lalolagi, e faalagolago i le tuputupu a’e o le Ekalesia i lona tulaga e tatau ai. O le tele o le tuputupu a’e o le Ekalesia, e faalagolago lea i tamaitai o le Ekalesia i le faataunuina o o latou tiutetauave i le avea ai ma afafine o le Atua.

O A MEA E AOAO ATU

Ina ia ausia o latou tiutetauave paia, e ao i tamaitai o le Ekalesia ona "o ese mai le lalolagi, ma faalatalata atu ia Keriso."

FAUTUAGA I AUALA E AOAO ATU AI



Galuega fai faavaega. Vaevae le laupapa i vaega tutusa e fa. I luga o vaega taitasi, tusi ai ulutala nei: *O Faiga Masani e ao i Tamaitai o le Atua ona Aloese Ai, ma O Tiutetauave ma Avanoa o Tamaitai o le Atua.*

Vaevae le vasega i vaega e fa, ma tuu atu i vaega taitasi se lauga mai faitauga i le tusi lesona a le tagata aoga. Tuu atu ia i latou le sefululima minute e faitau ai a latou lauga, ma saili aoaoga e faatatau i ulutala. Ia tuu atu le avanoa mo se tasi mai vaega taitasi e lipoti ma talanoa mai i a latou sailiiliga, a o aoteleina e se tasi o sui o le vaega i luga o le laupapa.

Iloilo faatasi ma tamaitai o le vasega le valaaulia mai ia Sister Sheri L. Dew, o le sa avea ma fesoasoani i le au peresitene aoao o le Aualofa, o loo maua i le itulau 389 o le tusi lesona a le tagata aoga ("Ou te valaaulia i tatou taitoatasina ia saili se mea se tasi e mafai ona tatou faia e o ese mai ai i le lalolagi, ma faalatalata atili atu ai ia Keriso. Ona faapena foi lea i le isi masina. Ma le isi masina"). Ia molimau atu i le tiutetauave paia ua i ai o tamaitai o le Atua i le faaolataga e faavavau o tagata soifua. Uunaia alii i lau vasega ina ia faaaloalogia ma faamamaluina tamaitai i o latou olaga.

FAAIUGA

O matafaioi paia a tamaitai, e aofia ai le avea ma afafine o le Atua, uso, ava, ma tina. Na aoao mai Elder Richard G. Scott o le Korama a Aposetolo e Toasefululu:

"Na faaee mai e lo tatou Tama Faalelagi i luga o Ona atalii ma afafine ni uiga tulaga ese e fetaui lelei ma o latou tiutetauave taitasi, a o latou faataunuuina Lana fuafuaga. Ina ia mulimuli i Lana fuafuaga, e manaomia ai lou faatinoina o mea na faamoe-moeina e Ia mai ia te oe, i le avea ai ma atalii po o se afafine, tane po o le ava.

"... Ua tofu lava tagata taitoatasina ma uiga e sili ona fetaui ma le matafaioi ua fuafuaina e le Alii mo le fiafia, i le avea ai ma se alii ma se tamaitai" (i le Conference Report, Oke. 1996; 101; po o le *Liahona*, Nov. 1996, 73; tusi lesona a le tagata aoga, 386).

12 FAATULAGAINA O MANAOGA E FAAMUAMUA O LE OLAGA

VAAIGA AOAO FAALE-AOAOGA FAAVAE

Na saunoa Peresitene Spencer W. Kimball e uiga i le “manaoia o le faia o mea e sili ona taua e aunoa ma le tuua o isi mea e le faia” (i le Conference Report, Apr. 1976, 70; po o le *Liahona*, Me 1976, 46).

Pe a tatou tauivi e faapalenii mea taua e faamuamua i o tatou olaga, o le a faateleina o tatou avanoa mo le manua i vaega uma, e aofia ai sootaga faale-faaipoipoga ma le aiga. Na faamalamalama mai e Elder M. Russell Ballard o le Korama a Aposetolo e Toasefululua, “Masalo, afai tou te sailia i o outou foi loto, ma lototele e iloilo faamuamua i o outou olaga, atonu o le a outou iloa ai, e pei ona sa ou faia, e manaoia se paleni sili atu i mea ua e faamuamuaina” (i le Conference Report, Apr. 1987, 14–15; po o le *Liahona*, Me 1987, 13; tusi lesona a le tagata aoga, 299).

Na aoao mai Peresitene Tavita O. MaKei, “E leai se isi manuia sili e mafai ona suitulaga i le toilalo i le aiga” (i le Conference Report, Ape. 1964, 5).

MATAUPU FAAVAE

O le fiafia i le faaipoipoga ma le aiga e mafai ona tupu, pe a tatou taulai atu i mea e sili ona taua.

FAITAUGA MAI LE TUSI LESONA A LE TAGATA AOGA

Aoaoga Filifilia mai le “O Faamuamua ma Faapaleni” (294–95)

“Faatumauina o le Paleni i Mea Manaoia o le Olaga,” Elder M. Russell Ballard (299–301)

“A o Le Mea Lava e Tasi e Ao Ina ia Maua’: Ia Avea ma Tamaitai Faatuatua Tele ia Keriso,” Sister Patricia T. Holland (392–99)

“O Le Aiga: O Se Folafolaga i le Lalolagi,” o le Au Peresitene Sili ma le Korama a Aposetolo e Toasefululua (89–90)

O A MEA E AOAO ATU

O mea tatou te faamuamua e tatau ona atagia ai tulaga faatauaina e faavavau.

FAUTUAGA I AUALA E AOAO ATU AI

 **Talanoaga.** Faitau le faamatalaga lenei mai ia Elder M. Russell Ballard: “O se tasi o luitau sili o lenei olaga o le faatulagaina lea o mea e faamuamua i le olaga. A tatou le faia ma le poto, ona avea lea o mea e sili ona taua i le olaga ma mea e sili ona le faatauaina” (“Be Strong in the Lord, and in the Power of His Might” [CES fireside for young adults, 3 Mar. 2002], 6).

Tusi ulutala ia i luga o le laupapa *Mo se taimi le tumau* ma le *Faavavau*. Fai i tagata o le vasega e lisi mea faalealolagi, pe le tumau, ma mea e mafai ona faavavau mo i tatou. (“O mea e le tumau” e mafai ona aofia ai tupe, taavale, meaafale, tafaoga, tautaua, laei, malosi faapolotiki, ma taalogia. “O le Faavavau” e mafai ona aofia ai le faaipoipoga, auaiga, perisitua, auaunaga, malamalama, o se tino toetu, molimau.)

A o faateleina e tagata o le vasega le lisi o mea na e mafai ona faavavau, fesoasoani ia i latou ia iloa le natura e faavavau o le faaipoipoga, o se tino toetu, ma le mana o le perisitua.

O A MEA E AOAO ATU

*O le faavaeina o mea
sa'o e faamuamua e
manaomia ai se vaiga
e faavavau.*

FAUTUAGA I AUALA E AOAO ATU AI



Talanoaga. Faitau i aoaoga filifilia mai le “O Faamuamua ma Faapalenii” (tusi lesona a le tagata aoga, 294–95). A o e faitau, talanoaina fesili e pei o fesili nei:

- Elder Neal A. Maxwell. Aisea e taua ai mo tatou le “iloa o a tatou mea faamuamua moni”? Na faapefea ona faatuina e le Alii le faataitaiga mo i tatou?
- Peresitene Spencer W. Kimball. E faapefea ona tatou faatusatusaina le taua o le paleni i o tatou olaga i ki o se piano?
- Peresitene Ezra Taft Benson. O le a le mea e tupu i o tatou olaga, pe a tatou faamuamuaina le Atua?
- Elder Dallin H. Oaks. O a faataitaiga e mafai ona outou tuuina mai e faailoa ai mea tatou te faamuamua e fuafua i ai mea tatou le sailia i le olaga?
- Peresitene Ezra Taft Benson. O le a se tasi o mea e tatau ona tatou muai faamuamua?
- Elder John A. Widtsoe. O le fea e faamuamua, aiga po o le ekalesia? Aisea?
- Elder Neal A. Maxwell. O le a le mea e tatau ona faia e matua ma matua o matua taitasi? Aisea?
- Tusi a le Au Peresitene Sili o le 27 Fepuari 1999. O le a le savali autu o le tusi lenei mai le Au Peresitene Sili?

Faasoa atu le fautuaga lenei mai ia Elder Russell M. Nelson o le Korama a Aposetolo e Toasefululu:

“E faapefea ona e fuafuaina le mea e te *faamuamua* Fesili ifo ia te oe: O le a tonu lava le mea ou te manao i ai, le mea e sili i mea uma? Faatusatusa lau tali i le alafua sili ua faaalia mai e lou Foafoa. Na ia fetalai mai e ao ona e ‘saili muamua e fausia le malo o le Atua, ae le o mea o le lalolagi, ma faatuina Lana amiotonu, ona faaopoopoina atu lea o ia mea uma ia te outou’ JST, Mataio 6:38 tagai foi i le Mataio 6:33 E te fausiaina le malo o le Atua, a o e faamuamua lou aiga. O le tiutetauave aupito maualuga faaleperisitua a se tane o le alofa ma faapelepele i lana ava, faamanua o ia ma la laua fanau. O le valaauga aupito maualuga a se ava, o le alofa i lana tane ma faafailele la laua fanau. A o e auauna i le Alii, ia iloa o lou ‘tiute ua i ai i le ekalesia e faavavau, ma ua pogai lenei mea ona o [lou] aiga’(MF&F 23:3)”(*Identity, Priority, and Blessings* [CES fireside for young adults, 10 Sept. 2000, 5; *Ensign*, Aug. 2001, 11–12).

O A MEA E AOAO ATU

*E le tatau ona faataga-
ina manaoga o le olaga
e faalofituina ai mea o
le faavavau tatou te
faamuamua.*

FAUTUAGA MO AUALA E AOAO ATU AI



Talanoaga. Ia aotele ia vaega muamua e lua o le “Faatumauina o le Paleni i Mea Manaomia i le Olaga,” saunia e Elder M. Russell Ballard (tusi lesona a le tagata aoga, 299–301). Talanoaina pe faapefeara e le iloiloina o a tatou feagaiga ona faapalenina o tatou olaga. Iloilo faapuupuu mataupu faavae taitasi mo le faapalenina o manaoga o le olaga o loo i le saunoaga a Elder Ballard.



Talanoaga o le tusi lesona a le tagata aoga. Saili mo mea e faamuamua o loo taua i le “O Le Aiga: O Se Folafolaga i le Lalolagi” (tusi lesona a le tagata aoga, 89–90). Atonu e fesoasoani lenei lisi i la outou talanoaga:

- Ua i ai i matua le tiutetauave ina ia “alofa ma tausi e le tasi le isi.”
- Ua i ai i matua le tiutetauave ina ia alofa ma tausi “a la fanau.”
- E tatau i matua ona “tausia a latou fanau i le alofa ma le amiontonu.”
- E tatau i matua ona “tuuina atu i ai mea e manaomia faaletino ma faale-agaga.”
- E tatau i matua ona aoao a latou fanau “e alolofa ma feauaunaa’i.”
- E tatau i matua ona aoao a latou fanau “ia tausia poloaiga a le Atua.”
- E tatau i matua ona aoao a latou fanau “ia avea ma tagatanuu usiusitai i tulafono i soo se mea latou te nonofo ai.”

Fai atu i tagata o le vasega e toe tagai i le lisi ma fesili ifo “E faapefeara ona tatou ...” i le amataga o mataupu faavae taitasi (mo se faataitaiga, “E faapefeara ona tatou alolofa ma tausi e le tasi le isi?”). Ia saunia tali ma talanoaina.



Talanoaga. Aotele le tusiga, “A o le Mea Lava e Tasi e Ao Ina Ia Maua”: Ia Avea ma Tamaitai Faatuatua Tele ia Keriso,” saunia e Sister Patricia T. Holland (tusi lesona a le tagata aoga, 392–99). Iloilo faigata na fetaiai ma Sister Holland i lona taumafai ai e faatumauina manaoga o le olaga ia paleni. Faasoa atu le auala na ia mauaina ai le filemu i lona olaga, ma auala patino na ia maua ai le paleni. Po o le tofia o se tagata o le vasega e saunia se lipoti e faatatau i lenei tusiga.

FAAIUGA

Gaoioiga aoaoina a tagata o le vasega. Fesili: Na tuuina mai ea e le Atua ia i tatou se mau e faamanino mai ai Ana mea e faamuamua? A maea ona tuuina mai tali a tagata o le vasega, faiata leotele le Mose 1:39 ma le parakalafa lona tolu mai ia Elder Maxwell i lalo o Aoaoga Filifilia mai le “O Faamuamua ma Faapaleni” (tusi lesona a le tagata aoga, 294). Molimau atu i tagata o le vasega, o lo tatou mulimuli i faataitaiga a le Faaola, e mafai ai ona tatou iloa la tatou misiona ma faatulaga tatau ai a tatou mea e faamuamua.

13 TUPE MA LE FAAIPOIPOGA

VAAIGA AOAO FAALE-AOAOGA FAAVAE

"Ma o le a outou le tuu a outou fanau ia latou o fia aai, pe le lavalava" (Mosaea 4:14).

"Ua i ai i matua se tiute paia e tausia a latou fanau i le alofa ma le amiotonu, ia tuuina atu i ai mea e manaomia faaletino ma le faaleagaga. ... O tane ma ava—tina ma tama—o le a latou tali atu i le Atua mo le faataunuina o nei mea e ao ona faia" ("O Le Aiga: O Se Folafolaga i le Lalolagi," tusi lesona a le tagata aoga, 89).

"Ae tou te lei saili mo le oa, ia outou saili mo le malo o le Atua.

"Ma pe a uma ona outou maua o se faamoemoe ia Keriso o le a outou maua oa, pe afai tou te sailia; ma ia outou sailia e fai ai mea lelei—e faaofu ai e ua le lavalava, ma fafaga ai e ua fia aai, ma faasaoloto e ua faatagataotauaina, ma avatu ai le fesoasoani i e ua mamai ma puapuagatia" (Iakopo 2:17–19; tagai foi i le MF&F 19:34).

"E ao ona outou faaaauau ona faatumauina i mafaufau, o le faaletino ma le faaleagaga ua tuufaatasia. E le mavavaeeseina. E le mafai ona faataunuina le tasi e au noa ma le isi, i taimi uma o lo tatou i ai i le olaga faitino" (Joseph F. Smith, i le Conference Report, Oct. 1900, 46; po o le tusi lesona a le tagata aoga, 10; tagai i le MF&F 29:34).

MATAUPU FAAVAE

O le faaaogaina o mataupu faavae sao e faatatau i tuge, e faateleina ai le mafai ona maua o se faaiipoipoga fiafia.

FAITAUGA MAI I LE TUSI LESONA A LE TAGATA AOOGA

Aoaoga Filifilia mai "Mea Tautupe" (123)

"Tasi mo le Tupe: Taiala mo Mea Tautupe a le Aiga," Elder Marvin J. Ashton (123–28)

"Matapeapea, Manatu Faapito, ma le Soona Faaloloto," Elder Joe J. Christensen (128–31)

O A MEA E AOAO ATU

O o tatou uiga e faatau i tuge e mafai ona aafia ai lo tatou faaolataga.

FAUTUAGA I AUALA E AOAO ATU AI

 **Talanoaga.** Faitau le saunoaga a Elder Dallin H. Oaks o loo i lalo o Aoaoga Filifilia mai le "Mea Tautupe" (tusi lesona a le tagata aoga, 123).

- E tusa ai ma le saunoaga a Elder Oaks, o a auala e mafai ai e le taufaasese o oa ona titinaina ese ia fua o le talalelei?
- E mafai faapefea ona suia ia oa ina ia faamanuiaina ai le galuega a le Alii?

O A MEA E AOAO ATU

*O mataupu faavae tonu
mo le puleaina o tupe,
o loo aoao mai e le
Usoga.*

FAUTUAGA I AUALA E AOAO ATU AI



Talanoaga. Iloilo le “Tasi mo le Tupe: Taiala mo Mea Tautupe a le Aiga,” mai ia Elder Marvin J. Ashton, o le sa avea ma sui o le Korama a Aposetolo e Toasefululu (tusi lesona a le tagata aoga, 123–28). Na tuuina mai e Elder Ashton fautuaga e sefululua e mafai ona fesoasoani ia i tatou e pulea ai mea tautupe a le tagata lava ia ma aiga. Valaaulia tagata o le vasega e talanoaina luitau atonu e feagai ma se tagata, po o se aiga, i vaega taitasi o loo i lalo, ma ofo atu ni vaifofo.

1. Totogi se sefuluai faamaoni.
2. Aoao e pulea tupe, a o le i puleaina e tupe oe.
3. Aoao le loto pulea ma le loto taofiofi i mea tau tupe.
4. Faaaoga se paketi.
5. Ia vave aoao tagata o le aiga i le taua o le galue ma tupe maua.
6. Aoao fanau ina ia faia faaiuga tautupe, e tusa ma lo latou malosi e malamalamai ai.
7. Aoao tagata taitasi o le aiga e fesoasoani i le soifua manuia o le aiga atoa.
8. Avea aoaoga o se taumafaiga faifaipea.
9. Galue mo le mauaina o sou lava fale.
10. Ia faaaofia lelei oe i se polokalama inisiua.
11. Ia malamalamai le uunaiga a malosiaga mai fafo, i mea tautupe ma teugatupe a le aiga.
12. Ia faaaofia lelei oe i se polokalama e faaputu ai meaai ma saunia mo faalavelave faafuasei.

Valaaulia tagata o le vasega e saili mo mataupu faavae i le faamatalaga lenei a Peresitene Gordon B. Hinckley:

“E maeu le lagona lelei e maua ina ua saoloto mai aitalafu, i le i ai o sina tupe itiiti e faaagaga mo se aso e tupu ai se faalavelave faafuasei, ma mafai ona tapa i ai pe a manaomia.

“Atonu o le a le tauina atu e Peresitene Faust lava ia lenei mea. Atonu e mafai ona ou tauina atu, ona ia aveeseina lea mai ia te au mulimuli ane. Na i ai sana mokesi o lona fale na totogi atu ai se tupe tului e 4 pasene. Atonu o le a faapea atu le tele o tagata ia te ia, ua faavalevalea tele ma le totogi uma o lena mokesi, ae maualalo tele le tupe tului. Peitai, o le avanoa muamua lava na mauaina ai e i laua ma lona faletua nai tupe faasili, na la mafaufau ai loa e totogi faauma la laua mokesi. Na ia saoloto mai le nofo aitalafu talu mai lena aso. O le mafuaaga lena o lona mata ataata, ma o le mafuaaga lena o lona mapumapu ma faia ana galuega.

“Ou te uunaia outou, uso e, ina ia vaavaai i le tulaga o i ai a outou mea tau tupe. Ou te uunaia outou ina ia faaeteete ia outou tupe faaaluu; ia pulea a outou faatauga ina ia aloese mai le nofo aitalafu i le mea e gata ai lou mafai. Ia vave ona totogi aitalafu, ma faasaolotoina oe mai le nofo pologa.

“O se vaega lenei o le talalelei faaletino lea tatou te talitonu i ai. Ia faamanuia-in a outou e le Alii, ou uso pele, ina ia faatulagaina lelei o outou fale. Afai ua totogi a outou aitalafu, afai o i ai se tupe faaleoleo, e tusa lava pe itiiti, afai ae o’o mai matagi malolosi, o le a i ai le lafitaga mo a outou ava ma fanau, ma le

filemu i o outou loto" (i le Conference Report, Oct. 1998, 71–72; po o le *Liahona* Nov. 1998, 54; tusi lesona a le tagata aoga, 63).

Valaaulia tagata o le vasega e faasoa mai mataupu faavae na latou mauaina mai i faamatalaga, na faatoa maea ona faitauina.

 **Talanoaga.** Fai atu fesili e pei o fesili nei:

- O le a le fuaiupu i le Mataio 6 e mafai ona faaaogaina e aoao ai mataupu faavae tautupe sili ona faigofie? Mataio 6:33: "Ia outou muai saili le malo o le Atua."
- O a nisi o tulaga matautia o le nofo aitalafu i oloa faatau?
- E faapefea ona fesoasoani le kalena mo le taofia o le nofo aitalafu a Elder Ashton e faaitiitia ai, pe faaumatia ai le nofo aitalafu e le manaomia? (tagai i le tusi lesona a le tagata aoga, 123).

 **Talanoaga.** Tagai i le saunoaga a Elder Joe J. Christensen, "Matapeapea, Manatu Faapito, ma le Soona Faaloloto" (tusi lesona a le tagata aoga, 128–31). Faamalamalama atu, o le tamaoaiga ma oa faalelalolagi e mafai ona taufaamatau i tagata taitoatasi ma faaipoipoga, e pei lava o le tulaga mativa. Na tuuina mai e Elder Christensen fautuaga e fa e faaitiitia ai aafiaga le lelei o le oa faalelalolagi. Vaevae fautuaga e fa i vaega o tagata o le vasega, ma fai atu ia i latou e talanoa pe faapefea ona latou faaaogaina i o latou olaga faaulugalii. A maea le lima minute o le talanoaga, ia fai atu e lipoti mai a latou saililiga i le vasega.

O A MEA E AOAO ATU

Ua aoao mai e tuisutusiga paia mataupu faavae e faatatau i le puleaina o tupe.

FAUTUAGA I AUALA E AOAO ATU AI

 **Gaoioiga faale-tusitusiga paia.** Faamalamalama atu e mafai e tupe ona faamunuina tatou i o tatou olaga faaleaiga, pe mafai foi ona faalavelavea ai lo tatou alualu i luma faaleagaga. O le tulaga o le avea o tupe ma faamanuiaga, po o le faalavelaveina, e faalagolago i o tatou uiga ma amioga. E fesoasoani tusitusiga paia ia i tatou, e iloa ai le taua o le tupe mai se vaaiga e faavavau.

Faitau ma talanoaina le Mataupu Faavae ma Feagaiga 38:39 ma le Iakopo 2:18–19 E mafai faapefea ona faaaogaina le oa e faamanuia ai o tatou aiga?

Galuega fai faavaega. Faitau nisi o mau nei o se vasega, ma fesili i tagata o le vasega po o a mataupu faavae tautupe e mafai ona maua mai ai: Mataio 6:19–21; 25:14–18; 1 Korinto 2:12; Efeso 5:20; Kalatia 6:7; 1 Timoteo 6:7–10; 2 Nifae 9:51.

FAAIUGA

Afai e faaaogaina i se vaaiga e faavavau, e mafai ona avea tupe o se faamanuiaga i faaipoipoga e faavavau. Afai e faaaogaina i se vaaiga faalelalolagi, o faafitauli tautupe e mafai ona faaumatiaina faaipoipoga. Ua aoaoina i tatou e tusitusiga paia ma perofeta i mataupu faavae e mafai ona fesoasoani ia i tatou e faaaoga ai tupe i au-ala o le a faamanuiaina ai i tatou ma o tatou aiga.

14 PULEAINA O PUNAOA FAALETINO

VAAIGA AOAO FAALE-AOAOGA FAAVAE

Na aoao mai Peresitene Heber J. Grant: "Afai o i ai se mea e tasi e aumai ai le filemu ma le lotomalie i le loto o le tagata soifua, ma totonusi o le aiga, o le ola lea e tusa ma mea tatou te maua. Ma afai e i ai se mea e tasi e olopalaina, ma faalotovaivai ma taufaamatau, o le i ai lea o aitalafu e le mafai ona totogi ma matafai e le mafai ona faatino" (*Relief Society Magazine*, May 1932, 302).

I le onosefulu ono tausaga mulimuli ane, na ta'u atu ai e Peresitene Gordon B. Hinckley i le au perisitua i le konafesi: "O le mea lea, uso e, ou te manao e faamanino atu ou te le o vavalou atu, o lea ou te le o valoiaina tausaga o le oge i le lumana'i. Ae o lea ou te fautua atu, ua o'o mai le taimi e faatulaga ai o tatou fale. . . .

"Ou te timai atu ia te outou, uso e, ina ia vaai i le tulaga o a outou mea tau tupe. Ou te timai atu ia te outou ina ia taofiofa a outou tupe faaalu; ia pulea outou loto ia outou faatauga ina ia aloese mai le nofo aitalafu, i le mea e gata ai le mafai. Ia totogi aitalafu i le vave e mafai ai, ma faasaolotoina outou mai le nofo pologa" (i le Conference Report, Oct. 1998, 70, 72; po o le *Liahona* Nov. 1998, 53–54; tusi lesona a le tagata aoga, 63–65).

MATAUPU FAAVAE

O le fiafia i le faaiipoipoga, e sili atu ona mafai ona taunu pe afai e saunia ulugalii i le taimi nei mo taimi faigata o le tamaoaiga.

FAITAUGA MAI LE TUSI LESONA A LE TAGATA AOGA

"Mo Tama ma Tamā," Peresitene Gordon B. Hinckley (63–65)

Aoaoga Filifilia mai le "Aitalafu" (62–63)

Aoaoga Filifilia mai le "Sauniuniga Faaletino" (350–52)

O A MEA E AOAO ATU

Ia malamalama i le natura o le aitalafu. "Ua o'o mai le taimi e faatulagaina ai o tatou fale."

FAUTUAGA I AUALA E AOAO ATU AI

 **Talanoaga.** Faitau ma faatusatusa faamatalaga mai ia Peresitene Heber J. Grant ma Gordon B. Hinckley i le "Vaaiga Aoao Faale-Aoaoga Faavae" o loo i luga. Fai atu i tagata o le vasega e saili le mataupu faavae autu o loo i faamatalaga nei.

 **Galuega fai faavaega.** Tuu atu i tagata o le vasega e sue i le saunoaga a Peresitene Hinckley, "Mo Tama ma Tamā" (tusi lesona a le tagata aoga, 63–65). Aisea e popole ai perofeta a le Atua e uiga i a tatou mataupu faaletino?

Vaevae le vasega i ni vaega laiti, ma tuu atu i vaega taitasi se vaega o le saunoaga a Peresitene Hinckley. Fai atu i tagata o le vasega e saili mo aoaoga e faauma ai fuaiupu nei: *Ina ia saunia mo le lumanai, e ao ona tatou* _____

A maea ni nai minute, tuu atu i vaega e lipoti mai a latou sailiiliga. E mafai ona aofia ai mea nei:

- Ia malamalama i le tupe tului, ma aloese mai le totogiina o lena tupe.
- Faatau se fale e mafai ona tatou gafatia.
- Saunia mo faalavelave faafuasei.
- Ia ola e tusa ma mea ua tatou maua.
- Ia ola faalagolago le tagata ia te ia lava.
- Ia taofiofi le soona faaalu o tupe.
- Ia pulea a tatou faatauga, ina ia aloese ai mai le aitalafu.
- Ia totogia aitalafu i le vave tatou te mafai ai.
- Ia teuina se tupe faaleoleo, e tusa lava pe itiiti.
- Fai atu i tagata o le vasega e talanoa pe faapefea ona latou faaaogaina nei ao-goga i o latou olaga.

Faitau le saunoaga mai ia Elder James E. Faust i le itulau 60 ma fesili atu:

- O a faataitaiga e mafai ona outou aumaia o le tuu eseeseina i le va o manoga ma mea e manaomia?
- O le a le mea ua saunoa mai ai Elder Faust o se vaega taua o le tutoatasi?
(O le saoloto mai le nofo aitalafu faaletagata lava ia)

Faitau le saunoaga lenei mai ia Peresitene J. Reuben Clark Jr., o le sa avea ma fesoasoani i le Au Peresitene Sili:

“O le tului e le tulemoe, pe ma’i, pe faaumatia; e le alu lava i le falemai; e galue i Aso Sa ma aso malolo; e le alu lava i se tafaoga; e le asiasi pe malaga foi; e le fiafia i se mea; e le tulia lava mai le galuega, pe faamalolo mai foi i le galuega; e le faatiitia itula e faigaluega ai; e le oge i fua o faatoaga pe naumati i le suavai; e le totogia ni ana lafoga, na te le faatauina ni meaai; e le ofuina ni lavalava; e le nofo i se fale ma leai sona aiga ma o le mafuaaga lena e leai ni galuega lypea e faia, e le toe suia, leai ni lau e toe atoina, galuega palama, vali, po o le fufuluina faapaepae; e leai foi sana ava, fanau, tama, tina, po o ni ona tei e tau vaavaai; e leai se tupe faaalu, e leai ni faaipoipoga, po o ni failele, po o maliu, e leai se alofa, po o se mataalofa, e matua malo ma aunoa ma se agaga, e pei o se tifato o maaolo. O le taimi lava e te nofo aitalafu ai, e avea ai le tului ma au soa i minute uma o le ao ma le po, e le mafai ona e tafisea, pe sola ese mai ai, e le mafai ona e faateaesina, e le tuuina atu e le gata i aioiga, talosaga, faatonuga, ma soo se taimi lava e te faalavelave ai i lona ala, pe sopoia lona auala, po o le le mafai ona faataunu o ana faatonuga, na te olopalaina oe” (i le Conference Report, Apr. 1938, 103).

Fesili atu i tagata o le vasega mo auala e faauma ai le fuaiupu lenei: “O le tului e

”

O A MEA E AOAO ATU

"Ae afai ua outou sau-nia o le a outou le matata'u" (MF&F 38:30).

FAUTUAGA I AUALA E AOAO ATU AI



Talanoaga. Fai atu i tagata o le vasega e faamatala se mea na tupu, na fesoasoani ai le sauniuniga ia i latou e faatino ma le talitonuga ia te ia lava e sili atu (e pei o le aoga, musika, po o taalogia).

- E tusa ai ma le Matapu Faavae ma Feagaiga 38:30 e faapefea ona fesootai le sauniuniga i le mata'u?
- Aisea e taua ai le sauniuniga i le aumaia o se taunuuga lelei?

Faamalamalama atu o le saunia faaletino e aofia ai le sili atu nai lo le alu ese mai le aitalafu. Faasoa atu faamatalaga nei mai Aooga Filifilia i le "Sauniuniga Faalelino" (tusi lesona a le tagata aoga, 350–52). Fai atu i tagata o le vasega pe faapefea e le faalogo atu o le tasi i le isi, ona mafai ona fesoasoani e aveesea le mata'u mai o tatou olaga.

- “O le ola faautauta' e [aofia] ai le fuafuaina ma le poto o matapu tau tupe” (Spencer W. Kimball, 350).
- “Tatou te aoaoina o tatou tagata ina ia ola i tulafono o le soifua maloloina” (Spencer W. Kimball, 350).
- “O le tulaga e tatau ai, tatou te manaomia ona sailia le galuega lena e fetau lelei ma lo tatou manao, e ala i le poto, ma le aoaoina” (Howard W. Hunter, 351).
- “O le a se mea e mafai ona tatou faia e faaleleia atili ai mea tautupe a o tatou aiga? Sei o'u fautuaina atu ki taua e tolu e mafai ona fesoasoani ia i tatou. O ia mea o le *uiga faaalia, fuafua lelei, ma le loto pulea*” (M. Russell Ballard, 351).
- “O le faavae o le ola faalagolago o le tagata ia te ia lava, o le galue malosi. E tatau ona aoaoina e matua a latou fanau, o le galue o le mea lea e mua-mua i le tulaga mafaia ma le manuia o soo se taumafaiga aoga” (Joseph B. Wirthlin, 352).
- “Matou te valaau atu i Au Paia o Aso e Gata Ai i soo se mea, ina ia faamalolosia ma faamatagofieina le aiga i taumafaiga fou i vaega faapitoa nei: sauniaina o taumafa, faasaoina, teuina; o le sauniaina ma le teuina o isi mea e le o ni taumafa” (Spencer W. Kimball, 352).
- “Ou te fesili atu ia te outou ma le loto atoa, ua outou saunia ea mo outou aiga se sapalai o taumafa mo le tausaga atoa, lavalava, ma, i tulaga e mafai ai, ni suauu?” (Ezra Taft Benson, 352).

FAAIUGA

Fesili atu i tagata o le vasega, po o le a lo tatou uiga e tatau ona i ai e faatatau i le saunia. O a sini atonu e tatau ona outou faatutuina ina ia avea ai ma tagata saunia? Molimau atu e mafai ona tatou aoao e ola e tusa ma mea ua tatou maua, ma mulimuli i le fautuaga ina ia saunia faaletino.

16 FAATUMAUINA O LE OLA O LE ALOFA

VAAIGA AOAO FAALE-AOAOGA FAAVAE

“O le fiafia i le olaga faaleaiga e sili ona mafai ona ausia pe a faavaeina i luga o ao-aoga a le Alii o Iesu Keriso” (“O Le Aiga: O Se Folafolaga i le Lalolagi,” *Liahona* Nov. 1995, 102; po o le tusi lesona a le tagata aoga, 89). Na aoao mai Paulo, “O outou tane, ia outou alolofa atu i a outou lava ava, faapei o Keriso foi ona alofa mai i le ekalesia, ma foaiina e ia ia te ia e fai mona sui” (Efeso 5:25).

Na saunoa mai Elder David B. Haight o le Korama a Aposetolo e Toasefululua, i le iva sefulu-lima ai o tausaga o lona soifua: “I le mae’ a ai ona ma faaipoipo mo le 70 tausaga, e mafai ona ou fai atu ia te outou uma, e mafai ona faaleleia atili, e mafai ona faaleleia atili i lea tausaga ma lea tausaga, faatasi ma le taua ma le mu’amu’ a ma le iloaina o nisi o faamanuiaga e faavavau o loo i o tatou luma. O le mea lea, mo outou uma ou te fia fai atu, ma atonu e fia auai faatasi Ruby ma a’u, pe ana mafai ona ia tu mai iienei, e faapea o le olaga e mafai ona matagofie ma i ai sona uiga moni, ae ao ina tatou ola ai i se auala faigofie. E ao ona tatou ola i mataupu faavae o le talalelei. Aua o le i ai o le talalelei i o tatou olaga, e maua ai se eseesega, a o taumafai ai lo tatou ala i le olaga” (i le Conference Report, Oct. 2000, 22; po o le *Liahona*, Nov. 2000, 19).

MATAUPU FAAVAE

E fafagaina e ulugalii le alofa ia latou faaipoipoga e ala i le mulimulitai i mataupu faavae sa’o.

FAITAUGA MAI LE TUSI LESONA A LE TAGATA AOGA

Aoaoga Filifilia mai le “Faaipoipoga i le gasologa o Tausaga” (196)

Parakalafa 7 o le “O Le Aiga: O Se Folafolaga i le Lalolagi,” o le Au Peresitene Sili ma le Korama a Aposetolo e Toasefululua (89)

Aoaoga Filifilia mai le “O Le Aiga: O Se Folafolaga i le Lalolagi” (89–95)

“O Le Faaoina o le Faaipoipoga,” Elder James E. Faust (196–98)

“O Le Faamanatuina o le 60 Tausaga talu ona Faaipoipo le Au Hinckley” (198–99)

“E Faapefea Ona Ou Alofa Ia Te Oe?” Elder Jeffrey R. Holland (167–172)

“O se Faatasiga o le Alofa ma le Malamalama,” Elder Marlin K. Jensen (172–77)

O A MEA E AOAO ATU

O le faatumauina o le alofa i le gasologa o taimi, e manaomia ai se vaaiga ma se faafalelega umi mai le tane ma le ava.


FAUTUAGA I AUALA E AOAO ATU AI



Talanoaga. Valaaulia tagata o le vasega e faamatala le alofa e lagonaina e ulugaliou fou mo le tasi i le isi. Faitau le faamatalaga lenei mai ia Elder Boyd K. Packer, o se sui o le Korama a Aposetolo e Toasefululu: "A faapea ua outou manatu o le atoaga o le alofa aiai o le talavou, o le tuufatasiga lena o avanoa uma e tutupu mai le punavai o le olaga, tou te le i oo i le tulaga e vaaia ai le tuuto ma le mafanafana o le alofa ua faaipoipoia i se taimi umi. O ulugalii faaipoipo, e suesueina e tofotofoga, feeseseaiga, teteaga, faafitauli tautupe, faalavelave faaleaiga, ma'i, ma i le gasologa o taimi, e faamalosia ai le alofa, o le alofa ua mauua e olioli i se fiafiaga e le mafai e ulugalii fou ona mafaufauina" (*O Mea a le Agaga*[1996], 106–7; po o le tusi lesona a le tagata aoga, 149).

Faamalamalama atu e ui o lenei ituaiga o alofa e mafai ona tatou ausaina, ae e moomia taumafaiga moni ina ia ausia ai. Faitau le saunoaga a Elder David B. Haight i lalo o le "Vaaiga Aoao Faale-Aoaoga Faavae" o loo i luga. O le a le "auala faigofie" e fesoasoani ia i tatou e ausia ai se olaga faatasi e "matagofie ma i ai sona uiga moni"?

Faaali atu ni laau toto i totonu o ni pakete se lua, o le tasi e ola maloloina ma matagofie, ma le isi ua foliga pe, pe ua mate. Po o le tusia foi o ni laau faapena i luga o le laupapa.



Fesili atu po o le a le mea ua eseese ai le tulaga o ia laau e lua. Ona fai lea i tagata o le vasega e faatatau mai a latou tali i le faaipoipoga. O fesili nei atonu e fesoasoani i la outou talanoaga:

- O le a le uiga o le fafagaina po o le faafaileleina o le alofa i le faaipoipoga?
- Aisea e manaomia ai e se faaipoipoga lea ituaiga tausiga faifaipea?
- Aisea e manaomia ai ona matua aafia paaga uma e lua i le faafaileleina o se faaipoipoga?
- Pe o se upu lelei ea le *galue* e faamatala ai le taumafaiga manaomia mo le fausiaina o se sootaga umi? Aisea, pe aisea e le lelei ai?
- E mafai faapefea ona avea le mauaina o le fafia ma se vaega o le faafaileleina?

- O a nisi o faaaloaloga atonu e mafai ona faaaogaina e taitoalua e faamalolosia ai lo latou alofa mo le isi?

Faai i le saunoaga lenei mai ia Peresitene Spencer W. Kimball:

“O le fugalaau mu’amu’a o le a o’o ina mamae ma mate, pe a leai se meaai ma se vai. E faapena foi le alofa, e le mafai ona faamoemoe e o’o i le faavavau, sei vagana ua fafagaina pea i le alofa, le faailoaga o le mamalu ma saafiafiga, o le faaaliga o le loto faafetai, ma le mafaufau ia le manatu faapito.

“... Afai o le a faavavau ona sailia e le tasi mea e fafia i ai, faamafanafanaga, ma le fafia o le isi, o le alofa lea e i ai i le taimi o tafaoga faamasani ma faamautuina i le faaipoipoga, o le a faatupulaia e avea ma taunuuga maumaututu. ... O le mea moni, o taumafa sili ona manaomia mo le alofa, o le manatu mo le isi, agalelei, mafaufau loloto, amanaaina o le tasi, faaaliga o le alofa mo le isi, feopoopoa’iga i le agaga faafetai, fiafiaga, mitamitaga, mafutaga, talitonuina, faatuatua, faigapaaga, avanoa tutusa, ma le felagolagoma’i” (“Marriage and Divorce,” i le *1976 Devotional Speeches of the Year* [1977], 150; po o le tusi lesona a le tagata aoga, 179).

 **Talanoaga.** Su'e i le “O se Faatasiga o le Alofa ma le Malamalamā,” mai ia Elder Marlin K. Jensen (tusi lesona a le tagata aoga, 172–74), ma faitau faatasi le vaega “O Le Atiina Ae o Lo Tatou Mana e Alolofa Ai.” Faitau saunoaga nei mai ia Elder Jensen, ma i le mae'a ai o faamatalaga taitasi, fesili atu, Aisea e faapea ai?

- “Atonu o lo tatou malosi e tuuina atu le alofa, e avea ai i tatou ma e e sili ona alofagia” (tusi lesona a le tagata aoga, 172).
- “E matua laitiiti lava se alofa e mafai ona maua mai se tasi e le o lelei ma ia lava faapea le Atua” (173).

Faai i le faamatalaga a Elder Jensen o loo muamua atu i le vaega lena: “Afai tatou te mananao e avea tatou ma ni soa agavaa e faavavau, e mafai ona tatou taulai atu muamua i le avea ma soo e le femoumoua’i o le Matai” (172).

 **Talanoaga.** Ia tusia i luga o le laupapa *O Uiga Lelei e Mafai ona Faamalosia ai se Faaipoipoga*. Faaopoopo atu i lalo o le ulutala ia mau faasino nei mai le tusi lesona a le tagata aoga:

- “E Faapefea Ona Ou Alofa ia te Oe?” Elder Jeffrey R. Holland (167–172)
- “O Le Faamanatuina o le 60 Tausaga Talu ona Faaipoipo le Au Hinckley” (198–99)
- “O Le Faaoina o le Faaipoipoga,” Elder James E. Faust (196–98)

Vaevae le vasega i ni vaega se tolu. Ia tuu atu i vaega taitasi e faiatina se tasi o faamatalaga mai le tusi lesona a le tagata aoga, ma vaseina lalo o uiga e mafai ona faamalosia ai se faaipoipoga. Valaaulia se sui mai vaega taitasi e tusia a latou saililiga i luga o le laupapa. Ia tuu atu i le vasega e fautua mai nisi uiga, ma faaopoopo atu i le lisi o i le laupapa.

- O fea o nei uiga e mafai ona faigofie, ma vave ona faaaogaina i se faaipoipoga? E faapefea?
- O fea uiga o le a tele se taimi e manaomia e atia'e ai? Aisea?
- O fea o nei uiga lelei ua e vaaia i se ulugalii faaipoipo e te faamemelo i ai?

Valaaulia tagata o le vasega e toe faamanatu fesili e ono o loo i lalo o le “Faaoina o se Faaipoipoga” saunia e Elder Faust (tusi lesona a le tagata aoga, 197) ma

faatusatusa le leoa ifo lava e le tagata ia lava agai i fesili taitasi, i se fua faatatau o le 1 e o'o i le 10. Uunaia i latou e mafaufau loloto i auala e mafai ai ona faaleia o latou vaega e sili ona vaivai ai, ma faatuina se sini patino e mafai ona latou galulue ai i le gasologa o le vaiaso.

FAAIUGA

Faasoa atu le saunoaga lenei mai ia Peresitene Hinckley: "Ua ou vaai atu i lau lava soa mo le lima sefululua tausaga. Pe ua ititi ea lona sao i luma o le silafaga a le Alii, nai lo a'u? Ua faamalieina a'u, e leai. Sa ia savali ma le le leoa i o'u autafa, lagolagoina a'u i o'u tiutetauave, tausi ma faamanuiaina la ma fanau, auauna i le tele o valaauga i le Eklesia, ma faasalalau atu se fuataga le mafaatusalia o le fiafia ma le lelei i soo se mea na femalagaai ai. O le tele lava o lo'u matua, o le tele foi lena o lo'u faafetaia—ioe, o le tele lena o lo'u alofa—i lenei tamaitai tino laitiiti, o le na ma tootutuli i le fata faitaulaga i le maota o le Alii, i le silia ma le afa seneturi talu ai.

"Ou te moomoo, ma lo'u loto atoa, o faaipoipoga uma o le a avea ma se faaipoipoga fiafia. Ou te moomoo, o faaipoipoga uma o le a avea ma se paaga e faavavau. Ou te talitonu o lena moomooga e mafai ona faataunuina, pe afai e i ai se naunautaiga e faia taumafaiga uma e faataunuina ai" *Liahona*, Nov. 1989, 97; po o le tusi lesona a le tagata aoga, 84).

17 FAAALOALOGIAINA O LOU TOALUA

VAAIGA AOOAO FAALE-AOAOGA FAAVAE

“Uso e, ia tausia a outou ava i le alofa, ma le faaaloalo ma le agalelei. Ma, outou ava, ia tausia a outou tane i le alofa, ma le faaaloalo ma le agalelei” (Gordon B. Hinckley, *Teachings of Gordon B. Hinckley* [1997], 209).

“I lalo o le fuafuaga a le talalelei, o le faaipoipoga o se mafutaga, faatasi ma le tulaga tutusa i le va o le paaga. Tatou te savavali faatasi i le faaaloalo, fafia, ma le alofa o le tasi i le isi. E le mafai ona i ai se lagona o le vaai maualalo, po o le fia sili, i le va o le tane ma le ava i le fuafuaga a le Alii” (Hinckley, *Aoaoga*, 322).

MATAUPU FAAVAE

O le faaaogaina o aoaoga a le Alii o Iesu Keriso i se faaipoipoga, o le auala sili lea e aloese ai mai taunuuga o le faatautala.

FAITAUGA MAI LE TUSI LESONA A LE TAGATA AOGA

Aoaoga Filifilia mai le “Faasaunoa” (3–5)

“Faamaloloina o Ma’ila Matuia o le Saua,” Elder Richard G. Scott 6–9)

FAATAMAOAIGAINA O LE FAIAOGA

Peresitene Gordon B. Hinckley, “Agavaa Faaletagata Lava Ia mo le Faaaogaina o le Perisitua,” *Liahona*, Me 2002, 53–54 (po o le i. 69 o le tusi lesona lenei)

Judy C. Olsen, “O Le Taufaamata’u Le Vaaia,” *Liahona*, Iuni 1996, 22–29 (po o le i. 70 o le tusi lesona lenei)

O A MEA E AOAO ATU

*O tane ma ava e tatau
ona avea le tasi ma
faamanuiaga i le isi.*

FAUTUAGA I AUALA E AOAO ATU AI

 **Talanoaga.** Fai atu i tagata o le vasega e mafaufau faapea o loo latou talosagaina se nonogatupe, ma ua manaomia le lisiina atu o a latou aseta. O a ituaiga o mea e mafai ona aofia ai i le lisi? O a nisi o “aseta”, e le o ni mea tautupe, atonu e au-maia e se alii ma se tamaitai i se faaipoipoga? Faitau le saunoaga lenei mai ia Peresitene Gordon B. Hinckley, a o avea ma Fesoasoani Muamua i le Au Peresitene Sili:

“Ou te talitonu i le aiga, e i ai se tane, o le na te faamamaluina lana soa o se aseta silisili ma tausia o ia faapena; e i ai se ava, o le e vaai atu i lana tane o se taula ma se malosiaga mo ia, o lona faamafanafanaga ma lafitaga, e i ai fanau o e vaai atu ia tina ma tama ma le faaaloalo ma le agaga faafetai; e i ai matua, o e vaai atu i na fanau o se faamanuiaga, ma mauaina se luitau sili ma moni ma matagofie, i lo latou tausiga ma le faafalelega. O le galueaiina o se aiga faapena, e manaomia ai le taumafaiga ma le malosi, fefaamagaloi ma le onosai, alofa ma le tumau ma le ositaluaga; ae e taua i latou uma ma isi” (“This I Believe,” i le *Brigham Young University 1991–92 Devotional and Fireside Speeches* [1992], 80).

Talanoaina elemene o le saunoaga a Peresitene Hinckley.

O A MEA E AOAO ATU

*E i ai nai tiga laiti i
soo se faaipoipoga,
e manaomia le galue-
aiina faatasi.*

FAUTUAGA I AUALA E AOAO ATU AI



Talanoaga. Faitau le saunoaga lenei mai ia Peresitene Gordon B. Hinckley: "Afai o le a tuuina atu e tane ma ava le faamamafa sili atu i uiga mama lea e tatau ona i ai i le tasi ma le isi ae itiiti i sese, o le a faaititia loto mafatia, faaititia loimata maligi, faaititia teteaga, ae o le a faateleina le fiafia i aiga o o tatou tagata" (*Teachings of Gordon B. Hinckley*, 322).

Faamalamalama atu o feeseseaiga ma tiga e taatele i faaipoipoga. O nisi o nei mea e sau mai le eseesega o tulaga na soifua mai ai, mea e fiafia i ai, po o faamoemoega. O le faia o fetuutunaiga, o se vaega masani o le olaga faaipoipo. Atonu e i ai taimi e mafai ona fesoasoani ai le fautuaga mai se taitai perisitua, e faatoilaloina ai eseesegaga.

Ia tusia i luga o le laupapa upu o le *taumafaiga, malosiaga, faamagaloga, onosai, alofa, tumau*, ma le *ositaulaga*. Fai atu i tagata o le vasega e fautua mai pe aisea o le a manaomia ai uiga taitasi nei i se aiga faamanuiaina.

Faamalamalama atu o faaipoipoga faamanuiaina e manaomia ai le tulaga o le aumai ma avatu, a o galulue le paaga agai i le lotogatasi o le tasi ma le isi, a o tausisia le ogatusa ma alafua o le talalelei. E tatau ona avea tane ma ava ma se faamanuiaga, o le tasi i le isi.

O A MEA E AOAO ATU

*E tele ituiga eseese o
le faasaua.*

FAUTUAGA MO AUALA E AOAO ATU AI



Galuega fai faavaega. Tuu atu i tagata o le vasega e su'e i Aoaoga Filifilia mai le "Faasaunoa" (tusi lesona a le tagata aoga, 3–5) ma tagai mo ituiga o faasaunoa.



Talanoaga. Taitai se talanoaga e faatatau i ituiga o faasaunoa. Ia faaopoopo atu i le talanoaga ia manatu nei, i le tulaga e talafeagai ai:

"Faasaunoa faaleagaga e aofia ai le faaaogaina o taitaiga, puleaga, po o faiga faamlosi amioletonu.

"Faasaunoa faalelagona e aofia ai le taufaifai, faamatalaga faalumaluma, taufaamatau, faaesea, faatiga, po o le soona fai faamlosi.

"Faasaunoa faaletino e aofia ai le fai faamalosia, taofia o punaoa, ma sauaga faaletino e pei o le tuleia, titina, fela'u, feini, taofiofiina, po o le fasiina.

"Faasaunoa faale-feusuaigna atonu e faalelagona, pe faaletino foi, ma e aofia ai uiga faiga faamlosi faalefeusuaigna, faatupuina o le tiga i taimi o feusuaigna, ma le faaaogaina o le pule malosi, po o le taufaamatau e faaosofia ai le toalua e faaletino gaoioiga faalefeusuaigna" (*Tali Atu i le Faatautala/Sauaina: O Fesoasoaniga mo Taitai Faalelotu*[1995], 4.)

O A MEA E AOAO ATU

*O amioga faatautala
mai le tane po o le ava,
e le ogatasi ma alafua
faatulagaina o le talale-
lei, ma e ao ona taofia.*

FAUTUAGA I AUALA E AOAO ATU AI



Talanoaga. Tuu atu i tagata o le vasega e toe su'e i Aoaoga Filifilia mai le "Faasaunoa" (tusi lesona a le tagata aoga, 3–5) ma saili mo mafuaaga o le faasaunoa. E mafai ona aofia ai:

- "Afai e le puleaina e se alii lona ita, ... e mafai ona avea o ia ma tagata e aafia fua i ona lava faananauga ma lagona, lea e taitai atu ai o ia i gaoioiga e matua le fetaui lava mo amioga pulea lelei" (Ezra Taft Benson, tusi lesona a le tagata aoga, 3).
- "O le isi foliga o le faamaualuga o le tetee. O finauga, tauaimisaga, puleaga amioletonu, ... faasaunoa i le toalua, misa, ma fevesiaiga, e aofia uma lava i lenei vaega o le faamaualuga" (Ezra Taft Benson, tusi lesona a le tagata aoga, 3–4).

- “O le faaaogaina faatautala o fanau, po o le faasaunoa o se tasi i lona toalua, mo le faamalieina o ona tuinananu faasatani, o se agasala sili ona pogisa” (Gordon B. Hinckley, tusi lesona a le tagata aoga, 4).

Faaaoga fesili nei mo se isi talanoaga:

- E mafai faapeflea e le faamaualuga, ona taitai atu i le faatautala po o le sauaina?
- E mafai faapeflea e le manatu faapito ona taitai atu i amioga faatautala?
- E mafai faapeflea e “uputuu amioletonu a augatama [o se tasi]” (Alema 23:3) ona avea ma mafuaaga o le faatautala?

Talanoaina mea nei:

“O le amataga o uiga uma e lua, o le sauaina o le toalua ma le fanau, e mafai ona maua i nai mea faatauvaa lava, e pei o le vaai maualalo i agavaa ma tomai o se tasi, faitioina pea lava pea, taufaifai, po o le valaauna i igoa le lelei, musu e fesootai, taufaaososooso, faatupuina o lagona o le nofosala, faia ma le le mafai ona faataunuina faifaipea o folafolaga, faatiga, faamata'uina i le faaoolima, faia o tuuaiga le faavaea, po o le faaleagaina o meatotino.

“E i ai nisi ua tatou faatiga i ai ma le le iloa. O isi atonu latou te le o malamalamama i le o'oo'o o taunuuga o a latou amioga. Peitai, pe a i ai le faatautala, o tagata uma lava o se aiga, aemaise le tama ma le tina, e ao ona naunau e toe faaleleia a latou sootaga ma isi tagata o le aiga. I nisi o tulaga, na o le iloaina lava o le amioga o loo afaina ai le isi, atonu ua lava lea e mafaufau ai le tagata o loo nofosala ia suia” (*Puipua ma le Tali Atu i le Sauaina o Taitoalua* [tamai tusi, 1997], 3).

Fai i tagata o le vasega e toe foi i Aoaoga Filifilia mai le “Faasaunoa” e saili auala e aloese ai mai le faasaunoa po o le faatautala. E mafai ona aofia ai:

- “Pe a e alofa i lau ava ma lou loto atoa, e le mafai ona e tuua i lalo o ia, faitioina o ia, saili masei ia te ia, pe sauaina o ia e ala i upu, foliga sauia, po o gaoioiga” (Ezra Taft Benson, tusi lesona a le tagata aoga, 3).
- “Pe a i ai le amanaiaina o le tulaga tutusa i le va o le tane ma le ava … , ona mafai lea ona mulimuli mai se lagona sili atu mo le tiutetauave ina ia faafai-lele, ina ia fesoasoani, ina ia alofa atu ma se alofa faifaipea mo i latou o loo tatou vaavaaia” (Gordon B. Hinckley, tusi lesona a le tagata aoga, 3).
- “E ao ona i ai le loto pulea, lea e taofia mai ai i le faatautala o taitoalua ma fanau” (Gordon B. Hinckley, tusi lesona a le tagata aoga, 4).

Fasoa atu foi faamatlagaa nei. (Atonu e mafai ona e faaaogaina se masini e faailoa ai tusitusiga i luga, pe faiata matalaga taitasi ma tusia upu autu i luga o le laupapa.)

- “E leai lava se tasi na te sauaina se isi tagata, pe a i ai ia te ia le Agaga o le Alii” (George Albert Smith, i le Howard W. Hunter, i le Conference Report, Oct. 1994, 69; po o le *Liahona*, Nov. 1994, 51; tusi lesona a le tagata aoga, 221).
- “O se tasi e umia le perisitua e tatau ona *onosai*. O le onosai, o se tasi o uiga o le loto pulea” (Ezra Taft Benson, i le Conference Report, Oct. 1986, 62; po o le *Liahona*, Nov. 1986, 47; tusi lesona a le tagata aoga, 4).
- “E ao ona i ai le loto pulea, lea e taofiofia le faatautala i le ava ma fanau ma le tagata lava ia. E ao ona i ai le Agaga o le Atua, e valaaulia ma galue agai i ai, faa-faileleina ma faamalolosia” (Gordon B. Hinckley, i le Conference Report, Apr. 1991, 97; po o le *Liahona*, Me 1991, 74; tusi lesona a le tagata aoga, 4, 186).
- “E mafai ona toe faaleleia mea uma. E mafai e le Atua ona faamaloloina tatou, pe afai tatou te tuuina atu i tatou lava ia te Ia” (Neal A. Maxwell, “*Ia Le Faia Lo'u Loto, a o Lou Finagalo*”[1988], 63; po o le tusi lesona a le tagata aoga, 4).

Faasoa atu le aoaiga lenei i tagata e faia le faatautala, mai ia Peresitene Gordon B. Hinckley: "Ae paga lea, e i ai nisi o outou ua faaipoipo atu i ni alii faasaua. O nisi o i latou ua fia foliga lelei mai luma o tagata i le aso atoa ae a sau i le fale i le afi-afi, ua tuu ese lo latou loto pulea, ae oso faalii i luga i nai mea iti faatauvaa.

"E leai se alii ua aafia i ia amioga faatiapolo ma le mataga faapena e agavaa mo le perisitua a le Atua. E leai se alii ua faapea lana amio e agavaa mo avanoa i le maota o le Alii. Ou te faanoanoa e faapea atu, e i ai nisi o alii ua le tatau i ai le alofa o a latou ava ma fanau. E i ai fanau e fefefe i o latou tama, ma ava ua fefefe i a latou tane. Afai o i ai lava ni alii faapena o loo lagonaina mai lo'u leo, i le avea ai ma se auauna a le Alii ou te aoai atu ia te oe ma valaau atu ia te oe ia salamo. Ia pulea oe lava. Ia pulea lelei lou ita. O le tele o mea e faaosofia ai lou ita, o mea e matua laiti lava o latou taunuuga. Ma e maeu le mataga o le taui e te mauaina mo lou ita. Tatalo i le Alii e faamagalo oe. Fai atu i lau ava e faamagalo oe. Faatoese i lau fanau" (i le Conference Report, Oct. 1996, 91–92; po o le *Liahona*, Nov. 1996, 68; tusi lesona a le tagata aoga, 383).

O A MEA E AOAO ATU

O tagata ua afaina ona o sauaga, e mafai ona faamaloloina e ala i le mana o le Togiola.

FAUTUAGA I AUALA E AOAO ATU AI

 **Talanoaga.** Faamalamalama atu o nisi taimi e o mai ai tagata taitoatasi i le faaipoipoga, i le maea ai ona mafatia i sauaga i lo latou tamaitiiti, po o le talavou. Na tuuina mai e Elder Richard G. Scott o le Korama a Apostolo e Toasefululu se fautuaga musuia mo le tagata ua sauaina. O lana fautuaga e mafai foi ona fesoasoani i taitoalua o i latou na afaina i sauaga muamua, e malamalama ai i auala e fesoasoani ai ia latou paaga e faaauauina lo latou toe faaleleia. Faasino tagata o le vasega i le tusitusiga a Elder Scott, "Faamaloloina o Ma'ila Matuia o le Saua" (tusi lesona a le tagata aoga, 6–9). Talanoaina nisi o fesili nei:

- O a nisi o ma'ilala masani e mafai ona maua mai le sauaina?
- Pe mafai ona faatoilaloina sauaga mai isi? E faapefea?
- O a ni mataupu faavae eseese o le faamaloloina mai sauaga, ua taua e Elder Scott?
- O le a le tele o le tiutetauave, i le faagasologa o le faamaloloina, ua i ai i le tagata ua afaina? Faamalamalama.
- Pe mafai ea ona faamagaloina le tagata faasaua mai se agasala mamafa faapena? Faamalamalama.
- Pe mafai faapefea ona faateleaia le faagasologa o le faamaloloina mo le tagata ua afaina, pe a faamagaloina e ia le tagata faasaua?
- O le a le lapataiga ua tuuina mai e Elder Scott, e uiga i le sailia o fesoasoaniga?

FAAIUGA

Fai atu i tagata o le vasega e faitau faatasi leotele le Mataupu Faavae ma Feagaiga 121:41–43 Molimau atu o le faatauanau, tali-tiga, i le agamaualalo ma le agamalu, ma le alofa faamaoni, i le agalelei, ma le malamalama manino e faaleleia ai sootaga. O le le i ai o nei uiga, e mafai ona taitai atu ai i amioga faatautala. O le faatautala i ona tulaga uma lava, e taitai atu ai i sootaga valevalenoa. Pe a faaalia e ulugalii ia amioga faa-Keriso ma tausia e le tasi le isi i le alofa ma le agalelei, o le a sili atu ona atagia le ausia o se faaipoipoga fiafia. O le faaaogaina o aoaoga a le Alii o Iesu Keriso, o le auala sili lea e aloese ai mai taunuuga o le faatautala.

Faatamaoaigaina o le Faiaoga

AGAVAA O LE TAGATA LAVA IA E FAAAOGA LE PERISITUA



Peresitene Gordon B. Hinckley

Sii mai le Conference Report,
Ape. 2002, 64–65; po o le Lia-
hona, Me 2002, 53–54

O le ava e te filifilia, o le a avea ma au paaga tutusa. Na tautino mai e Paulo, “E leai se tane pe a le o i ai le fafine, e leai foi se fafine pe a le o i ai le tane, i le Alii” 1 Korinito 11:11).

I le mafutaga o le faaipoipoga, e leai se maualalo, po o se e sili. E le savali le fafine i luma o le tamaloa; po o le tamaloa foi ona savali i luma o le fafine. E savavali faatasi o se atalii ma se afafine o le Atua i se malaga e faavavau.

E le o ia o sau auauna, sau tavini, po o se mea faapena.

E maeu le nutimomoia o le loto ma le matua mataga o se tulaga e tulai mai, e pei o le sauaina o le ava. O soo se alii i lenei Ekalesia o le na te sauaina lana ava, lē e faalumaluma ia te ia, lē e faatiga ia te ia, le ē faia puleaga amioletonu ia te ia, ua le agavaa e umia le perisitua. E tusa lava pe faapea ua uma ona faauuina, e aveese e le lagi i latou lava, e faanoanoa le Agaga o le Alii, ma o le a amene i le pule o le perisitua o i lena alii.

O soo se alii na te faia nei ituaiga amioga, ua le agavaa e umia se pepa faataga o le malumalu.

Ou te faanoanoa e faapea atu, ua ou vaai soo i

lenei ituaiga amioga mataga o tupu pea. O loo i ai alii o loo faasaua i a latou ava i faamatalaga faapea ma le faaletino. O se faalavelave matuia pe a faalumaluma e se alii le tina o lana fanau.

E moni foi o loo i ai ni nai tamaitai o loo sauaina a latou tane. Ae ou te le o talanoa atu ia i latou i le po nei. O loo o'u talanoa atu i alii o lenei Ekalesia, alii o e ua faaee atu i ai e le Silisiliese Lana perisitua paia.

O'u uso e, afai o i ai nisi, o lagona mai lo'u leo, o e ua tausalaina i lea ituaiga o amioga, ou te valaau atu ia te oe ia salamo. Ia e tootuli i ou tulivae, ma tatalo atu i le Alii e faamagalo oe. Tatalo atu ia te Ia mo le mana e pulea ai lou laulaufaiva ma lou lima tētē. Talosaga atu mo le faamagaloga mai lau ava ma lau fanau. Na saunoa Peresitene MaKei e faapea, “E leai se isi manua e mafai ona suitulaga, i le faaletonu i le aiga” (sii mai le J. E. McCulloch, *Home: The Savior of Civilization*[1924], 42; i le Conference Report, Apr. 1935, 116). Ma, na saunoa mai Peresitene Lee, “O le vaega aupito sili ona taua o le galuega a le Alii o le a e faatinoina, o le galuega lea e te faia i totonu o puipui o lou lava fale” (Harold B. Lee, *Doing the Right Things for the Right Reasons*, Brigham Young University Speeches of the Year [19 Ape. 1961], 5).

Ou te talitonu, pe a tatou laulaututu i luma o le nofoa faamasino o le Atua, o le a itiiti lava se ta'uaina o le tele o le oa na tatou mauaina i le olaga, po o soo se mamalu atonu na tatou ausiaina. Ae, o le a i ai fesili patino e uiga ia tatou sootaga faaleaiga. Ma, ua ou mautinoa, e na o i latou o e na savalia le olaga ma le alofa ma le faaaloalo, ma le loto faafe-tai mo a latou soa ma fanau, o le a mauaina mai lo tatou faamasino e faavavau upu ia, “Ua lelei ia, le auauna lelei e, ma le faamaoni: ... ina ulufale mai ia i le fiafia o lou alii” (Mataio 25:21).

O LE FAATIGA LOTO LE VAAIA

Judy C. Olsen, *Liahona*, Iuni 1996, 22–29

Ulugalii numera tasi: "Ua e iloa," na fai atu ai Tavita i lana ava, ina ua ia fesili e uiga i le apaapa maanuminumi o la latou taavale, "o lou *faafitauli* o lou fiafia lea e faatelē se mea laitiiti lava."

Ulugalii numera lua: "Aisea na e fuafuaina ai la ta tafaoga i le Aso Toonai?" na fesili ai Caroline. "O se mea faavalevaleda lena e faia e se tasi. Ua e iloa ina lava o lo ta po tafao o le Aso Faraile."

O le a le mea e taatele i nei ulugalii? O se tasi o taitoalua, i tulaga taitasi, o loo aafia i se ituaiga o sauaga. E ui lava e leai ni leoleoā po o se sauaga faaletino, ae o nei upu soona lafo, o se ituaiga o amioga lea ua taatele ma sosolo faaupega e ta'ua o le *sauaina faalelagona*. O nei ituaiga amioga, atonu o le ituaiga lea e sili ona taatele ae tau le iloa, o ituaiga uma o sauaga ona e i ai sona taliaina i lo tatou lalolagi. I lenei vaega e foliga mai e le vaaia, o amioga faatautala, ua taufai tutusa ai le sese o alii ma tamaitai, ma o aafiaga o lea ituaiga sauaga i tagata o aiga e mafai ona *pei lona ogaoga* o isi, ituaiga sauaga lea e tele ina vaaia. Ua tele loto ua mafatia ma olaga ua ogaoga lo latou faatamaaina mai le ola ai ma aafiaga o le sauaga faifaipea faalelagona. Ma, a tuu e lē faasa'oina, atonu e ono avea foi ma faavae mo isi ituaiga o amioga faatautala i totonu o aiga ma faaipoipoga.

Na saunoa Peresitene Gordon B. Hinckley, a o avea ma Fesoasoani Lua i le Au Peresitene Sili, i ulugalii faaipoipo i se faeasaite na faasalalauina mai le Lotoa o le Malumalu, i le aso 29 Januari 1984. O lana fautuaga, e pei ona toe faaupuina ai i le taimi o le faasalalauina o le sauniga, o le "ia avea le faaipoipoga ma mea uma e mafai ona avea ai, e ao i le ulugalii ona fausia se paaga e faavae i mataupu taua o le talalelei a Keriso." Mo se faaipoipoga ina ia faamanuiaina, na faaauau ai le saunoaga a Peresitene Hinckley, "o tagata faaipoipo taitasi, e tatau ona atiina ae le faaaloalo mo lana soa" o se maa tulimanu o le sootaga faale-faaipoipoga *Liahona*, Ape. 1984, 75).

O le tausiga ma le faaaloalo, aemaise i le faaipoipoga, e matua taua mo le fiafia ma moomia mo le vaaiga faale-Au Paia o Aso e Gata Ai i paaga faaselesitila, lea ua faapea ai "e leai se tane pe a le o i ai le fafine, e leai foi se fafine pe a le o i ai le tane, i le Alii" (1 Kori. 11:11). O uputuu faalelalolagi, e ui

lava i lea, e tele lava ina le lagolagoina tausiga faaaloalo ma alofa mo tagata uma. Peitai ane, o aoaoga a le Faaola ua valaaulia ai tatou mo se alafua maualuga atu: o le agamaualalo, agamalu, alofa faamaoni, ma le agalelei (tagai i le MF&F 121:41–42). O nei uiga e ao ona faavae mo a tatou sootaga faalelalolagi, lea e tatau ona mamanuina i le faataitaiga na ia faatuina.

I se isi itu, e taofia e le faatautala faalelagona ia ulugalii mai le ola ai i le alafua maualuga a Keriso. E saili e faatupulaia uputuu sese ma amioga le talafeagai, e pei o le "faaaoga ai le pule po o le puleaga po o le faamalosi i luga o agaga o le fanauga a tagata" (MF&F 121:37 i auala poto ma foliga mai e aloaia faale-vafealoai. A o taofiofimauna e le lalolagi na ituaiga alafua, ua faateleina le feagai o le Au Paia o Aso e Gata Ai ma le luitau o le "ia outou o ese mai i e amioleaga, ma ia outou tuese" (Alema 5:57). O le mea moni, o Au Paia e faaauau ona lalagaina o latou loto faapei o Keriso o le a mauaina se fāga matua lautele i le va o le malamalama, olioli, ma le filemu e maua i o latou aiga, ma le pogisa o siosiomaga o aiga o e e le agalelei, mateletele, ma sauia.

Ina ia fesoasoani i Au Paia o Aso e Gata Ai, ia malamalama lelei i auala atonu e aafia ai o latou aiga ma faaipoipoga, i nei mana poto ma lē vaaia, o le talanoaga lenei o le a (1) faamalamalama ai amioga ua manatu e faatautala faalelagona, (2) tuuina atu se fua e fua ai le ogaoga o se faafitauli i o latou lava olaga, ma (3) ofoina atu vaifofo e taulai atu ia Keriso mo ulugalii po o tagata taitoatasi, atonu e vave amata ona faatinoina ma o le a taitai atu ai i ni paaga faalefaaipoipoga maloloina, ma sili atu le fiafia.

Faamatatalaina o le Faatautala Faalelagona

I se tamaitusi na lomia e le Ekalesia i le 1995, *Tali Atu i le Faatautala: O Fesoasoaniga mo Taitai Faalelotu*, ua ta'u mai ai ia i tatou o le faatautala faalelagona o se toalua, e aofia ai vaega tetele nei o amioga faaletonu:

Igoa Taufaifai. Upu e pei o le *lou vale* po o le *faatiga ulu*, o le faaaogaina faatalasua po o le faateleina o upu le logoleleia, igoa valaau le lelei, ma upu faatiga, e aofia uma lava i le taufaifai. Na fautua mai Peresitene Howard W. Hunter e faapea, o se tane e "tatau ona tautala i lana ava i le agaga alofa ma le agalelei, tausiaina o ia ma le faaaloalogia silisili" auia o le "faaipoipoga e pei o se fugalaau mu'amu'a ... ma e ao ona fafagaina i taimi uma i faaaliga o le alofa ma le fiafia" (*Liahona* Nov. 1994, 51). O ava

foi, e ao ona faia faapea ia latou tane. O faamatalaga faaulaula, o le faafesagai ma polokalama malie o le TV, ua manatu foi o se sauaina le leoa ma e leai sona nofoaga i faaipoipoga a le Au Paia o Aso e Gata Ai.

Faamatalaga e ta'ufaatauvaaaina ai. Na saunoa foi Peresitene Hunter, "O soo se alii na te faatautala pe tuua i lalo lana ava faaletino po o le faaleagaga ua nofosala i le agasala sili ona mamafa, ma e manao-mia le salamo faamaoni ma le loto atoa" (i. 51). O auala atonu e mafai ona aafia ai uma alii ma tamaitai i amioga e ta'ufaatauvaaaina ai o latou tai-toalua e aofia ai mea nei:

- *Lē Faatauaina.* O le le amanaiaina ma le loto i ai o se taumafaiga sili e faatino ai se galuega, e pei o le sauniaina o se taumafataga o le afiafi mo nisi po o le toe faaleleia o le taavale a le aiga, o se au-ala o le le faatauaina o le taimi, taumafaiga, ma taleni manaomia e faataunuu ai se mea na matua manaomia ma se auauanga le manatu faapito. O le ta'ufaatauvaaaina o le toalua i le auala lenei, e mafai ona faatinoina e tusa lava po o tuuina mai i se leo e foliga mai o loo manatunatu loloto i ai. Mo se faataitaiga, pe a uma ona faaluina e se tane se taimi tele i le faiga o pepa o le lafoga toe maua mai, na faapea atu lana ava, "O le faatumuina o pepa o le lafoga, e le faigata e pei ona taumafai isi tagata e faafoliga ai. Ou te ofo i le umi o le taimi na e faatumuina ai."

- *Tala malie e tuu ai i lalo se tasi.* O se paga e poto i upu e mafai ona vave mauaina upu i le tele o auala e faamaasiasi ma faatiga ai lona toalua, o lē atonu o le a tuaia i se taumafaiga e faase ese le tiutetauvae mo soo se taufaifai na tuuina atu, i le leai o se uiga malie. "O Siaki, o loo fuafua lelei lana tausami," na fai mai ai lana ava. "O le vайaso lona tolu lenei."

- *Sailiili Masei.* O le faitioina e atimalie ese ai lava le taua o se tagata. E le o faia, i se agaga lelei, e fesoasoani ai i se tasi ina ia avea ma tagata sili atu ona lelei e pei ona fai mai ai nisi. "E te iloaina, la'u pele, a mafai ona e aoaoina e tipi faaninii lelei fua-laau faisua, o le a mafai ona e faia se salati manaia."

Faaoso Ita. Atonu e faaaogaina e se soa upu taufaamatau e faaoso ita ai i le toalua, ina ia maua ai le mea e manao i ai: "O le aso lava na e tautauina ai le ata lena i le potumoe o le aso foi lena na ou alu ese ai!" O le faailoa atu o le ita e ala i upu sauva, e'e, tatū vae i totonus o le tale-peina o mea, o se faiga faatautala. O auala le-leoa e faailoa ai le tetee, lē fiafia, po o le faasa'oina—mai

le tali a'a i isi e o'o i le faaalia o foliga ita, ma isi faailoga o le sauva—e mafai foi ona faaoso ita ma faoopoopo atu i le faatautala.

Faaesea. O nisi soa e saili ina ia faatapulaaina fegaleaiga a le toalua, pe ma latou, po o isi i fafo atu. O faatinoga maaleale o nei mea e aofia ai le—

- *Taofiofi:* Ua le mafai e le soa ona tuuina atu faamatalaga moomia i le toalua, musu e auai i le foiaina faatasi o faafitauli, taofia le faaalia o le fiafia, po o le lē manao e faaalu se taimi, pe talanoa ai ma le toalua.
- *Taofia o le vavalalata:* O nisi soa ua saili e faavavamamao i latou ma o latou taitoalua, e ala i le faatupulaia o lagona o le le fiafia po o le faaesea. Afai o le taimi e faaalu faatasi ua uunaia ai le amatauga o le toe vavalalata, atonu o le a faapea mai le soa, pe faia foi se mea e faatiga, ina ia faatupu ai le toe valavala.

Na ave e se tasi o aiga le fanau mo se taumafataga i fafo atu o le tale-peina. Na matagofie le aso, ma sa fiafia tagata uma. Ona oo lea i le taimi e toe foi ai, ma amata loa le malaga puupuu i le tale-peina. "Tatou afe mo sina aisakulimi," na fai atu ai le tina. Na faafusei ona amata ona ee le tamā faapea aua le faamau-maua le taimi "mo nisi na te iloaina." O le tafaoga ua alu ai lona taimi, na ia pesi atu ai, ma o loo i ai lava ni mea taua e tatau ona ia faia. I le tulaga faateia, na nonofo ai ma le matata'u ma le filemu le aiga seja o'o lava i le tale-peina. Na lagonaina e le ava, o ona lagona fiafia faatasi ma le aiga, ua vave lilo atu i le malulu o le nofotoatas. Na ia manatu, e le o se taimi muamua lea ua tupu ai lenei mea.

O le vavalalata, e taofia foi pe a musu le tasi o le toalua e auai i le fefaaosoaiina o lagona o le tiga po o le olioli, pe o le ofoina atu o le faamafanafanaga i le misia ai o se fagafao, po o le faia o se fiafia ona ua maua se siitaga o le totogi.

Faatutuina o tulafono le talafeagai: O le faaesea ma le puleaina o se toalua, e mafai ona o'o mai i le tulaga o le fausiaina o ni tulafono le tautalagia mo ia. O tulafono atonu e le malolosi, e pei o le faatutuina o tapulaa o taimi e talanoa ai i le telefoni, le faatagina o ni tagata patino i le tale-peina, ma le faatapulaaina po o le faasaina o le toalua ona umia tupe, po o le alu na o ia i se mea. O tulafono e le malolosi tele atonu e aofia ai mea e pei o le le toe faia o ni telefoni, leai ni malo e asiiasi mai, po o le leai o ni valauga i le Eklesia. E taumafai le soa e faamaonia tulafono, e ala i le faapea mai ua talafeagai, ae o le

toalua ua afaina e pa'ū atu i se lalolagi malulu faateleina, ma le tuuatoatasi.

Faaosofiaina. O nisi o metotia e faaaogaina e faaosofia ai isi e faatino mea e manao ai, e aofia ai le faaalia o lagona faanoanoa, faatupuina o lagona o le tausalaina i isi, po o le tuuaia o isi mo faafitauli. Na tusia e se tasi o tamaitai, “[O la'u tane] e le sau i a matou afiafi faaleaiga ona matou te le faamalieina ona faamoemoega, ma ua faapea mai e le mafai ona nonofo lelei tamaiti ma faalogo.” O lenei tane ua manino lava lona tuuaia o lana fanau mo le leai o sona lava aafiaga ma i latou.

O se isi togafiti e faaosofia ai, o le le malie lea i se mea po o le tetee foi, mo mafuaaga moni lava o le manatu faapito, ma faaiuga a le toalua. O le soa e nofosala na te saili e faatino ona lava manatu, e le faapea e sili atu, ae ona e faataga ai ia e faaaau lona lagona faapea o ia e pule, pe poto atu foi nai lo lona toalua. O ia ituaiga o amioga faafiapule e masani ona avea ma atugaluga e pei o se ava e faitioina le laei o lana tane i taimi taitasi la te tuua ai le fale, fautua atu e fai se isi fusiu po o le ofutino mo sea sauniga, ona faatalitali lea ma le onosai a o sui lona ofu—e ui lava o lona ofu na filifilia sa talafeagai.

Fuatiaina o le Ogaoga o le Faafitauli

Afai o mea ua uma ona e fatau nei i ai, ua faaosofia ai se lagona le lelei ia te oe, atonu e te manao e fai atu i lou toalua e fatau le tusiga lenei, ma fesili atu pe talitonu o ia o loo i ai se faafitauli i la oulu faaipoipoga e uiga i nei ituaiga o amioga. *O le tele o le tiga po o le lagona le fafia e maua e le toalua, e faapea foi ou lava lagona le mautonu, e iloa ai le tuga o le faafitauli.* Afai o le ituaiga fesootaiga faalelagona i le faaipoipoga o loo faamalieloto mo le paaga e toalua, ma afai o loo lagona e i la'ua uma le alofa ma le oli-oli, e laitiiti la se mafuaaga e popole ai, aua o sese masani e le i mafaufauna, e le ono avea ai ma se faatautala faalelagona ogaoga. Peitai, afai e talitonu le tasi o loo i ai se faafitauli, e tusa lava pe le o talitonu i ai le isi, o lona uiga o loo i ai se faafitauli. O i latou o loo faatautala pe sauva, e masani ona faamalieina i latou i le tulaga o i ai, ma ua le lagonaina e i latou, ma ua leai se uunaiga e faia suiga manaomia.

O le talanoaga lenei, ua faasino mai ai laasaga atonu e oo i ai tagata ua aafia fua i le faatautala, a o latou taumafai e onosaia le mea o loo tupu ia i latou. O le a fesoasoani lenei faamatalaga i ulugalii e fuafua ai le o'oo'oga o se faafitauli.

A o amata ona fausia se mamanu o mea tutupu taitasiasi, o le a faatupuina le feteenai mai tiga faifapea, e le i matua foiaina. O lagona o le fefe, vaivai, popolevale, po o le atuatuvalle, atonu ua i ai. O le a i ai le taimi, atonu e avea moni ai lava le toalua ua lototiga, i le tulaga o le masani i faiga le lelei, ma le mafai ai ona iloa o loo i ai ni amioga le talafeagai. O ia ituaiga o tagata atonu o le a faapea ifo, o i latou ua “popole vale tele” pe faapea i se isi itu, ua fetau lava le tulaga ua latou o'o i ai. Ae ui o lea, i se taumafaiga e faaitiitia le tiga ma faatuina se sootaga sili atu, atonu latou te faateleina taumafaiga ia agalelei, tuuina atu faamlosiauga, pe faatino gaoi-oiga faateleina o auaunaga ina ia faamalieina ai a latou soa, ma “alagatatau ai ona maua” se faamalo, po o le agalelei mai i lona toalua. O ia ituaiga uiga e tele ina le amanaiaina, pe faaleano i ai soa faatautala, ma tuua ai taitoalua e tuufesili pe faamata o le a i ai se taimi e paga tutusa ai, po o le a “lava ea lo latou lelei” ina ia alofaina ai, e tusa lava po o le a le tele o taumafaiga ua tuuina atu.

O le isi, atonu e taumafai se toalua e maua se fesoasoani po o le malamalamai le soa e uiga i le ese-esega tele ua faatupulaia i lo la va, ae a le o le faaleamanaia pe ta'u atu foi ia te ia, o loo ia mafaufauna ni mea e le ono tutupu. O lea ituaiga teena-inia e tupu ai le le mautonu i taitoalua ua sauaina, ma o lagona o le tuutoatasi, le fafia, faanoanoa, po o le le talitonuina e ia o ia lava, o le a alia'e mai.

I le tulaga lenei, e saili atu ai nisi tagata mo se fesoasoani mai uo, po o taitai perisita. Peitai, talu ai o le sauaina faalelagona e masani ona tupu faalilolilo, i le tulaga e le o i ai ni molimau, e masani lava ona faigata ona maua se tasi e naunau e talitonu o lena faafitauli e ogaoga. O le mea moni, o le soa faatautala e mafai ona fafia i ai tagata ma mafaufau isi tagata e tauagafau. Na faapea mai se tasi tamaitai, “O tagata mai la matou uarota e masani ona fai mai ia te au, ua ou laki ua ou faaipoipo i se alii lelei tele. Ua ou le mautonu i lenei mea. O se mea tiga tele ia te au lo ma faatasi ma ia.”

O le leai o se molimau e lagonaina le alofa mo le lototiga e masani lava ona taitai atu i taumafaiga ina ia feagai toatasi ma le faafitauli. Atonu e ono o'o atu ai le tele o amioga e faatatau i isi mafuaaga:

- O le tali atu. O nisi tagata e tali atu e ala i le faaaogaina o togafiti faatautala lava ia e tasi ua faaogaina e a latou soa. E tetele finauga tuga ma fetailiaiga faifaipea i ia ituaiga o aiga.

- Mafatiaga le leoa. O isi tagata e tali atu e ala i le taofia o o latou lagona. Ina ia tausia le filemu i le aiga, latou te le iloa ai se isi auala, ae na ona gugu ma faamalō ai lava. E masani lava ona fai-gata ia i latou ona talie pe fetagisi, ona o lagona atonu ua taofia.
- Toe suiina o lagona. E i ai lava isi e toe foi i le lotovaivai po o le faama'ia. O le lotovaivai mai le taumafaiga ia lagona lona leo, ma le taumafaiga ia maua le faamasinoga tonu, faatasi ma le naunau-taiga e faamamaluina feagaiga o le faaipoipoga faalemalumalu, atonu e faaopoopo atu i le talitonuga, ua leai se faamoemoe mo le tulaga ua i ai, e faapea e tatau ona faaaauauina se faaipoipoga le atoatoa. Atonu o le a liliu atu le tiga i le lotovaivai, po o se vaega eseese o isi faafitauli, o nisi taimi e faitau tausaga, ona o le mafuaaga autu, e le o sa'o ona foiaina. I mataupu ogaoga, o manatu o le pule i le ola, atonu o le a o'o i ai.

O le taimi lava e amata ona atiina ae ai se mamanu o le faatautala faalelagona, o loo i ai se tulaga le mautinoa, e faapea i nisi o mataupu, o ia ituaiga amioga faatiga o le a faatupulaia e avea ma sauaga faaletino. O le suiga e masani lava ona amata e ala i uiga faataalo po o le osofaia faafusei o lagona o le toalua: tu latalata tele atu; soliina o tamaivae; sina tulei laitiiti, tatu'i, po o le fepoina "faata-aloga"; ma le faaulaula e le taofia pe fai mai le toalua ua lava. Afai foi e le taliaina lenei tulaga, *atonu o le a mulimuli mai isi sauaga faaletino*. O alii ma tamaitai o e faaaauau ona feagai ma nei osofaiga e foliga e faataaloga ona fai i o latou tulaga, e manaomia ona tu malosi atu ia latou soa, ma *saili fesoasoani i le taimi nei*. O se toalua na te *le taliaina* ia ituaiga o faiga, o le a ia taofia lana soa mai le agai atu i le faatautala faaletino. E leai se faamaniga o le a lelei mea e ala i le faatalitali, tatalo mo le soa ina ia suia, po o le manatu foi e moni upu a le soa pe a folafola mai e le toe tupu ... ae toe tupu foi. O le soa ma le toalua atonu e manaomia uma le fesoasoaniga.

O Se Vaifo e Totonugalemu ai Keriso

Ua faaalia mai e le Alii o Iesu Keriso ia i tatou le au-ala e nonofo ai i le filemu ma le fiafia, o le tasi ma le isi. "Ia outou o mai ia te a'u" o lana valaaulia lea, "o outou uma o e tigaina ma mafatia i avega, o a'u foi e malolo ai outou. Ia outou amoina lau amo, ma ia outou faaaoao ia te au; ... ona maua lea e outou o le malologa mo outou agaga" (Mata. 11:28–29). Ua Ia

faatuina se faataitaiga mo tatou lea, pe a mulimuli-taia i le faaipoipoga, o le a matai ai le faitotoa i se sootaga e sili atu ona filemu.

E ui o se suiga lelei e sili ona vave ona tupu, pe a galulue faatasi tagata e toalua e foia le faafitauli, e manaomia ona le faatali se toalua seja amata ona faia suiga, e mafai ona faatuina ai le faasaoga o le ala o se faaipoipoga. Pe galulue faatasi le ulugalii i le faafitauli, po o le fai toatas i foi e le tasi o le toalua, e i ai laasaga e mafai ona vave faia loa lava.

Sailia o le Suiga o se Ulugalii

O laasaga nei e mafai ona fesoasoani i se ulugalii e amataina le faagasologa mo le suiga:

1. Fono faatasi. Faatulaga se taimi e talanoaina ai le faafitauli, i se nofoaga o le a le faalavelaveina ai oulu. Amata i le tatalo ina ia valaaulia le Alii e tai-taiina oulu taitoatasi i upu o le a oulu tautatala ai, ma fesoasoani ia oulu maua ni vaifofo. Tatalo ia i ai le mafaufau ma le loto matai.

2. Iloilo le faafitauli. Atonu e fesoasoani le amata o le talanoaga i le toe iloiloina o lenei tusiga. Atonu e faigata ona iloa patino e ulugalii pe faapefea, a o le a foi le taimi e tutupu ai amioga faatiga. Peitai, o le taimi lava e faataunuina ai sea talanoaga faapea, o le a faateleina lenofouta, ma o le a faasolo ina mavaaia atili mamanu faatamaiaina.

3. Filifili e faia se mea e ese ai. O le taimi lava e iloa ai faafitauli, e mafai e se ulugalii ona galulue faatasi e fesoasoani le tasi i le isi e sua mausa tuai ma mamanu tuai o amioga i mausa ma amioga fou. O se tasi o auala e faia ai lenei mea, o le malilie faatasi lea i se failogi, pe faaleo po o le le leoa, e mafai ona faailoa ai i le soa se faafitauli o le a tulai mai. O le mea lea e manaomia ai le lototele i le tulaga o le toalua ua faatiga i ai, ma le onosai i le itu o le soa faatautala. O i laua taitoatasi o le a manaomia ona tatalo faatasi ma tatalo eseese mo le Agaga o le upumoni ma le malamalamala.

4. Ia Iloilo soo. O le tulaga e tatau ona i ai, atonu o le a manaomia e ulugalii le fono soo faatasi e talanoaina le faagasologa ma le faaleleia o a latou metotia mo le feagai ai ma amioga le lelei. Mo le toatele, o le faagasologa, e le gata i le faaalia ai o le ogaoga o le faafitauli, ae faapea foi le suamalie o le vaifofo. O le tulaga maualuga, o le tuua faatasi o loto i mataupu faavae o le talalelei o le a aumai ai i ulugalii le mafutaga moni ma le alofa.

18 FAAMAONI A'IA'I I LE FAAIPOIPOGA

VAAIGA AOAO FAALE-AOAOGA FAAVAE

"Aua e te ... mulilua ... pe e te faia soo se mea faapena" (MF&F 59:6).

"O le faamaoni a'ia'i i feagaiga o le faaiipoipoga a se tasi, e matua moomia lava mo le alofa, faatuatuaina, ma le filemu. O le mulilua ua matua inosia e le Alii.

"O tane ma ava, o e alolofa le tasi i le isi, o le a iloaina o le alofa ma le faamaoni e fetaliai. O lenei alofa, o le a tuuina mai ai se siosiomaga mafana mo le tuputupu a'e faalelagona o fanau. O le olaga faaleaiga e tatau ona avea ma taimi o le fiafia ma le olioli e mafai e fanau ona toe vaai ai i tua ma ni manatua faamama'i ma mafutaga" (Ezra Taft Benson, "Faaolataga—O Se Mataupu Faaleaiga," *Liahona*, Iulai 1992, 2; po o le tusi lesona a le tagata aoga, 302).

"O alafua maualuluga o le mama o lenei ekalesia, e faatatau i sui auai uma i atunuutaitasi. O le faamaoni ma le igoa taulelia ua aoaoina ma faamoemoeina i soo se nofoaga. O le ola mama a o le i faaipoipo ma le faamaoni a'ia'i atoatoa i le ava po o le tane i le maea ai ona faaipoipo, e manaomia mai sui auai o le Eklesia i soo se mea lava. O sui auai, o e solia nei alafua maualuluga o amioga mama, o le a tuua lo latou tulaga i le Eklesia i se tulaga fesilgia i soo se mea lava i le lalolagi" (James E. Faust, i le Conference Report, Apr. 1995, 82; po o le *Liahona*, Me 1995, 62).

MATAUPU FAAVAE

O le faamaoni a'ia'i i le faaipoipoga e moomia i le faamamaluina o feagaiga na tatou osia ma o tatou taitoalua ma le Alii.

FAITAUGA MAI LE TUSI LESONA A LE TAGATA AOGA

Aoaoga Filifilia mai le "Faamaoni i le Faaipoipoga" (119–22)

Aoaoga Filifilia mai le "Ponokarafi" (282–85)

"O Le Aiga: O Se Folafolaga i le Lalolagi," o le Au Peresitene Sili ma le Korama a Apostolo e Toasefululua (89–90)

Ia Manatua: O lenei lesona atonu e manaomia le sili atu i le tasi le vasega e aoao ai.

FAUTUAGA I AUALA E AOAO ATU AI

 **Talanoaga.** Fai atu i tagata o le vasega e su'e i le vaega "Aoaoga Faavae o le Faamaoni" a'ia'i i le tusi lesona a le tagata aoga (119–20). Feauaua'i i le faitauina o faamatatalaga a Peresitene Gordon B. Hinckley. Valaaulia i latou ina ia lagona le saoloto e talanoa mai pe a mae'a soo se parakalafa.

Fai atu i tagata o le vasega e tali fesili nei mai faamatatalaga a Elder Ezra Taft Benson:

- I le sauniga o le faaipoipoga, o ai le vaega e osia feagaiga? (O taitoalua ma le Atua.)

O A MEA E AOAO ATU

*E i ai faaeteetega e
mafai ona faia e fesoasoani ai ia i tatou e
faamamalu a tatou feagaiga o le faaipoipoga.*

- O le a le tele o le taua o le faamaoni a'ia'i i se faaipoipoga? ("E matua manao-mia lava.")

Fesili atu i tagata o le vasega po o le a le manatu autu i le faamatalaga a Elder Robert D. Hales.

 **Mataupu suesueina.** Faitau ma talanoaina le tasi po o le sili atu foi o mataupu suesueina nei. Fesili atu i tagata o le vasega e saili amioga e mafai ai ona ta'ua o se le faamaoni, pe ono taitai atu foi i ai. O fesili o loo mulimuli mai i mataupu suesueina taitasi atonu e fesoasoani i la outou talanoaga.

- Na mafana ma fealofani le sootaga a Nathalie ma Marc i le tausaga muamua o la laua faaipoipoga. Na fafia uma i laua. Na vave ona fanau mai la laua ulumatua i le tausaga lona lua, ma sa fafia uma i le avea ai ma matua. I le taimi nei, i le tausaga lona tolu, ua seasea lava ona toe fusi, pe kisi, pe faaalia se ituaiga alofa faatino o le tasi i le isi. E ese mai lena, o loo tulaga lelei lava la laua faaipoipoga, e taufai fafia le tasi i le isi, ma la te galulue vavalalata faatasi e tausi la laua tama.

Peitai ane, o Nathalie, ua amata se faigaou vavalalata ma lo latou tuaoi o Gerard. E le i i ai se tulaga vavalalata faaletino i lo la va, vagana ai sina kisi se tasi. Talu ai ona o faigata i o laua olaga, ua fafia ai Nathalie ma Gerard e nonofo faatasi i luga o le nofoa umi i le fare o Gerard, ma talanoa mo se itula pe lua, a o le i foi mai Marc mai le galuega. Ua matua fafia lava Nathalie i le faatasi ai ma Gerard, ma lagona ai e ia ua pulea lelei e ia ona lagona. Ua sili atu lona fafia i lana lava faaipoipoga talu ona gauai atu ia te ia Gerard. E le o i ai sona popolega i le solia o le tulafono o le ola mama ma Gerard, aua ua uma ona la talanoaina, ma ua faaalia i laua uma le alofa sili mo le Alii, ma e le mafai ai ona la faia se tulaga faapena.

1. O le a le mea o sese i lenei sootaga?
2. O i ai se le faamaoni i le va o Nathalie ma Gerard? I le a le itu?
3. Afai o le sootaga a Nathalie ma Gerard e gata i le faaletino, e i ai la sona afaina?

- E fafia Hiro i tulaga maualuluga tau aoaoga ma faamoemoe mo se aso e fai-aoga ai i se iunivesite. E fafia o ia i le fetufaaiga lelei o manatu e maua ai lea tulaga. Talu ona maea lana polokalama o le tagata malaga, o lana galuega ma matafaioi tautupe, ua taofia ai o ia mai le sailiina o se tikeri maualuga atu. Ua le fafia o ia ona o lana ava o Yoshiko, o le sa tele ina ia faasoa atu i ai i le taimi o tafafao faamasani, ua le o toe fafia e faitau ma talanoa e uiga i mea o tutupu i le lalolagi. E ala i le faasoaina atu o ana tusi ma manatu i ana uo i le galuega, ma lona auai i le kalapu faitau tusi i vaiaso taitasi, ua mafai ai ona ia faamalieina ona manaoga. O Mika, o se tamaitai talavou mai le galuega, ua faatasi atu i le kalapu ina ua ia iloa mai ia Hiro. E matua fafia tele Hiro i manatu e tuuina mai e Mika.

1. O i ai se le faamaoni i le va o Hiro ma Mika i lenei faatulagaga?
 2. O a ni tulaga matautia e ono tutupu?
 3. O le a le mea e mafai ona faia e Hiro e fausia ai se sootaga sili atu faatasi ma lana ava?
- Ina ua maea ona la faaipoipo, na faateia Dave i lona iloaina ane, o lana ava fou o Joan e fafia e nofo i le fare i le tele o taimi. O Dave e masani ona fafia i taaloga ma gaoioiga i fafo. Peitai, o Joan, e fafia e teu le fare ma tausia Dave ma la laua pepe. E taalo Dave i se autaalo a le lotoifale, ma o nisi taimi e le

fiafia ai Joan i le tele o afiafi e alu ese ai Dave mai le aiga. O le tele o faaiuga o le vaiaso i masina taitasi, e alu ai Dave e fagota. Sa i ai se taimi se tasi sa ia teuina ai sana tupe mo ni masina e faatau ai se ofe fagota a Joan ma taumafai e aoao o ia e fagota. Sa taumafai Joan e faaali lona fiafia i ai ae sa ia le fiafia lava i ai. Na moomoo Dave ia pei Joan o Trisha, o se tamaitai talavou i le galuega e fiafia tele e taalo ma talanoa e uiga i taaloga. E tele taaloga a Dave e auai atu i ai Trisha.

1. O a faailoga matautia i lenei faaipoipoga?
2. O a vaifofo talafeagai mo le faafitauli?

O A MEA E AOAO ATU

*E i ai taunuuga tiga o
le le faamaoni.*

FAUTUAGA I AUALA E AOAO ATU AI



Talanoaga. Fesili atu i tagata o le vasega, po o a fua o le le faamaoni o loo i mataupu suesueina o loo i luga. O le a le tau o le le faamaoni? Toe faamanatu le tala ia Tavita ma Patisepa, ma le sala mamafa na totogia e Tavita mo lona mulilua. Ia aofia ai tala faaletusi paia nei i la outou iloilogia:

- 2 Samuelu 11:2–3. Na filifili Tavita e le liliu ese mai le faaosoosoga ina ua ia vaai atu ia Patisepa ae nai lo lena na ia faananau atu ia te ia.
- 2 Samuelu 11:4. Na faaaogaina e Tavita lona tulaga o le avea ma tupu e faatosina ma faasese ai Patisepa.
- 2 Samuelu 11:5. Na fanauina e Patisepa se tamaititi ona o la la'ua agasala.
- 2 Samuelu 11:6–13. Na taumafai Tavita e faaseseina le tane a Patisepa o Uria, ma natia ai la laua agasala.
- 2 Samuelu 11:14–17. Na taupulepule Tavita e ufiufi le luma o la laua agasala, e ala i le fasiotia o Uria i le taua.
- 2 Samuelu 12:1–7. O le perofeta o Natano, na faailoaina agasala a Tavita e ala i le tauina atu ia te ia o se faataoto ma fai atu “O oe lava le tagata.”
- 2 Samuelu 12:11–12. Na valoia e Natano faasalaga i le lumanai mo Tavita, na faataunuuina uma lava na faasalaga.
- 2 Samuelu 12:15–18. Na maliu le tama a Tavita ma Patisepa.
- Mataupu Faavae ma Feagaiga 132:39. Ua “pau Tavita mai lona faaeaga”; ua aveesea lona aiga mai ia te ia.



Galuega fai faavaega. Fai i tagata o le vasega e su'e i le “O Le Tau o le Le Faamaoni” i le tusi lesona a le tagata aoga (120–21). Vaevae le vaega o mau ma faamatalaga i tagata o le vasega, ma fai atu ia i latou e saili le tau o le le faamaoni. Tuu atu ia i latou e aotele mai a latou sailiiliga mo le vasega.

Tuu atu i tagata o le vasega e su'e i le Iakopo 2:7–9, 31–35 ma faailoa mai ia tau o le le faamaoni o i nei fuaiupu.

O A MEA E AOAO ATU

*E manaomia taumafaiga filiga e aloese ai
mai le le faamaoni.*

FAUTUAGA I AUALA E AOAO ATU AI



Talanoa faatasi ma tagata o le vasega le manatu faavae o le puipuiga. Fai atu i tagata o le vasega e su'e i le vaega “O Puipuiga e Fesoasoani e Taoafia ai le le Faamaoni” i le tusi lesona a le tagata aoga (121–22). Tuu atu ia i latou e aotele mai i luga o le laupapa ia laasaga e mafai ona tatou faia e aloese ai mai le solia o le mulilua, po o “soo se mea faapena” (MF&F 59:6).



Mataupu Suesueina. O Roberto, o se tagata faaipoipo o le Ekalesia e i ai ni ona afafine e toalua, e fiafia e alu i le Initoneti i le leva o le afiafi pe a momoe uma tagata. Talu ai nei lava na alu ai i luga o se saite e i ai ata ponokalafi. E ui ina faatiga i le taimi muamua na vaai i ai, ae na vave lava ona tosina atu o ia i ai. Mo le tele o afiafi na sosoo ai, pe a momoe uma tagata o le aiga, na ia toe alu ai i le saite lena, faatasi ma isi saite e i ai ata faapena.

I se tasi o po, na sau ai lana ava, o Ana Maria, i totonu o le potu ma maua o ia o matamata i ata ponokalafi. Na matuai ofo o ia ma sa ita tele. Sa ia naunau mo se avanoa e feiloai ai ma le epikopo, ma faamatau atu o le a tetea ma Roberto. Ua iloa e Roberto o le mea sa ia faia e sese ae ua ia lagona ua fai si mateletele o Ana Maria.

1. O fea e te manatu ua sese ai Roberto?
2. Aisea e ogaoga ai le amioga a Roberto?
3. O le a le mea e mafai ona faia e Roberto e toe maua ai le loto talitonu o lana ava ia te ia ma faamalosia ai la laua faaipoipoga?
4. O le fea le taimi e te fautuaina ai Roberto e saili mo se fautuaga?



Talanoaga. Fai i tagata o le vasega e su'e i Aoaoga Filifilia mai le "Ponokarafi" (tusi lesona a le tagata aoga, 282–85). E faapefea ona faaleagaina e ponokalafi se faaipoipoga? Vaevae faamatalaga i tagata o le vasega, ma fai atu ia i latou e saili auala e mafai ai e ponokalafi ona faaleagaina se faaipoipoga. Valaaulia i latou e aotele faapuupuu mai a latou sailiiliga, ma fai atu i se isi e tusi i luga o le laupapa.

FAAIUGA

Ia tusi i luga o le laupapa mataitusi o le *T A T O M A Ta'u* atu o nei mataitusi e sutulaga i se auala e faamautinoa ai i tatou ina ia le se atu i le le faamaoni. Fai atu i tagata o le vasega e faitau le Mataupu Faavae ma Feagaiga 121:45 ma iloa ai mea ua suia e nei mataitusi. ("Tuu le amiomama e teuteuina ai ou mafaufauga e le aunoa.")

- O le a le uiga o le upu *teuteuina?* ("Faamatagofieina" po o le "faamanaia.")
- O a ni faamanuiaga o mafaufauga mama? (tagai i le MF&F 121:46).

19 O LE TULAGA E OO I AI MATUA E FAI FANAU I SIONA

VAAIGA AOAO FAALE-AOAOGA FAAVAE

“Faauta, o le fanau o le tofi lea mai ia Ieova: o e ua fanau mai o le taui lea mai ia te ia.

“E pei o u fanafana i le lima o le toa; e faapea lava atalii o taulelea.

“Amuia le tagata ua tumu ai lana utu”(Salamo 127:3–5).

“Ua faamanuia foi e le Atua ia te i laua, ma ua fetalai atu le Atua ia te i laua, Ia fanafanau ia, ma ia uluola, ma ia tumu ai le lalolagi” (Kenese 1:28).

Na saunoa mai Elder Russell M. Nelson o le Korama a Aposetolo e Toasefululua:

“O lenei foi, o le tulaga e oo i ai le i ai o matua e fai fanau i Siona ... ae latou te *le aoaoina* i latou ia malamalama i le mataupu faavae o le salamo, e faatuatua ia Keriso le Alo o le Atua soifua, ma e uiga i le papatisoga ma le mealofa o le Agaga Paia e ala i le faaee o lima, pe a valu tausaga le matutua, ia i ai le agasala i luga o ulu o matua’ [MF&F 68:25; faaopoopo le faatusilima].

“O lena poloaiga, ua tuuina ai le tiutetauave ma le tofiga mo le aoaoina o fanau i luga o tauau tutusa o matua. O le folafolaga i le lalolagi e tusa ma le aiga, ua lapa-taia ai tagata taitoatasi ‘o e ua le mafai ona faataunuina tiutetauave faaleaiga, o le a i ai le aso e tu ai ma tali atu i luma o le Atua [“O Le Aiga: O Se Folafolaga i le Lalolagi,” *Liahona*, Nov. 1995, 102]. O le asō, ou te matua toe faamautu atu ai le moni o lena mea.

“I le faataunuina o nei tiute, tatou te manaomia uma le Eklesia ma le aiga. Latou te galulue u’ulima faatasi e faamalosia e le tasi le isi. Ua i ai le Eklesia ina ia faaea ai le aiga. Ma o le aiga o le iunite faavae o le Eklesia” (i le Conference Report, Oct. 2001, 85; po o le *Liahona*, Nov. 2001, 70).

MATAUPU FAAVAE

“*Ua fetalai atu foi le Atua ia te i laua, Ia fanafanau ia, ma ia uluola, ma ia tumu ai le lalolagi*’ (Kenese 1:28), o se poloaiga o le a le faaleaogaina lava” (M. Russell Ballard, i le Conference Report, Apr. 1995, 28; po o le *Liahona*, Me 1995, 22).

FAITAUGA MAI LE TUSI LESONA A LE TAGATA AOGA

“Fanauina ma le Faafaleleina o Fanau,” i totonu “O Le Fuafuaga Sili o le Fiafia,” Elder Dallin H. Oaks (277)

“O Le Aiga: O Se Folafolaga i le Lalolagi,” o le Au Peresitene Sili ma le Korama a Aposetolo e Toasefululua (89–90)

Aoaoga Filifilia mai le “Tulaga Faamatua: Fausiaina o se Aiga e Tutotonu ai le Talalelei” (258–61)

O A MEA E AOAO ATU

I lalo o le fuafuaga a le Alii o le fiafia, ua ia i tatou le tiutetauave o le aumaia o fanau i le lalolagi.

O A MEA E AOAO ATU

"Ia tausi a'e a outou fanau i le malamalamā ma le upumoni" (MF&F 93:40).

FAUTUAGA I AUALA E AOAO ATU AI

 **Talanoaga.** Fesili atu i tagata o le vasega pe toafia latou e i ai o latou uso, tuafafine ma ni tuagane. Fesili atu: E faapefe aona faamauoaina lou olaga e ala i ou uso ma tuafafine ma tuagane?

Faasoa atu le parakalafa muamua mai le saunoaga a Elder Dallin H. Oaks i totonusi o le tusi lesona a le tagata aoga (i. 18).

- Aisea e taua tele ai le poloaiga ia fai ni fanau?
- O a nisi o metotia po o filosofia ua faaaogaina e Satani "e taofia ai le fuafuaga a le Atua" i le aumaia o fanau i le lalolagi?

Afai o i ai sau fanau, ia faapipii i luga se ata o lou aiga po o ata o tamaiti taitasi, ma tusi se faamatalaga puupuu, lelei e uiga ia i latou taitoatas.

Fai atu i le vasega e faitau le vaega o le "Fanauina ma Tausia Fanau" i le saunoaga a Elder Oaks, "O Le Fuafuaga Sili o le Fiafia" (tusi lesona a le tagata aoga, 280). Ia talanoaina fesili nei:

- O a auala e mafai ona avea ai fanau ma a tatou "oa sili i le lalolagi ma le lagi"?
- O le a le mea na saunoa ai Peresitene Spencer W. Kimball, o le mafuaaga autu mo se ulugalii faaipoipo e mumusu ai e fai fanau? (Manatu Faapito.)
- O a ni faataitaiga o tulaga faatauaina po o mea e faamuamua e ono faamuamua e se ulugalii faaipoipo nai lo le faia o se fanau?
- Na saunoa mai Elder Oaks e tatau i se ulugalii ona mauaina "uma [fanau] e mafai ona la tausia." O a vaega atonu e tatau ona tatou iloiloina a o mafau-fau loloto i le aofai e mafai ona tatou tausiaina?
- E tusa ai ma le saunoaga a Peresitene Gordon B. Hinckley, o ai e nafa mo le fuafuaina o le toatele o se aiga? ("O le tane ma le ava ma le Alii.")
- Aisea e taua ai lo tatou le faamasinoina o le tasi ma le isi, e ala i le toatele o o tatou aiga?

Tuu atu i le vasega e faitau le vaega "E Leai Se Faamanuiaga E Teena" (tusi lesona a le tagata aoga, 281).

- O le a le mea e ao ona tatou faia e maua ai faamanuiaga atonu e foliga mai ua tatou teenaina i le taimi nei? (Ia tumau i le faamaoni i a tatou feagaiga.)
- E tusa ai ma le saunoaga a Elder Oaks, o afea e "faatulaga sao" ai nei mea?" (I le Meleniuma.)
- Aisea e faigata ai i nisi taimi ona faatumauina lenei vaaiga?

FAUTUAGA I AUALA E AOAO ATU AI

 **Talanoaga.** Valaaulia sui auai o le vasega e mafaufau i fanau ua latou maua, pe o le a mauaina. Fesili atu ia i latou, po o le a le mea sili latou te mananao i ai mo a latou fanau ma lisi tali i luga o le laupapa. Fesili atu: O le a le mea e mafai ona tatou faia e fesoasoani ai i a tatou fanau ina ia amiontonu ma faamaoni? Fai se lisi lona lua faatasi ma a latou tali i luga o le laupapa.

 **Galuega Fai Faavaega.** Vaevae le vasega i ni vaega ma tuuina atu ia i latou fai-tauga mai le "Aoao Atu le Talalelei i Fanau" ma le "Aoao Atu le Fanau ia Galu-lue" i le tusi lesona a le tagata aoga (i. 265–68). Fai atu i vaega taitasi e saili ni mataupu se lua, pe tolu e faataatau i le tiutetauave faamatua latou te fiafia i ai. Faatusatusa a latou sailiiliga ma le lisi lona lua o loo i le laupapa.



Talanoaga. Faitau le faamatalaga lenei mai ia Peresitene Harold B. Lee:

“O a tatou talavou ua i ai i se tulaga lamatia. Faatumauina sootaga faaleaiga ia malolosi, uso e. Ia vaai totoa i ai, e pei ona matou taumafai uma e fai atu ai, ma e pei ona ou fai atu soo ai i le tele o taimi, ma ua ta’ua foi e nisi i lenei konafesi, e faapea, “o mea aupito sili o le galuega a le Alii, o le a faia e outou uso e i le avea ai ma tamā, o le galuega tou te faia i totonus o puipui o outou lava fale.’ Aua le tuulafoaiina a outou ava, uso e. Aua le tuulafoaiina a outou fanau. Faavanoa taimi mo afiafi faaleaiga. Faalatalata mai a outou fanau i o outou autafa. Aoao i latou, taitai i latou, ma puipui i latou. E le i i ai lava se taimi, ua sili ai ona tatou manaomia ai se malosiaga sili atu ma le mausali o le aiga” (i le Conference Report, Apr. 1973, 130; po o le *Liahona*, Iulai 1973, 98).

- O a tiutetauave tou te manatu e i lalo o le ulutala “o le galuega a le Alii”?
- O le a le tali masani a se tamā pe a fesiligia e tagata, “O le a le ituaiga galuega o e faia?”
- Afai ua i ai i le mafaufau o se tamā le aoaoga a Peresitene Lee, faamata o le a faapefea ona ese lana tali?

E ui e le mafai ona mautinoa o le a faamaoni a tatou fanau, e i ai mea e mafai ona tatou faia e uunaia ai i latou ina ia faamaoni. E faapefea ona tatou faaleleia atili le aoaoina atu o le talalelei ia tatou fanau? Vaevae le vasega i vaega e tolu ma tuuina atu i vaega taitasi se tasi o vaega nei o le tusi lesona a le tagata aoga: “Afiafi Faaleaiga” (i. 261), “Faagasologa o Fonotaga Faaleaiga” (i. 261–63), “O Faaipoipoga Lelei e Faamanuiaina ai Fanau” (i. 263–65). Fai atu ia i latou e faitauina a latou vaega ma tagai mo auala patino e mafai ona lelei atili ai la tatou aoao atu. Valaaulia i latou e lipoti mai a latou saililiga i le vasega.

O A MEA E AOAO ATU

E tatau i matua ona alolofa pea lava pea ia latou fanau ma tuuina atu taumafaiga sili i le faafaleleina o fanau.

FAUTUAGA I AUALA E AOAO ATU AI



Talanoaga. Fai atu i tagata o le vasega e mafaufau mo tagata latou te manatu o ni matua ua avea ma faataitaiga lelei. Lisi i luga o le laupapa uiga o ia ituaiga matua.

- Pe mafai ona faapea ua faamanuiaina matua pe afai o i ai nisi o a latou fanau ua sese ese?
- O a tulaga lamatia o le faamasinoina o matua ona o amioga a a latou fanau?
- Aisea atonu e fuaina ai e matua lo latou faamanuiaina po o le toilalo i amioga a a latou fanau?

Na lapata’i mai Peresitene James E. Faust, o se fesoasoani i le Au Peresitene Sili: “E matua le fetaui ma lē agalelei le faamasinoina o matua magafagafa ma faamaoni ona o nisi o a latou fanau ua tetee pe ua o ese mai aoaoga ma le alofa o o latou matua. Ua faamanuiaina ulugalii, o e ua i ai fanau ma fanau a fanau, o e aumaia ia i latou le mafanafana ma le faamaliehoto. E tatau ona tatou amanaia ia matua agavaa ma amiontonu, o e tauivi ma mafatia ona o fanau le usitai.

“E masani ona faapea mai se tasi o a’u uo, ‘Afai e le i ai lava ni au faafitauli ma a outou fanau, ia faatalitali laitiiti mo sina taimi.’ E leai se tasi e mafai ona fai mai, faatasi ma sina tikeri o le mautinoa, mea o le a faia e a latou fanau i tulaga patino. Pe a vaai atu le tina o lo’u toalua atamai i isi fanau ua ulavavale, e masani ona ia faapea mai, ‘Ou te le fai atu lava o le a le faia e la’u fanau lea tulaga, aua atonu latou te faia nei lava a o o’u tautala atu. Pe a faavauvau matua mo fanau le usitai ma se ese, e ao ona ia i tatou le agaalofa, ‘e taofia ai le tog i le maa muamua’ [Harold B. Lee, *Faaiuga mo le Ola Manuia*(1973), 58]” (i le Conference Report, Apr. 2003, 69–70; po o le *Liahona*, Me 2003, 67).

Faitau faatasi faamatalaga mai ia Elder Howard W. Hunter ma Richard G. Scott i le itulau 259 i le tusi lesona a le tagata aoga.

- O a ni manatu ua tuuina mai e nei faitauga i le tulaga e avea ai ma se matua faamanuiaina?
- Aisea tou te manatu ai e filifili e fanau i nisi taimi se ala e ese mai ala a o latou matua amiontonu?

 **Talanoaga.** I lana miti o le laau o le ola, na vaai ai Liae sa mumusu Lamana ma Lemuelu e aai i fua o le laau. Faitau leotele upu na saunoa ai Liae i ona atalii faatuiuese (tagai i le 1 Nifae 8:36–38).

- E faapefea ona e faamatalaina le auala na aoao ai Liae i ona atalii i le fuaiupu 37?
- O a mea e sili ona faafafiaina ai oe i mea na ia saunoa mai ai ma le auala na tuuina mai ai?

Latalata lava i le iuga o lona soifua na toe talanoa atu ai Liae i ona atalii faalo-gogatata. Faitau le 2 Nifae 1:21–23.

- Aisea e faaaauai peea ona aapa atu se matua i se tamaititi le usitai, e tusa lava pe ua faamaonia i le tele o tausaga, atonu e le salamo lava le tamaititi?
- O le a se mea e te manatu e faaaauai ai peea ona le fiu matua ia latou fanau?
- E faapefea ona e faavasegaina le mataalia o Liae i le avea ai ma se matua?

Faasoa atu le fautuaga lenei mai ia Elder Neal A. Maxwell, o le sa avea i lena taimi ma se sui o le Fitugafulu, ma fai atu i tagata o le vasega e saili mo auala e mafai ona faatatau ai i se tiutetauave o se matua.

“Pe mafai ona ou fai atu, e le mo le au faatamala i le Malo, ae ia i latou o e tau-aveina a latou lava avega ma sili atu; e le o i latou o e faaososoina i le le mautonu, ae mo i latou o e ua fesouaiina e ala i lagona le mautonu sese, e ui o loo auaua faamaoni i le Malo, ua i ai lagona faatupulaia o le faavavau ona sese. ...

“O le mea muamua e ao ona ta’u atu e uiga i lenei lagona o le le agavaa, o le faapea atu lea o se mea e masani ai. E leai lava se auala e mafai ona faamatalaina atoatoa ai e le Ekalesia le mea e tatau ona tatou agai i ai, ma le mea e ao ona tatou faia e aunoa ma le fausiaina o se lagona o le vavamamao le mafaatusalia. ...

“O nisi o tatou o e o le a le faasaoina se tuaoi mo nai ona faaletonu laiti, ua i ai sona aso taalo ma i tatou lava. O nisi o tatou ua tutu lava ma soona faamasino ia i tatou lava, o se faamasino e faamaaa ma lē manao e talia ni faamaoniga fiafia, ma le popole i se isi mea mo le faagasologa tatau ai. O le mea e lelei ai, e sili atu le alofa o le Alii mo i tatou, nai lo i tatou lava. ...

“... E mafai ona tatou faatagaina mo le saolotoga o isi (e aofia ai a tatou fanau) *ae tatou te le i faavasegaina lo tatou le agavaa. E masani lava o lo tatou tulaga sili mautinoa, e itiiti sona aafiaga ona o le le lelei o le isi tagata*” (i le Conference Report, Oct. 1976, 14–15; po o le *Liahona*, Nov. 1976, 12–14).

- E mafai faapefea ona fesoasoani lenei fautuaga ia oe e fuaina ai lou tulaga faamanuiaina o se matua?
- E faapefea ona faaopoopo atu lenei mea i lou malamalamā i ou matua?
- E faapefea ona fesoasoani ai ia te oe a o outou fegalegaleai ai ma isi matua?

Fai atu i tagata o le vasega e aotele mai ni manatu faavae autu se tolu pe fa mai lenei lesona.

FAAIUGA



Faasoa atu le saunoaga lenei mai ia Peresitene Ezra Taft Benson:

"O tane ma ava e alofa le tasi i le isi o le a la iloaina o le alofa ma le faamaoni, e fetaliai. O lenei alofa o le a tuuina mai ai se siosiomaga mafana mo le tuputupu a'e faalelagona o fanau. O le olaga faaleaiga, e tatau ona avea o se taimi o le fiafia ma le olioli, e mafai ai e fanau ona toe tepa i tua ma se lagona fiafia mo fegalegaleaiga ma le manatuaina o mea mananaia " (i le Conference Report, Oct. 1982, 85; po o le *Liahona*, Nov. 1982, 59).

Tusi le fasi fuaitau ma le mau lenei i luga o le laupapa:

"O fanau o le tofi lea mai le Alii" (Salamo 127:3).

Molimau atu e faapea o le mauaina ma le tausiaina o fanau i se nofoaga o i ai le alofa o se avanoa paia lea. E avea tatou ma paaga ma le Tama Faalelagi, i le faateleima o le alualu i luma o Ana fanau agaga.



O LE EKALESIA A
IESU KERISO
O LE AU PAIA O ASO
E GATA AI

SAMOAN

